



JORNAL do Parlamento Nacional

VI LEGISLATURA

2.ª SESSÃO LEGISLATIVA (2023-2028)

REUNIÃO PLENÁRIA DE 21 DE JANEIRO DE 2025

Presidente: Ex.^{ma} Sr.^a Maria Terezinha da Silva Viegas

Vice-Presidentes: Ex.^{ma} Maria Terezinha da Silva Viegas
Ex.^{mo} Sr. Alexandrino Afonso Nunes

Secretária: Ex.^{ma} Sr.^a Virgínia Ana Belo

Vice-Secretárias: Ex.^{ma} Sr.^a

SUMÁRIO

Sr.^a Presidente Maria Terezinha da Silva Viegas declara aberta sessão plenária iha tuku 9 liu minuto 23 dadeer no halo kedas leitura ba agenda serbisu loron ne'e nian.

Antes Ordem do Dia – Leitura ba carta justificação falta husi Sr. Deputado no Deputada sira Maria Terezinha da Silva Viegas (CNRT),

Maria Angélica Rangel da Cruz dos Reis, Óscar Lima no Alexandrino Afonso Nunes (FRETILIN);

Iha biban declaração bancada parlamentar sira-nian, Bancada FRETILIN, liuhusi Sr. Deputado Abílio Quintão Pinto, hato'o declaração política ne'ebé critica atuação SEATOU nian tanba la cria uluk condição molok halo despejo administrativo

ka evicção ba comunidade afetado sira iha Díli, nune'e mós ba vendedor sira iha Baucau.

Husi Bancada KHUNTO, Sr. Deputado António Verdial de Sousa, hato'o declaração política ne'ebé aborda kona-ba problemática iha sistema educação Timor-Leste nian.

Ikusliu, husi ninia vez, Bancada PLP, ne'ebé representa husi Sr. Deputado Hélder Freitas «Kamarudin», iha ninia declaração política, critica política IX Governo nian kona-ba assunto veterano no combatente libertação nacional sira-nian.

Iha intervenção oin-oin, Sr.^a Deputada no Sr. Deputado sira aborda kona-ba: evicção no despejo administrativo ne'ebé SEATOU halo ba comunidade sira iha Díli laran; condição no facilidade mercado foun iha Baucau; koto no fore-rai ne'ebé AIFAESA no CLN sunu iha Lixeira Tibar; descontentamento liga ho publicação lista edital veterano sira-nian; condição estrada entre Bairro Pitê no Ailok-Laran; necessidade atu alarga UNTL to'o iha município sira; atuação equipa SEATOU nian hasoru vendedor sira iha mercado Baucau; insuficiência fatin baixa iha HNGV; destruição ai-moruk husi parte saúde nian; transferência funcionário husi categoria técnico administrativo no professor sira iha município Bobonaro; insatisfação liga ho publicação lista edital veteranos nian; desempenho Diretora Executiva AIFAESA nian; loja ki'ik sira-ne'ebé fa'an sasán estragado; loja balu ne'ebé fa'an sasán sem etiqueta preço nian; necessidade atu facilita passaporte no emite carta condução original ba população sira iha município; serviço SERVE, I.P. nian liga ho licença ba negócio ki'ik sira iha município; ordenamento territorial iha município sira, ne'ebé inclui marcação ba rai Estado sira no licença edificação nian; reabilitação escola balu ne'ebé la tuir desenho no BoQ; demolição rate iha Lifau tanba construção hotel; problema iha Escola 4 de Setembro Díli; necessidade atu CAC halo

investigação ba pessoal sira-ne'ebé serbisu iha CCLN; condição estrada husi terminal Becora ba Paróquia Bedois; alteração Lei n.º 3/2006; atraso iha pagamento ba projeto construção muro ida iha Luak; lançamento sem realização ba construção estrada ba Alas Vila; falta carreta ambulância iha Viqueque; diretor escola recém-empossado sira-ne'ebé la ativo iha serbisu; falta luz elétrica iha Aldeia Somo Kanua, Suco Lour; reabilitação Centro Saúde iha Atabae no Lautém nian ne'ebé la tuir padrão; ai-moruk sira-ne'ebé prazo liu ona; necessidade atu cria plano ordenamento territorial, tanto nacional nune'e mós municipal; problema hirak ne'ebé mosu ligado ho aquisição ró, avião no alienação sasán imóvel Estado nian iha RAEOA; impacto husi alteração lei veterano nian ba beneficiário balu; condição estrada iha município 12; abandono obra construção irrigação iha Garubi-Galata husi empresa responsável; normalização Mota Seixal no mota ki'ik sira iha Bauau; falta pessoal saúde iha Posto Saúde Same; condição estrada iha Suco Soru Kraik, Ainaro Vila; valorização ba líder histórico sira; abandono projeto reabilitação estrada iha Ailok-Laran; falta de acesso comunidade iha Suco Beloi no Suco Ossouala Vemassee nian ba eletricidade; falta sala de aula iha escola CAFE Taibesi nian.

Ikusmai, Sr. Vice-Ministro dos Assuntos Parlamentares, Adérito Hugo da Costa, hatán ba Deputado sira-nia husun no preocupação.

Ordem do Dia – 1. Anúncio da Admissão e baixa à Comissão dos Assuntos Constitucionais e Justiça da Proposta de Lei n.º 15/ VI (2.^a) – Primeira alteração à Lei n.º 1/2017, de 18 janeiro, Regime transitório de recrutamento de magistrados e defensores públicos não timorenses e Segunda alteração à Lei n.º 9/2011, de 15 de agosto que aprova a Orgânica da Câmara de

Contas do Tribunal Superior Administrativo, Fiscal e de Contas». Sr. Deputado sira ne'ebé intervém mak Olinda Guterres (KHUNTO), Angelina Lopes Sarmiento (PLP), Virgílio Pereira (CNRT), Nurima Ribeiro Alkatiri no Lídia Norberta dos Santos Martins (FRETILIN), Adolfo Martins (PLP), David Dias Ximenes «Mandati» (FRETILIN), Domingos Augusto «Deker» (CNRT), José Virgílio R. Ferreira (CNRT), Maria Anabela Savio (FRETILIN), Cedelízia Faria dos Santos (CNRT), Armando dos Santos Lopes (PD), Sância Florência Paixão Bano (FRETILIN), Florentino Ximenes da Costa «Sinarai» (FRETILIN), Florentino Ximenes da Costa «Sinarai» (FRETILIN), Maria Rosa da Câmara «Bisoi» (CNRT), Antoninho Bianco (FRETILIN), Hélder Freitas «Kamarudin» (PLP), Dário Madeira (FRETILIN), Natalino dos Santos Nascimento (CNRT), José da Cruz (FRETILIN), Maria Gorumali Barreto (CNRT), Aliança da Conceição Araújo (CNRT), Aliança da Conceição Araújo (CNRT), Anacleto Freitas (CNRT), Maria Angélica Rangel da C. dos Reis (FRETILIN), António da Conceição «Kaloan» (PD), Helena Martins Belo (FRETILIN), António Verdial da Silva Ferreira (KHUNTO), Joaquim dos Santos «Boraluli» (FRETILIN), Francisco da Costa «Ikulay» (CNRT), Luís Roberto da Silva (KHUNTO), Patrocínio Fernandes dos Reis (CNRT), Maria Anabela Savio (FRETILIN), Dário Madeira (FRETILIN), Helena Martins Belo (FRETILIN), Maria Rosa da Câmara «Bisoi» (CNRT), Aniceto Longuinhos Guterres Lopes (FRETILIN), António Verdial de Sousa (KHUNTO), Helder Freitas «Kamarudin» (PLP)..

Sr.^a Presidente declara taka sessão ne'e ihauku 1 liu minuto 39 lokraik.

Sr.^a **Presidente** (Maria Terezinha da Silva Viegas): — Srs. Deputados, ita iha quórum 34 Deputados presentes.

Horas hatudu tuku 9 liu minuto 23 dadeer.

Agora já são 9h23 minutos, por favor, husu ba distinto Deputado sira hotu ita atu hahú ita-nia Plenária ba loron ohin nian, 21 de janeiro de 2025.

Distintos Deputados, por favor hola fatin.

Bom dia, Sr. Vice-Ministro, ha'u husu ba Deputado sira hotu ho devido respeito, favor hola fatin.

Dala ida tan, bom dia ba distinto Deputado sira hotu, ohin ita-nia reunião plenária de terça-feira, 21 de janeiro de 2025, ho agenda hanesan tuirmai ne'e:

«Período de antes ordem do dia:

1. Justificação de faltas dos Senhores Deputados Maria Terezinha da Silva Viegas, Maria Angélica Rangel da Cruz dos Reis, Óscar Lima e Alexandrino Afonso Nunes;

2. Declarações políticas das bancadas parlamentares da FRETILIN, do KHUNTO, do PLP e do CNRT;

3. Intervenções diversas dos Senhores Deputados;

4. Intervenção do Sr. Vice-Ministro dos Assuntos Parlamentares sobre as questões suscitadas pelos Senhores Deputados.

Período da ordem do dia:

Anúncio da Admissão e baixa à Comissão dos Assuntos Constitucionais e Justiça da Proposta de Lei n.º 15/ VI (2.^a) – Primeira alteração à Lei n.º 1/2017, de 18 janeiro, Regime transitório de recrutamento de magistrados e defensores públicos não timorenses e Segunda alteração à Lei n.º 9/2011, de 15 de agosto que aprova a Orgânica da Câmara de Contas do Tribunal Superior Administrativo, Fiscal e de Contas».

Ho nune'e, ha'u husu ba Distinto Deputado sira se concorda ho agenda ohin nian.

Karik bancada ruma atu pronuncia liga ho declarações políticas, iha bancada haat mak halo declarações políticas, fica como está ou iha alteração ruma, se faz favor.

Sr. **Patrocínio Fernandes dos Reis** (CNRT): — Obrigado.

Bom dia ba Mesa, Declaração Bancada nian ami adia ba semana ida.

Obrigado.

Sr.^a **Presidente** (Maria Terezinha da Silva Viegas): — Muito obrigada, Vice-Presidente da Bancada do CNRT.

Ho hanesan ne'e ha'u fó kedas ba Sr.^a Secretária atu halo leitura ba agenda n.º 1.

Se faz favor.

Sr.^a **Secretária da Mesa** (Virgínia Ana Belo): — Obrigada, Sr.^a Presidente.

Bom dia ba Sr.^a Presidente, Vice-Presidente, Sr. Vice-Ministro dos Assuntos Parlamentares, colega Deputado sira hotu, no mós ba audiência tomak.

«Requerimento de justificação de falta

Excelentíssima Sr.^a Presidente do Parlamento Nacional,

Maria Terezinha da Silva Viegas, Deputada ao Parlamento Nacional, pertencente à Bancada do CNRT, vem requerer a Vossa Excelência que se digne considerar justificada a falta dada à reunião de Plenário no dia 13 de janeiro de 2025, por motivo de saúde.

Data, 20 de janeiro de 2025

A Deputada,

Maria Terezinha da Silva Viegas».

«Ex.^{ma} Sr.^a Presidente do Parlamento Nacional,

Maria Angélica Rangel da Cruz dos Reis, Deputada ao Parlamento Nacional, pertencente à Bancada da FRETILIN, vem requerer a Vossa Excelência que se digne considerar justificadas as faltas dadas às reuniões de Plenário nos dias 13, 14 de janeiro de 2025, por motivo de razões ponderosas.

Data, 20 de janeiro de 2025

A Deputada,

Maria Angélica Rangel da Cruz dos Reis».

«Ex.^{ma} Sr.^a Presidente do Parlamento Nacional,

Óscar Lima, Deputado ao Parlamento Nacional, pertencente à Bancada da FRETILIN, vem requerer a Vossa Excelência que se digne considerar justificada a falta dada à reunião de Plenário no dia 14 de janeiro de 2025, por motivo de razões ponderosas.

Data, 20 de janeiro de 2025,

O Deputado,
Óscar Lima».

«Ex.^{ma} Sr.^a Presidente do Parlamento Nacional,

Alexandrino Afonso Nunes, Deputado ao Parlamento Nacional, pertencente à Bancada do PD, vem requerer a Vossa Excelência que se digne considerar justificada a falta dada à reunião de Plenário no dia 7 de janeiro de 2025, por motivo de saúde.

Data, 21 de janeiro de 2025,

O Deputado,
Alexandrino Afonso Nunes».
Obrigada Presidente.

Sr.^a **Presidente** (Maria Terezinha da Silva Viegas): — Muito obrigada, Sr.^a Secretária.
Tuirmai, ha'u fó kedas ba declarações políticas ba Bancada da FRETILIN.
Se faz favor.

Sr. **Abílio Quintão Pinto** (FRETILIN): — Obrigado, Sr.^a Presidente.

Sr.^a Presidente Parlamento Nacional, colega Deputada no Deputado sira hotu, Sr. Vice-Ministro dos Assuntos Parlamentares, povo doben Timor-Leste, dadeer di'ak ba ita hotu.

«Infelizmente, tinan foun 2025 la'ós lori graça ba ema hotu-hotu maibé lori mós desgraça no matan-been ba população sira-ne'ebé hetan evicção husi IX Governo Constitucional. Evicção ne'e halo cidadão lubuk boot ida tem que lakon sira-nia hela-fatin, fatin negócio, kios, fatin serbisu, no interrompe labarik sira-nia estudo. Tanba forçadamente desloca ba fatin seluk sem preparação, halo labarik sira hetan dificuldade atu continua sira-nia estudo, inan-aman sira tem que lakon sira-nia uma no sasán ne'ebé sira hetan ho sira-nia sacrifício no esforço rasik iha tempo naruk nia laran.

Bancada FRETILIN la contra ordenamento no la contra desenvolvimento no despejo administrativo ka realocação ne'e rasik, maibé FRETILIN contra no condena maka'as maneira no mecanismo ne'ebé usa iha processo ne'e tomak tanba SEATOU usa maneira ida brutal no grosseira, forçada, hasai família sira ho oan nurak, labarik ki'ik, ferik-katuas, ema moras no ema ho deficiência sai husi sira-nia hela-fatin, ne'ebé halo sira hakfodak no trauma la hatene atu bá loos ne'ebé.

Hahalok brutal no desumano sira-ne'e mak FRETILIN discorda no condena atu labele atu acontece ba ita-nia população kbiit-laek sira, atu dudu nafatin sira ba kotuk.

FRETILIN concorda evicção planeada, persuasiva, sira labele lakon sira-nia sasán sira-ne'ebé sei bele fa'an hodi hatutan sira-nia moris. FRETILIN la concorda no condena maka'as execução forçada

iha evicção hotu-hotu ne'ebé SEATOU ho autoridade municipal sira halo ho força lori forza F-FDTL no segurança hasoru inan-feton sira no labarik sira ne'ebé ajuda inan-aman sira buka hatutan sira-nia moris. Hanesan iha mercado rotunda Vila-Nova Baucau nian, rakut inan-feton no labarik sira, halo sira-nia sasán fa'an nian naklekar no sama halo aat tiha, no mós ba jovem sira-ne'ebé brani no criativo, ne'ebé hateke ba sira-nia investimento destrói ho matan-been, hanesan iha Fomento II.

Vendedor sira-ne'e muda duni ona ba fatin ne'ebé Autoridade Município Baucau prepara, maibé fatin mercado foun ne'e dalan tama aat no microlete sira susar atu tama, bee la iha, saneamento la di'ak, comprador sira la bá iha fatin ne'e, sira-nia produto ema la sosa no sai aat de'it, nune'e sira balu fila mai fa'an iha fatin uluk iha rotunda ne'e. Nune'e, BOP (Batalhão de Ordem Pública) no agente gestão de mercado bá hatudu sira-nia força hasoru inan-feton no labarik sira no estraga sira-nia produto sira fa'an nian.

Bancada FRETILIN discorda no questiona maka'as, fatin ba sira la iha condição no ato grosseiro no brutal autoridade segurança nian ne'ebé desumano no la educativo hasoru feto no labarik sira. Sira la'ós criminoso maibé sira povo Timor-Leste, apenas buka espaço no condição atu hatutan sira-nia moris, sira mós precisa respeito no consideração hanesan ema no cidadão Timor-Leste. Ba evicção hotu-hotu, FRETILIN husu atu realoca fali sira ba fatin ne'ebé adequado no seguro ba sira-nia moris, ba sira-nia oan sira-nia escola no nia serbisu-fatin atu hatutan moris, no indemniza sira tuir ida-idak nia uma fatin no sasán ne'ebé sobu no halakon.

Excelências,

Bancada FRETILIN iha momento ida-ne'e hakarak hatu'o ami-nia solidariedade ida kle'an ba Maubereoan sira hotu, liuliu ba feto faluk, inan isin-rua, labarik sira, ema ho deficiência no sira-ne'ebé durante ne'e moris ho rendimento ki'ik maibé afetado maka'as husi política evicção husi Governo ida-ne'e. Bancada FRETILIN hanoin katak maski Governo iha força no poder atu regula, controla no gere cidade Díli no cidade capital município sira-nian sai furak, maibé buat hirak ne'e labele hasees povo ki'ik kbiit-laek sira nu'udar último beneficiário husi ordenamento cidade Díli no cidade sira seluk iha Timor-Leste tomak. Povo tem que sente plano ordenamento ida-ne'e nia vantagem no haree nia oportunidade, la'ós husik povo kbiit-laek sira atu leva de'it risco no consequência sira-ne'e mesamesak, basá povo ida-ne'e mak na'in ba ukun rasik an ida-ne'e. Povo ida-ne'e, biar kiak no ki'ik, maibé iha vontade atu conquista ukun-rasik an ida-ne'e ho hanoin atubele hetan direito nu'udar cidadão ida-ne'ebé moris digno iha sociedade ida-ne'ebé hatuur iha justiça social, hanesan Constituição da República artigo 6.º menciona.

Ikusliu, antes atu termina, ha'u hakarak atu apresenta ba ita hotu katak único iha mundo ne'e só iha Timor-Leste de'it mak Presidente da República lori secretário de Estado ka membro do Governo ida bá tribunal, maibé Deputado sira continua defende iha Parlamento Nacional, dehan buat hotu la'o

di'ak, la'o tuir lei. Ne'e comédia ka cenário saida mak ida-ne'e? Hein katak tribunal bele tetu Sua Excelência ninia queixa ne'e».

Obrigado barak.

Sr.^a **Presidente** (Maria Terezinha da Silva Viegas): — Muito obrigado, distinto Deputado.

Tuirmai, ha'u fó ba Bancada do KHUNTO.

Se faz favor.

Sr. **António Verdial de Sousa** (KHUNTO): — Muito obrigado, Sr.^a Presidente em exercício, e componente da Mesa, Sua Excelência Sr. Vice-Ministro dos Assuntos Parlamentares no maluk distinto Deputado no Deputada mak ha'u respeita.

Ohin, Bancada KHUNTO hakarak ko'alia kona-ba desafios educativos iha Timor-Leste.

Excelências distintas Deputadas e Deputados, Timor-Leste hanesan país ida iha sudeste asiático ho nia população milhão ida resin.

Timor-Leste sai país independente iha tinan 2002, depois de ocupado ka anexado husi Estado Indonésia ho duração tinan 24, nune'e mós iha tinan 400 nia laran hela iha domínio colonial português. Timor-Leste sei nafatin recupera nia passado ne'ebé nakonu ho violência no enfrenta desafios significativos tanba quase 42% husi ninia população sei moris iha limiar kiak ka mukit nia laran.

Hanesan resultado husi invasão no destruição iha biban liu ona, ne'ebé halo husi maluk timoroan rasik ne'ebé la hakarak Timor independente iha tinan 1999, iha tinan 2001 90% escola iha ita-nia rai Timor-Leste rahun tiha no lakon ida-ne'ebé significativo husi mão-de-obra ka serbisu-na'in iha setor educação ninian.

Desde restaura ita-nia independência, Timor-Leste halo avanço ne'ebé «significante» iha desenvolve filafali ninia sistema educação ho apoio husi doador internacional sira.

Excelências distintas Deputadas e Deputados, educação ne'e obrigatória no direito constitucional ida iha Timor-Leste. Husi tinan 6 to'o 14, oan hirak ne'ebé escola iha escolas públicas ne'e gratuita, ninia sistema educativo inclui tinan rua husi ensino pré-secundário no tinan tolu husi ensino secundário.

Aproximadamente 86% labarik sira matricula iha escolas públicas iha Timor-Leste, enquanto número ki'ik ida husi labarik sira privilegiadas frequenta escola ka estuda iha escolas privadas ne'ebé oferece educação ida-ne'ebé ho qualidade superior.

Timor-Leste alcança mós igualdade género iha ensino primário no pré-escolar quase iha região hotu iha País ida-ne'e.

Maluk distintos Deputados mak ha'u respeita, Constituição República Democrática de Timor-Leste reconhece atualmente lian português no tétum, liafuan ne'ebé usa barak liu iha Timor-Leste mak língua franca ka *bahasa pergaulan*. Liafuan loroloron hanesan liafuan nacional, liafuan português no tétum, liafuan hirak ne'ebé atribui ba ciclo dahuluk ba hanorin husi tinan dahuluk ba tinan dahaat, nune'e mós liafuan português ne'e liafuan manorin ba escola secundária, ida-ne'e mak precisa ita hatene.

Nune'e, husu ba major educativo sira, liuliu universitário ne'ebé liderado husi ema timoroan, favor ida, labele hatete fali dehan katak «língua portuguesa ne'e labele usa», ne'e la loos!

Entretanto, desafios de educação nafatin iha, hatudu mai ita título ilustração facilidades ka instalações escolares menos ka inadequadas. Ita bele haree, 66% husi escola sira la iha saneamento adequado, 40% husi escola sira la iha água potável ka bee hemu, nune'e mós sei falta metodologia hanorin ne'ebé adequado ba labarik sira. Nune'e mós, número sira relativa, nakait ba educação sei la fó satisfação tanba 37% husi jovens ho idade 15 to'o 24 balu la hatene lê no hakerek, analfabeto, no 70% husi estudante husi tinan dahuluk la cumpre objetivo hirak husi aprendizagem curricular.

Verdadeiramente, iha tinan 2020, labarik hamutuk 9291 entre 9986 *remaja* ka adolescente la frequenta escola. Halo tuir relatório ne'ebé ita lê husi *UNICEF (United Nations Children's Fund)* nian, apenas 20% husi labarik sira iha idade pré-escolar ne'ebé regista ita escola, embora ninia taxa bruta iha aumento 25% iha tinan 2019.

Excelências distintos Deputados e Deputadas, ho explanação hirak-ne'e mak iha-ne'e duni ita-nia Nação hasoru dificuldade ba cumprimento husi objetivo aprendizagem. Apesar husi esforço hotu-hotu, Timor-Leste reconstrui ninia sistema educativo, labarik feto no mane lubun la atinge padrões ensino aprendizagem ba sira-nia tinan ba hirak ne'ebé moris iha áreas rurais no iha ambiente ne'ebé mukit tebes. Questão hirak ne'e hotu mosu causa husi falta de preparações ba labarik sira hodi escola, ne'ebé provoca taxa elevada ida la sa'e classe 24% no labarik sira la frequenta escola regularmente, no dala barak halo sira abandona sira-nia escola.

Excelências distintos Deputados e Deputadas, ho acordo Banco Mundial iha tinan 2010, 70% husi alunos husi ensino pré-primário tinan dahuluk no 20% husi alunos tinan datoluk la consegue lê literatura simples. Além disso, quase metade husi labarik sira ho idade entre tinan 3 no 18 ne'ebé iha deficiência la regista iha escolas.

Iha-ne'e ita ko'alia uitoan kona-ba desenvolvimento capacidade professores ho sira-nia deficiência ka *kekurangan*.

Maior desafio ida-ne'ebé Timor-Leste enfrenta mak hanesan reabastece força serbisu no falta ema ne'ebé ho mérito ka qualidade no proficiente iha sistema escolar público. Facto hatudu katak professor barak ladún iha qualificação ba hanorin tanba barak apenas conclui ensino secundário no apenas husi força trabalho iha qualificações mínimas hodi hanorin.

Ita haree, iha biban hirak-ne'e, agência internacional hanesan *UNICEF* (*United Nations Children's Fund*), Governo Portugal nune'e mós Brasil ajuda Ministério da Educação hodi hadi'a sistema educativo ba aluno nune'e mós ba professor ba ensino básico.

Atu hadi'a competências no conhecimento professor sira-nian, Governo hetan tulun husi *UNICEF*, implementa daudauk iniciativas instituições, inclui convida professor sira husi escolas primárias públicas ba escola hirak ne'ebé ho recurso ne'ebé di'ak hodi participa ka hola parte iha processo ensino aprendizagem entre pares no aprende kona-ba boas práticas educativas.

Iniciativa ida-ne'e halo tuir princípio escola foun, aproximação escolar ida kona-ba amiga husi estudante sira, ne'ebé centra ka focos ba hadi'a acesso no qualidade ba educação iha escolas primárias no secundárias iha Timor-Leste.

Ikusliu, iha Bancada KHUNTO nia acompanhamento biban hirak-ne'e, atu hatete katak:

1. Nafatin encoraja Governo, especialmente Ministério da Educação, atu trata assunto ida-ne'e tuir padrão legal ne'ebé iha;

2. Encoraja professor sira, bolu sira atu ko'alia, nune'e bele hamutuk hodi resolve tiha problema hirak-ne'e;

3. Lalika bá halo demonstração tun-sa'e, maibé, se bele, buka meios oinsá hasoru ita-nia entidade governamental, ministério ne'ebé lidera, Ministério da Educação, atu nune'e hamutuk Ita-Boot sira buka solução. Se ninia qualidade ne'e seidauk bele atu hanorin, então oinsá para hetan formação ida-ne'ebé adequada, quando adequada ona mak biban mós Ita-Boot sira iha direito atu hanorin.

Tuka ba ne'e Bancada KHUNTO nia declaração política ohin loron».

Muito obrigado, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, Bancada do PLP.

Se faz favor.

Sr. **Hélder Freitas «Kamarudin»** (PLP): — Obrigado ba tempo.

Bom dia ba Excelência Presidente interina do Parlamento Nacional, distinto Deputado sira hotu, Excelência Vice-Ministro dos Assuntos Parlamentares no povo doben Timor-Leste.

Partido Libertação Popular estabelece atu luta ba povo Timor-Leste nia moris di'ak, hodi defende democracia, justiça social e direitos humanos no desenvolvimento sustentável.

Iha artigo 11.º, n.º 3) husi Constituição da República Democrática de Timor-Leste consagra katak «Estado assegura proteção especial ba mutilado iha funu no ba ema ne'ebé dedica nia vida ba luta ba independência no soberania nacional nia oan-kiak no dependente sira seluk, no protege ema hotu-hotu ne'ebé participa iha resistência hasoru ocupação estrangeira, tuir lei», nune'e, Lei n.º 3/2006, dia 12

de abril, kona-ba Estatuto dos Combatentes da Libertação Nacional, estabelece reconhecimento no valorização ba veterano no combatente libertação nacional ne'ebé dedica sira-nia moris ba luta libertação Pátria Timor-Leste.

Maski nune'e, depois de IX Governo Constitucional publica iha lista edital husi registo segundo nian ba combatente libertação nacional iha município no posto administrativo oioin iha Timor-Leste, iha dia 15 de janeiro de 2025, mosu descontentamento no protesto husi veterano sira iha parte oioin iha Timor-Leste.

Situação ida-ne'e alarmante no sai preocupação pública, tan ne'e, liuhusi declaração ida-ne'e PLP hakarak solidariza veterano sira ne'ebé naran excluído no sira ne'ebé la hetan reconhecimento husi Governo, e, PLP mós hakarak hato'o ninia declaração política ida-ne'e hodi aborda ninia preocupação, e, kona-ba lista edital ne'e rasik iha ponto lima tuirmai:

1. IX Governo Constitucional la iha seriedade no política clara hodi resolve assunto veterano iha Timor-Leste. Mesmo IX Governo Constitucional iha ninia programa haktuir ação oioin atu resolve problema combatente libertação nacional, Governo ida-ne'e sei falha identifica loloos veterano no antigo combatente sira, tan ne'e mak lista edital ne'ebé taka ona iha município no posto administrativo sira iha Timor-Leste la inclui figura balu ne'ebé fó sira-nia dedicação significativa iha luta naruk ba libertação popular ida-ne'e.

Husi total 124.782 iha registo segundo nian iha 2009, naran ne'ebé sai mak ho total 92.591 e tuir escalão no grau oioin, significa quase 33.000 combatente mak excluído iha registo segundo ne'e e ne'e número ida boot tebetebes. Maski Governo fó tempo atu reclamante sira hato'o reclamação, PLP haree katak irregularidade oioin ne'e mosu tanba Governo ida-ne'e la sério no la iha política ne'ebé clara iha ninia processo verificação no avaliação durante processo registo ne'e.

2. IX Governo Constitucional intencionalmente no sistematicamente desvaloriza no troça veterano sira hodi compara pensão ba veterano sira tuir Lei n.º 3/2006, ne'ebé la'o ona durante tinan 18, altera tiha ho Lei n.º 3/2024 iha dia 12 de junho de 2024.

IX Governo Constitucional hatún pensão ba veterano sira ba nível ida-ne'ebé bele classifica hanesan desvalorização sistemática ka troça ba veterano sira, e, nu'udar exemplo, pensão especial ba subsistência ou participação iha funu entre 8 a 14 ba grau 1 sei hetan 120 USD, grau 2 sei hetan 100 USD no grau 3 sei hetan 85 USD. Ne'e troça ida ba ema nia dedicação no halimar tebes quando haree situação ne'e ho avião especial ne'ebé arranja hodi tula indivíduo ida foin lailais ne'e. Ho lei tuan ne'ebé existe durante tinan 18, pensão subsistência ba participação funu entre 8 a 14 mak grau 1 sei simu 345 USD, grau 2 sei simu 310,50 USD no grau 3 sei simu pensão 276 USD.

Pergunta mak ne'e: tan sá hatún pensão subsistência nian? Tan osan la iha ona? Maibé, tansá membro Governo sira goza demais e festa cada semana hodi la poupa osan husi fundo petrolífero,

maibé ba veterano sira tem que hatún sira-nia pensão? E, la iha liafuan seluk atu descreve situação ida-ne'e se la'ós ato intencional no sistemático atu desvaloriza no troça veterano sira.

3. IX Governo Constitucional lakohi veterano sira existe iha Timor-Leste.

Governo ida-ne'e hatudu katak sira lakohi veterano existe iha Timor-Leste hodi rona declaração Primeiro-Ministro Kay Rala Xanana Gusmão nian iha 16 de ... 2025 relativamente lista edital Primeiro-Ministro dehan katak nia la hatene buat ruma kona-ba lista edital ne'e, tanba nia la'ós veterano ida. Ema hotu-hotu iha Timor-Leste, inclui labarik sira ne'ebé moris iha 2000, no ema barak iha mundo hatene katak Sr. Kay Rala Xanana Gusmão mak lidera funu ne'e. Depois de base apoio rahun assume responsabilidade, no ohin sai nu'udar Comandante em Chefe das FALINTIL. Oinsá Sr. Xanana bele dehan katak nia la'ós veterano? Se ema ida ho calibre comandante em chefe la'ós veterano, então nia lakohi veterano existe iha Timor-Leste nu'udar comandante em chefe.

Sr. Xanana, atual Primeiro-Ministro, assume responsabilidade política no moral ba ninia membro sira, maibé ho declaração ida-ne'e parece Sr. Xanana lakohi veterano existe iha Timor-Leste. Nu'udar Comandante em Chefe das FALINTIL, Sr. Xanana Gusmão pelo menos buka solução ba assunto veteranos, la'ós fase liman iha assunto ida-ne'e, ne'ebé ninia Governo rasik mak cria.

4. IX Governo Constitucional, além de assunto veteranos nian, partidariza administração pública. Depois IX Governo Constitucional ukun, Governo ida-ne'e hamosu ação oioin ne'ebé iha tendência atu partidariza assunto veterano consistentemente, hanesan partidariza assunto administração pública depois hatuur iha ninia programa. E Governo ida-ne'e halo terceira alteração ba Lei n.º 3/2006, kona-ba Estatuto dos Combatentes da Libertação Nacional ou Lei n.º 3/2004, iha dia 12 de junho. Durante debate lei ne'e iha Parlamento Nacional, hanoin di'ak sira husi partido oposição nunca hetan consideração, e proposta-lei ida-ne'e mós la halo consulta ho público iha posto no suco sira, maibé concentra de'it iha nível nacional no municipal. Além de ida-ne'e, socialização husi lei ida-ne'e quase la iha, intencionalmente contribui ba descontentamento público, iha-ne'ebé potencialmente hamosu conflito entre veterano sira.

5. IX Governo Constitucional, nafatin Timor-Leste iha mapa nu'udar País ida frágil iha mundo. PLP consciente katak assunto veterano ne'e assunto nacional ida ne'ebé sério iha edificação Estado direito democrático e justiça social, direitos humanos no desenvolvimento sustentável, tan ne'e, ho política ne'ebé mukt husi IX Governo Constitucional ho esforço sistemático atu desvaloriza no apaga sistemático husi veterano sira iha Timor-Leste. Então Timor-Leste iha potência atu sobu fundamento sira importante iha edificação Estado Timor-Leste ida-ne'ebé moderno, democracia no sustentável. Ida-ne'e significa, IX Governo Constitucional hahú coloca fali Timor-Leste iha mapa husi País sira

ne'ebé constantemente frágil, e Timor-Leste sei moris iha País harmonia no democracia bainhira reconhece no valoriza didi'ak ninia combatente no mártires libertação nacional nia dedicação no sacrifício.

Mai, ita hotu contribui hodi soluciona assunto veteranos nian hodi nune'e Timor-Leste moris iha democracia, justiça, respeita direito humanos no hala'o desenvolvimento ida sustentável atu povo Timor-Leste bele soi moris-di'ak, agora no iha futuro.

Hisik kosar ba moris di'ak».

Obrigado, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, ita tama ba intervenções diversas, hahú kedas ho distinta Deputada Olinda Guterres.

Faz favor.

Sr.^a **Olinda Guterres** (KHUNTO): — Bom dia ba Sr.^a Presidente em exercício, Secretária da Mesa, técnico sira, colega Deputado e Deputada hotu-hotu, Sr. Vice-Ministro dos Assuntos Parlamentares, colega sira-ne'ebé dadeer kmanek ne'e participa iha fatin ida-ne'e.

Sr.^a Presidente, ha'u haree, ita 65 iha-ne'e ita-nia tópico mak SEATOU, estrada, estudante, professores contratados ne'ebé hasai hotu ona, no Governo ukun la di'ak. Maibé, tuir ha'u-nia hanoin, ha'u la fó apoio ba ida, ha'u fó apoio, liuliu ba Governo ne'ebé agora daudauk ne'e hala'o. Ita 65 iha-ne'e, ita bá rai li'ur, quando haree iha ema nia rai, ai-tahan ida mós la monu iha estrada, nem fa'an bua malus iha estrada no ami sira ferik mama ne'e mós la iha ida.

Ha'u bá Austrália, bá China, ha'u buka malus tahan ida atu mama la iha, tanba ema nia estrada muito limpo, limpíssimo! Tanba ne'e ha'u fó apoio ba SEATOU. Atu la di'ak mós la di'ak ba, Ita-Boot sobu ne'e ba nação, Timor-Leste tinan 10 e 20 atu tama tan tinan 30 ona, Díli laran la di'ak. Baibain ita contra beibeik dehan, estrada la di'ak, bee moos la iha, buat hotu-hotu la iha, Governo mak tem que halo desenvolvimento ba nação ida-ne'e atu nune'e nação ida-ne'e bele la'o ba oin.

Se ita critica malu, bele oposição, ha'u mós oposição quando KHUNTO iha oposição, maibé ha'u hakarak ko'alia buat ida-ne'ebé loos. Ita critica Governo, ita dehan katak ita veterano, *memang* ha'u mós ema veterana, mas tanba saida mak ha'u lakohi regista ha'u-nia an ba veterana? Sé mak la conhece ha'u? Be ha'u ne'e la'ós veterana, la conhece ha'u, foti to'ok liman!

Abílio Osório mate tiha ona, Paulo Fátima sei moris, Sico Kalbuady sei iha, sira-ne'e mak salva ha'u iha cadeia laran. Tanba ne'e, ha'u hatete ba Ita-Boot sira, ne'ebé la conhece ema, di'ak liu lalika ko'alia tanba nia la hatene saida mak acontece iha terus nia laran, saida mak halo. Ha'u-nia testemunha Vice-Presidente PD nian ne'ebá, comissão D, ha'u la'o, ha'u conhece ita sira iha-ne'e, sé mak oportunista, sé mak serbisu ba Timor, ha'u hatene, ha'u hatene! Tanba ne'e, ha'u husu ba colega

sira, ita bele sai veterano, iha ulun ida mak veterano ne'e iha. Se ulun ne'e la iha, veterano iha-ne'ebé? Ha'u ko'alia buat loos, ha'u ema idade 65 anos, ha'u la'ós idade foin moris, foin haree mundo, desenvolvimento, FRETILIN ho CNRT, imi rua ne'e tem que serbisu hamutuk.

Sr. Primeiro-Ministro, ha'u recomenda ba Ita-Boot, ema, quando critica beibeik Ita-Boot maka ha'u recomenda, ministério ne'ebé iha Ita-Boot nia okos mak serbisu la loos, Ita-Boot hasai! Governo CNRT nia ema ne'e barak, PD nia ema tama tan ba Ita-Boot sira, ema matenek la iha? Gosta para ema, ami Deputado sira, critica Ita-Boot? Ha'u la gosta! Ha'u oposiçã, ne'ebé de'it kaer ukun, ha'u tem que fó apoio ba ida-ne'ebá para hala'o desenvolvimento. Ita-nia povo mak mate, bee lori, antes mota atu lori sira, Governo hatete uluk ona, iha VIII Governo ha'u rasik tun ba hatete, «Ita-Boot sira labele halo uma besik mota-ibun, mota bele lori imi», ha'u rasik tun ba ko'alia. Maibé la rona, hakarak halo hanesan ne'e atu nune'e Governo bele *ganti rugi*, mas Governo osan iha-ne'ebé agora? Ita-Boot sira hatene, ita-nia mina agora la'o hela?

Sr.^a Presidente, ha'u triste tebes quando colega sira, ita 65 ne'e, balu ne'ebé harii partido político ho loos, balu ne'ebé harii partido la loos, balu ne'ebé hakarak hadomi, hadomi liu veterano, liuliu ba Maun Lú Olo, Maun Taur, sira ne'ebé hadomi ne'e ida ou rua, barak mak laran makerek, tanba ema ne'e veterano hotu. Presidente da República ho Primeiro-Ministro ne'e, sira na'in-hira veterano sura ho liman fuan lima ne'e, sira mate ona foin mak Ita-Boot sira ba tuur karik. Ne'ebe, ita labele hadau malu cadeira. Ita haree, hamutuk, bolu malu tuur hamutuk to'ok bá! Ita-nia Rai la la'o ba oin ne'e tanba saída? La custa buat ida. Sr. Taur, Sr. Xanana, Sr. Lere, Sr. Lú Olo, Sr. Alkatiri, tuur hamutuk ko'alia, oinsá mak la bá oin, tanba saida ema critica beibeik ita ne'e, tanba saida?...

Sr.^a Presidente fó sinal ba Deputada ne'e atu conclui intervenção.

... Ne'ebe, ha'u atu conclui agora. Educação nia ita labele critica beibeik tanba baibain ita iha-ne'e dehan aluno sira tem que bem qualificado, tem que haree ema ne'ebé hatene português mak bele hanorin labarik sira atubele sai qualificado...

Sr.^a **Presidente** (Maria Terezinha da Silva Viegas): — Muito obrigada.

Sr. Deputado balu ko'alia ba Sr. Deputada atu nia pára ona ninia intervenção.

Sr.^a **Olinda Guterres** (KHUNTO): — ... Lalika Ita-Boot sira hatete mak ha'u pára, ha'u hatete ha'u-nia an katak ha'u pára.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinta Deputada Maria Teresa Gusmão.

Faz favor.

Sr.^a **Maria Teresa da Silva Gusmão** (PD): — Obrigada.

Sr.^a Presidente em exercício, composição da Mesa, Vice-Ministro dos Assuntos Parlamentares, colegas Deputados no maluk rona-na'in sira,

Uluknanain, ha'u hakarak fó-hanoin mós ba declaração Bancada FRETILIN kona-ba mercado Baucau nian.

Hanesan Baucau oan, ha'u la aceita buat ne'ebé ohin iha declaração Bancada FRETILIN nian. Ha'u hakarak agradece ba fa'an-na'in sira iha Baucau, ho fuan tebetebes, colabora ho PAM Baucau atubele halo mudança. Ita aceita katak quando sai husi zona seguro ne'e todan tebetebes, maibé ha'u agradece tanba sira hakarak colabora, nu'udar Baucau, nu'udar cidade segundo husi Díli.

Segundo, ohin Bancada FRETILIN dehan, «mercado mamuk, estrada la di'ak, bee la iha, ema la iha atu bá sosa», ne'e la loos! Ha'u, domingo-domingo, bá compras iha mercado Baucau Kota Baru, ha'u bá ho microlete. Semana kotuk ha'u aluga de'it atu tula ha'u-nia modo bá uma, ha'u hein to'o horas ida tanba microlete ema nakonu hotu, to'o ita sees an mak la di'ak.

Loos duni katak estrada seidauk tama, alcatrão mak seidauk, foin mak aterra ho rai, ita paciência atu etapa por etapa. Iha mercado laran nakonu demais, no mercado luan tebetebes, sira ne'ebé fa'an sasán permanente halo ona uma oan iha mercado laran hodi tau sira-nia sasán, ne'e fa'an permanente iha mercado. Ida-ne'ebé quinta-feira no domingo mak mai fa'an sasán, sira sei fa'an sasán iha rai luan, ne'e ita reconhece. Microlete tama ho ema hadau malu tanba microlete la bele pára iha li'ur, tem que tama iha mercado laran hodi hatún ema nia sasán iha fatin, ne'ebe fatin ita la'o à rasca loos. Bee iha, tanba sira foti bee ne'e mak hodi halo fresco modo, hodi fase ai-fuan no modo sira atu fresco, ne'ebe, nu'udar Baucau oan, ha'u la aceita ida-ne'e. Ne'e iha Kota Lama.

Iha Kota Baru, iha Hotel Flamboyan oin, ema sei fa'an sasán uitoan, maibé sasán sobu hotu ona tanba PAM sei identifica fali mercado ida besik iha – Deputada Helena karik hatene – armazém Kota Lama iha Padre Agostinho nia uma oin, sei identifica fatin ida-ne'ebé para fa'an sasán fali iha Kota Lama, atu nune'e mercado ida iha Kota Lama mercado ida iha Kota Baru. Ida-ne'e mak realidade, ha'u hakarak dehan katak intervenção ohin ne'e la loos, la'ós realidade.

Ne'e duni, ita tem que colabora, importante katak movimento, ema nia moris la'o nafatin, la impede buat ida. Ema fa'an sasán barak liu, só comprador mak osan la iha atu ba sosa, mas sasán barak loos. Ne'e realidade tanba ha'u, domingo-domingo, sempre bá Kota Baru sosa iha-ne'ebá. Agora tempo ai-ata, semana kotuk ha'u sosa ai-ata tasak ho kulu tasak barak loos, ne'ebe labele aumenta sasán.

Rua, ha'u hakarak foti kona-ba dia 17 de janeiro de 2025, equipa AIFAESA ho CLN halo estragos koto 95 t e fore-rai 10 t iha lixeira Liquiçá nian, hamutuk 105 t koto ho fore-rai. Perguntas ba CLN no AIFAESA: AIFAESA nia *level* estragos oinsá mak balada sira mós la bele han koto ne'ebé *expired* ka estragos ona ne'e? *Level*, ninia aat oinsá, que animal mós la bele han? Tanba ha'u hatene hahán animal nian mak hahán estragos, dodok sira-ne'e. Se koto ne'e ita la bele fó ba animal han ne'e ninia *level* estragos ne'e oinsá, AIFAESA tem que explica ba ita, Governo, liuhosi CLN (Centro de Logística Nacional) ho AIFAESA (Autoridade de Inspeção e Fiscalização da Atividade Económica, Sanitária e Alimentar) bele explica ba ita, tanba ami ladún hatene, tanba koto ne'e ita bele fó han fahi, ita bá te'in tiha, animal bele han. Se animal la bele han mós ita halo processo fermentação, nune'e nakfilak ba adubo orgânico, bele tau ba modo, ai-fuan sira, ai-horis sira ne'ebé ita kuda. Ne'e ha'u-nia compreensão.

Tolu, husu to'ok CLN nia «manajemento» armazém, antecipação no prevenção *stock-out* oinsá mak bele acontece estragos ho toneladas boot ba sunu de'it iha Lixeira Tibar ne'ebá?...

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Sr.^a **Maria Teresa da Silva Gusmão** (PD): — ... Di'ak.

Atu aumenta tan, mas, mak ne'e de'it.

Obrigada barak.

Sr.^a **Presidente** (Maria Terezinha da Silva Viegas): — Inscrição barak hela.

Tuirmai, distinto Deputado Domingos Augusto «Deker».

Faz favor.

Sr. **Domingos Augusto «Deker»** (CNRT): — Obrigado ba oportunidade.

Ha'u-nia respeito ba Excelência Presidente do Parlamento Nacional em exercício, componente da Mesa, distinto no distinto Deputado sira, Excelência Vice-Ministro dos Assuntos Parlamentares ne'ebé marca presença, bom dia ba ita hotu.

Iha dadeer ida-ne'e atu aproveita halo clarificação ruma liga ba preocupações maihusi timoroan sira kona-ba lista segundo registo 2009 nian ne'ebé taka-sai.

Primeiro, ha'u atu clarifica ba público katak resultado lista ne'ebé taka ne'e la perfeito. Compreende katak manifestações, lamentações barak husi timoroan sira, husi terus-na'in sira, kona-ba lista ne'ebé tuir loloos sira mós naran aprovado, maibé hakarak explica katak natureza verificação ne'e rasik, tuir guião ne'ebé sai husi Ministério para os Assuntos dos Veteranos, iha processo verificação la fó oportunidade, la fó direito ba verificador sira ka responsável sira atu halo recomendação tuir sira-nia

hakarak, informa de'it mak cidadão ida-idak nia realidade, participação no contribuição ba luta e ikusmai sistema mak sei halo contagem. Ne'e mak razão. Tanba ne'e, resultado lista taka-sai ne'ebé contrário, ema desconhecido mak hetan fali dedicação, enquanto terus-na'in sira-nia naran la mosu hodi hetan dedicação iha-ne'ebá, ne'e la'ós halo husi responsável sira. Balu mosu duni iha-ne'ebá que loos, ne'ebé bele hetan reconhecimento tuir sira-nia realidade, mas barakliu ne'e ha'u considera falsificação. Tanba ne'e mak taka lista sai, Ministério para os Assuntos dos Veteranos fó oportunidade ba cidadão hotu-hotu loron 60. Loron 60 ne'e, primeiro, atu contesta no reclama dados sira, contesta dados falso sira e reclama ita-nia dados ka ita-nia participação ne'ebé, tuir loloos, tem que hetan reconhecimento. Ne'ebe tempo loron 60 ne'e atu halo buat rua ne'e.

Kona-ba reconhecimento, bainhira ita ko'alia kona-ba reconhecimento, ha'u atu clarifica katak timoroan ida-idak nia realidade mak sei determina ninia direito. Maluk sira, ha'u repete dala ida tan, labele haluha katak timoroan ida-idak ninia realidade mak sei determina ninia direito, la *borong* processo, la'ós tanba timoroan ida iha direito, maibé tem que lori, ra'ut karuk loos, hotu-hotu tem que ba hetan hotu direito ne'ebé tuir loloos la tuir ninia realidade.

Terceiro, ko'alia kona-ba realidade, iha mós lamentação iha-ne'ebá liga ba idade, ha'u atu hateten katak quando ita ko'alia realidade, idade la'ós fator ida atu impede no halo lakon timoroan ida nia direito real, ne'ebe maluk sira, dala ida tan ha'u atu hateten ida-ne'e. Tanba ne'e husu ba timoroan sira tomak buka a par an ho explicação husi Excelência Presidente do CCLN (Conselho dos Combatentes da Libertação Nacional), Sr. Riak Leman, nian no explicação ne'ebé kle'an liu no claro liu husi Sua Excelência Ministro para os Assuntos dos Veteranos. Explicação claro mak ne'e, ita buka a par an no hakbessik an ba estrutura base hodi bele hatene processo, oinsá atu contesta dados falso ruma e oinsá mak atu promove timoroan ida nia direito baseia ba ninia realidade. Loron 60 atu halo buat rua ne'e, dala ida tan.

E ikusliu, ha'u discorda uitoan ho declaração ne'ebé hato'o hosi PLP. Buat seluk ha'u la ko'alia iha-ne'e, mas atu informa de'it ba público katak – ba veterano sira liuliu – ita halo duni alteração ba Estatuto Combatentes ba Libertação Nacional iha ponto balu, maibé la hatún valor pensão veteranos nian nem *sen* ida. Dala ida tan ha'u hato'o ba público katak ha'u discorda ho declaração ida-ne'ebé dehan katak Governo hatún pensão veteranos nian. Ne'e la loos! Dala ida tan ha'u dehan, la loos!

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinta Deputada Maria Angelina Sarmento.

Faz favor.

Sr.^a **Maria Angelina Lopes Sarmento** (PLP): — Muito obrigada, Sr.^a Presidente em exercício.

Bom dia ba Ita-Boot, composição da Mesa, distintas no distintos Deputados no mós Sr. Vice-Ministro dos Assuntos Parlamentares no povo doben Timor-Leste.

Iha intervenção ida-ne'e ha'u hakarak apoia declaração Bancada FRETILIN nian sobre evicção forçada e ida-ne'e claro tebes violação ba direitos humanos. Acontecimento evicção forçada ne'e tentativa sistemática hasoru povo ki'ik no kiak, e, se ita usa fuan karik, ita haree ne'e desumana duni. Maibé, ita usa raciocínio interesse partidária nian, nune'e ita-nia timoroan sira-ne'ebé hetan consequência física no psicológica husi evicção sira ita finge la rona no la sente.

Critério sira kona-ba evicção ne'e, hanesan ha'u declara ona iha semana kotuk, ita, nu'udar país membro husi ONU, opta ona ba Pacto internacional kona-ba direito económico, social no cultural sira, ida-ne'e nu'udar parte ida husi ita-nia lei, agora ita ignora tiha.

Segundo, faz face à Lei n.º 8/2017, sobre expropriação, iha preâmbulo husi lei ne'e considera kedas convenção internacional sira-ne'ebé ita ratifica hodi integra mós iha lei ne'e, mak hanesan Declaração Universal ba Direitos Humanos, Pacto internacional kona-ba direito económico, social, no cultural, no CEDAW (*Convention on the Elimination of All Forms of Discrimination Against Women* ka Convenção Contra Forma Violação no Discriminação Oioin Hasoru Feto), nune'e mak ami ko'alia beibeik katak SEATOU nia atuação ne'e claramente la kaer ba lei sira-ne'e no convenção internacional sira.

Ita-Boot sira ko'alia defende malu, maibé ha'u husu imi loke to'ok lei hodi lê, saida mak hakerek iha artigo 3.º sobre admissibilidades das expropriações, iha-ne'ebá dehan, tem que iha pagamento de justa indemnização.

Sr. Ministro, Ita-Boot sira kaer mós lei ne'e hodi discute iha Conselho de Ministros, SEATOU viola artigo sira ne'ebé hakerek iha lei ne'e. Ha'u menciona kedas para Deputado sira mós favor loke lei ne'e hodi haree. Imi dehan SEATOU atua baseia ba lei, então lei ne'ebé nia viola, ne'ebé produz iha tempo CNRT mak kaer ukun, ne'ebé PLP mós seidauk iha assento iha tempo ne'ebá, lei ne'e mak Lei n.º 8/2017, ne'ebé publica iha abril 2017. Artigo sira ne'ebé nia viola mak artigo 10.º, Dever de respeito pelos grupos vulneráveis; artigo 18.º, 19.º, 20.º, 21.º Estudo de impacto social e plano de realojamento, 22.º, 24.º, 25.º, ne'ebe Ita-Boot sira loke to'ok lei ne'e mak mai debate fali. Ami tun ba fiscaliza mak descobre katak afinal quando oposição levanta iha terça, Plenária, quarta mak SEATOU foin hanoin atu assegura ema ba fatin seguro...

Haklalak husi Deputado sira husi bancada Governo nian.

... e nune'e ita merece tun duni fó-hanoin ba nia. Maibé, agradece tanba Na'i Presidente da República lori ona Senhor ne'e bá Ministério Público. E ida-ne'e contribui hela ba história ida katak primeira vez iha história Timor-Leste nian, Presidente ida lori duni membro Governo ida ba atuação

sira ne'ebé, hanesan Chefe de Estado, hanesan mós humano, contra mós ninia consciência, ninia consciência mós acusa.

Segundo, ha'u apoia declaração política Bancada PLP nian. Totalmente desastre boot, dados veteranos nian. Ita haree de'it iha mídia social, veterano sira, por exemplo, hanesan iha Ermera, veterano Dudu hamutuk ho veterano sira hotu iha Ermera halo declaração hotu, decide atu la simu resultado edital ne'ebé fó-sai ona, até aban-bainrua Governo fó pensão mós sira sei la simu ida-ne'e. E caso barak, foti de'it Ermera nian rasik, por exemplo, iha ema ne'ebé uluk fó informação ba inimigo hodi bele captura ema sira ne'ebé faz parte ka integra iha núcleo resistência nian, sira ne'e mak agora hetan fali 8 a 14.

Iha facto seluk mak, iha Bobonaro iha veterano ida, agora nia polícia ativo iha hela Kupang ne'ebá, Indonésia, NTT ne'ebá, uluk *Kepala Desa*, to'o Indonésia hakat ain husi Timor mak nia foin fila ba Indonésia ne'ebá, maibé agora nia hetan dedicação 20 a 24. Ne'e wow demais mak ne'e.

Obrigada.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, iha ponto de ordem ida, mas iha inscrição mós barak. Se atu invoca Regimento, ha'u fó um minuto ba distinto Deputado José Virgílio.

Faz favor.

Sr. **José Virgílio R. Ferreira** (CNRT): — Obrigado ba tempo.

Convoca Regimento, ha'u hakarak hato'o de'it, ohin Deputada Angelina hatete katak lei ho convenção sira-ne'e, ita kaer tiha hotu lei sira-ne'e, ita haree hela, e povo ne'e bá hela iha mota laran, ne'e ita labele bá hasai ka? E povo bá hela iha espaço público ne'e ita labele bá hasai ka? Governo hasai ne'e, Governo hasai! Ha'u mós acompanha hela e Governo tula ita-nia povo sira bá município sira-ne'e, bá sira-nia hela-fatin, administrador posto no município sira simu hela, simu di'ak hela, Deputado sira. Ne'ebe Ita-Boot sira lalika politiza...

Protesto husi Deputado sira husi bancada oposição.

... hanesan horisehik dehan ne'e, bá toba, bá toba ho povo iha mota laran ne'ebá ne'e, bá toba povo iha Bebonuk ne'ebá ne'e! Ne'e mak dehan Deputada, Deputado...

Hakilar husi Deputado sira husi bancada oposição.

... Uluk ami bá toba, ami bá defende tanba uluk imi oho povo ne'e, ne'e ami bá defende ne'e, Deputada! Agora mak Ita-Boot sira mai ko'alia dehan katak Governo ida-ne'e, be...

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Sr. **José Virgílio R. Ferreira** (CNRT): — ... Governo halo tuir nia programa, nia orçamento.

Sr.^a **Presidente** (Maria Terezinha da Silva Viegas): — Muito obrigada, distinto Deputado, um minuto.

Ha'u atu informa de'it, anuncia de'it, katak ha'u la simu ona inscrição porque aqui temos 29 inscritos. Maibé atu continua, ha'u fó lai ponto de ordem rua.

Ba distinto Deputado Augusto Deker, faz favor.

Sr. **Domingos Augusto «Deker»** (CNRT): — Obrigado ba oportunidade.

Atu clarifica lais de'it ba distinta Deputada Maria Angelina nia preocupação.

Distinta Deputada, atu ható'o ba Ita-Boot katak lista ne'e seidauk perfeito, a não ser tama ona iha edital. Quando tama, liu tiha 60 dias, tama tiha ona ba edital, ne'e mak labele book. Maibé, ne'e de'it mós, karik identifica falsificação, sei iha oportunidade ba timoroan sira atu contesta. Ne'e la perfeito, ne'ebe, 60 dias ne'e oportunidade ba ita hotu atu haree ida-ne'e.

Obrigado.

Sr.^a **Presidente** (Maria Terezinha da Silva Viegas): — Muito obrigada.

Ikusliu ba ponto de ordem, faz favor distinta Deputada Maria Angelina Sarmento.

Sr.^a **Maria Angelina Lopes Sarmento** (PLP): — Sr.^a Presidente, ha'u atu dehan katak afinal ohin Ita-Boot sira declara, Ita-Boot sira bá toba. Ami tun bá haree de'it ne'e dehan sala, Ita-Boot sira toba ne'e loos fali ka? Oh, afinal Ita-Boot sira mós bá toba, toba kedas, mas ami bá minuto ida de'it hodi hasee ne'e imi dehan sala tiha ona...

Protesto husi Deputado sira husi bancada Governo nian.

... Ah, afinal.

Segundo, kona-ba lista veteranos, ita tem que ko'alia duni tanba população sira la hatene atu invoca processo hodi halo reclamação baseia ba artigo 18.º husi Lei Estatuto dos Veteranos. Artigo 18.º, ko'alia kona-ba recurso, reclamação contra registo iha loron 60, tanba ne'e mak ita tem que ko'alia

para ita mós encoraja sira ba hadi'a dados ne'e, selae ema la hatene. Ne'ebe, ha'u atu dehan afinal Ita-Boot sira bá toba ne'e di'ak hela, ida bá hamriik de'it ko'alia ne'e sala boot e problema fali...

Protesto husi Deputado sira husi bancada Governo nian.

...Afinal imi halo hela.

Sr.^a **Presidente** (Maria Terezinha da Silva Viegas): — Muito obrigada.

Iha tan ponto de ordem, mas ha'u la fó tanba iha inscrição iha-ne'e, tanba ne'e mak ha'u continua inscrição.

A seguir, distinto Deputado Virgílio Pereira.

Se faz favor.

Sr. **Virgílio Pereira** (CNRT): — Di'ak, obrigado ba biban.

Ha'u-nia respeito ba Presidente interina, composição da Mesa e colega distinta e distinto Deputado sira hotu, Excelência Vice-Ministro dos Assuntos Parlamentares, dadeer di'ak ba ita hotu.

Di'ak, iha dadeer-saan kmanek ida-ne'e, iha ha'u-nia intervenção, primeiro, ha'u hakarak haree filafali ba assunto estrada, liuliu iha área Díli laran.

Husu ba Ministro das Obras Públicas atubele tau matan ba estrada ida direção Bairro Pité ba Ailok-Laran, ne'e grave tebes, liu tiha fali dalan ida ami bá Bagia nia *tangan di atas ne'e*. Ne'ebe favor ida, iha Díli laran ne'e parece que Bairro Pité mak precisa atu tau atenção urgente.

Segundo, hakarak usa oportunidade ida-ne'e hato'o ba S. Ex.^a Ministro do Ensino Superior atubele halo coordenação ho Universidade Nacional Timor Lorosa'e para ba futuro bele loke mós filial UNTL ne'e iha cada região, atu nune'e bele evita cada ano estudante sira husi município ne'e tun mai Díli. Se ita la haree ba assunto ida-ne'e maka cada tinan parece que estudante hotu-hotu hakarak concentra iha Díli, no fim balu bá hela to'o iha mota laran sira-ne'e, e ikusmai ita mak, iha Parlamento ne'e, han malu. Tanba ne'e sugere hela ba Ministro assunto ida-ne'e.

Ba fali evicção, colega sira, ha'u hanoin, Ita-Boot sira, favor ida haree filafali ba fulan rua, fulan tolu bá kotuk – ha'u apoia tebes Sr. Secretário-Geral FRETILIN – Avô Mari mós fó apoio tebes ba serbisu SEATOU nian bainhira sobu ou halo evicção iha Pantai Kelapa Mercado Comoro nia sorin ne'e, ne'e Avô Mari mós fó apoio. E, quando avô Mari fó apoio, Deputado sira iha-ne'e ida mós la ko'alia, mas, quando iha fali fatin seluk, ita Deputado sira hakilar. Mas, ida-ne'e mak programa Governo nian, e Governo iha duni obrigação atu halo nia serbisu. Germano ne'e buat ketak ida, mas Secretário de Estado ne'e nia halo ninia serbisu baseia mós ba lei, ne'ebé uluk VIII Governo duni mak prepara, ne'ebe, Sr. Germano bá hanesan Secretário de Estado, executa de'it lei ne'e. Nia sala ne'e iha-

ne'ebé? E comunidade husi fatin hotu-hotu lori hotu bá cada município mós la iha questão ida, mas agora ita mak questiona maka'as loos.

Ba filafali acontecimento ida iha rotunda Baucau, ne'ebé ohin foti liuhusi declaração FRETILIN nian, ne'e la loos! La'ós força mak dada e la'ós funcionário mak dada, mas inan sira iha mercado ne'e mak hodi sira-nia modo tuda tun tuda sa'e. E, iha mós jovem balu mak consegue atu halo contra ataque hasoru equipa gestão mercado, ne'e mak polícia atua, ne'e mak iha. Mas, dehan fali força ho polícia mak dada fali inan-feton sira, ha'u hanoin, ne'e la loos. Ita-Boot sira bele acompanha iha mídia, e quase semana hirak liubá ne'e, iha vídeo ne'e claro tebes, iha-ne'ebá ne'e la iha força ida mak rakut inan-feton iha momento ne'ebá. Ne'ebe favor ida, ita, quando ko'alia ne'e haree para depois ita labele, ha'u empresta ha'u-nia primo ou ha'u-nia colega Deputado Sinarai nia liafuan ida karik, halo *pembodohan publik* ne'e acontece beibeik.

Ha'u hanoin, ida-ne'e mak ha'u hatu'o, Presidente.

Obrigado.

Sr.^a **Presidente** (Maria Terezinha da Silva Viegas): — Muito obrigada.

Infelizmente iha ponto de ordem rua.

Deputada Nurima, se faz favor.

Um minuto!

Sr.^a **Nurima Ribeiro Alkatiri** (FRETILIN): — Muito obrigada, Sr.^a Presidente.

Ha'u atu clarifica tanba Sr. Deputado Virgílio Pereira ko'alia arbiru de'it. Ha'u-nia aman, momento ne'ebá, la bá hanesan Secretário-Geral FRETILIN, bá hanesan privado, bá haree ami-nia rai iha Pantai Kelapa no ami-nia uma ne'ebé harii iha Pantai Kelapa mak Sr. Secretário de Estado Germano...

Murmúrio husi Deputado sira husi CNRT.

... Hei, nonook tiha!...

Hotu-hotu hamnasa.

... Sr. Secretário de Estado Germano mós bá Pantai Kelapa atu haree área balu iha Pantai Kelapa mak sira hasoru malu por coincidência, e la'o hamutuk. Husi ha'u-nia aman rasik la iha apoio, – Secretário-Geral FRETILIN – la iha apoio husi FRETILIN atu halo atuação desumana contra direitos humanos hanesan CNRT halo agora daudauk, ho apoio PD nian. Ida-ne'e mak realidade.

Obrigada.

Sr.^a **Presidente** (Maria Terezinha da Silva Viegas): — Muito obrigada.

Mais um ponto de ordem.

Deputado Gabriel, se faz favor.

Sr. **Gabriel Soares** (CNRT): — Obrigado, Presidente.

Ha'u foti ha'u-nia ponto de ordem ne'e atu hatete de'it katak ita 65 ne'e mesak ema político. Tuir ha'u-nia observação ne'e povo coopera, político sira politiza; povo compreende, político sira má compreensão; povo husu recuperação, político sira desmente. Parabéns ba povo! Povo Timor-Leste matenek tebetebes.

Ha'u atu hatete de'it katak *DPR* sira-ne'e nia apelido maka SEATOU ho evicção. Ha'u mós acompanha, ha'u-nia colega sira bá iha Fomento II ne'e bá ko'alia ho ha'u-nia primo ida, ha'u-nia maluk ida husi Aubeon, Natarbora, nia código «perdido». Nia hatete ba ha'u iha semana kotuk iha Natarbora: «Maun ha'u mós bá sosa sala tiha rai. Tanba oan sira bá escola, ha'u bá sosa tiha husi ema ida hetan *ganti rugi* tiha ona, ha'u bá sosa fali, e bá loos iha mota laran. Ne'ebe ha'u *stress* loos».

Senhor ne'e, ha'u bele fó kedas nia naran, naran Raimundo «Perdido», Natarbora. Maun Toi Bianco mak ne'ebá, bá ko'alia loos ho ha'u-nia primo ne'e, nia *stress* atu mate tanba *kecewa*, nia bá sosa leet tiha rai ne'e iha mota laran Fomento II. Hakarak justifica, ita bá Aubeon semana agora!

Sr.^a **Presidente** (Maria Terezinha da Silva Viegas): — Muito obrigada.

Tuirmai, distinta Deputada Lúdia Norberta.

Se faz favor.

Sr.^a **Lúdia Norberta dos Santos Martins** (FRETILIN): — Obrigada, Sr.^a Presidente.

Bom dia ba Ita, ba composição Mesa, Vice-Ministro, Deputado sira no maluk rona-na'in sira hotu.

Em primeiro lugar, hakarak apoia declaração Bancada FRETILIN nian relaciona ho evicção.

Bancada FRETILIN, hanesan partido ida-ne'ebé histórico, sempre pró ba desenvolvimento, maibé la pró ba hahalok ne'ebé hanesan hahalok vandalismo hasoru nia povo. Ida-ne'e mak Bancada FRETILIN contra.

E, quando ko'alia kona-ba tratamento digno ne'ebé iha ba vítima sira, loos duni, só quando oposição tun mak SEATOU foin hakfodak, hodi nune'e buka carreta hodi tula bá foho. Ne'e realidade. Atu A ka B, mas ne'e realidade...

Hamnasa husi Deputado sira husi CNRT.

... Depois bá C fali, tanba A no B tiha ona to, agora bá C. Bá C fali mak ne'e, kona-ba indemnização mós hotu, sorte FRETILIN ho PLP ko'alia ne'e maka SEATOU mós hanoin indemnização, selae la iha ida...

Murmúrio husi CNRT.

...Ne'ebe ida-ne'e loos. Ne'e C. Agora, hakarak bá to'o Z tan ka? Ba Z tan mak ne'e: Hospital Nacional Guido Valadares (HNGV), saúde bá sunu ai-moruk barak, mas agora daudauk, quando vítima sira-ne'e, karik mak acontece sira moras, Ita-Boot sira haree atu bá tau iha-ne'ebé? Satán agora Hospital Guido Valadares nakonu, agora usa Lahane. Ne'e primeiro.

Em segundo lugar, atu informa mós iha-ne'e katak ami simu lamentação ida husi Município Bobonaro relaciona ho tratamento ne'ebé Direção Municipal Educação Bobonaro halo iha setor de educação. Ami haree katak setor educação ne'e importante tebetebes, hodi nune'e bele forma ita-nia oan sira bele sai ema ida di'ak, cidadão ida di'ak, nune'e bele desenvolve ita-nia Rain. Maibé, husi buat ne'ebé ami haree acontece iha Município Bobonaro preocupante tebetebes, tanba sira husi direção municipal hatete katak «halo mudança ou transferência ba professores no funcionários administrativos tanba de'it reorganização administrativa», maibé buat ne'ebé ami nota la iha, ida-ne'e hanesan fali instrumento ba retaliação hasoru profissional sira-ne'ebé la iha afiliação ba partido ida-ne'ebé ukun. Realidade ne'e hatudu liuhusi transferência professor ida husi escola técnica vocacional Malibaka, iha Maliana, transferência mós ba professor na'in-rua husi Escola Secundária Geral Dom Martinho Lopes – iha Maliana nafatin – no transferência professor husi Ensino Básico Central Nunutana bá Escola Secundária Balibó.

Além de ne'e, ita mós nota, iha funcionário administrativo barak ne'ebé direção educação municipal tau iha posto administrativo sem justificação ida. Prática ida-ne'e ita haree hanesan prática ida injusta tanba fó prejuízo ba bom funcionamento instituição educativa.

Sr.^a Presidente em exercício, ami haree katak buat ne'ebé acontece iha Município Bobonaro acontece mós iha município sira seluk, ida-ne'ebé hatudu katak sistema governativo ida-ne'e ita haree hanesan iha interesse ida-ne'ebé ladún loos. E gestão ida hanesan ne'e ignora tebetebes qualidade ensino-aprendizagem no estabilidade iha comunidade escolar, hodi nune'e tau prejuízo ba qualidade educação no futuro alin estudante sira-nian. Ho ida-ne'e mak professor sira-ne'e, husi situação ne'ebé iha, husu ba Ministério da Educação, liuliu ba Sr.^a Ministra da Educação, atubele esclarece didi'ak ba público, sá critério de'it mak usa hodi halo transferência, hodi nune'e bele assegura duni transparência no hasai tiha ou evita tiha motivo político sira seluk. Husu mós ba autoridade Município Bobonaro atu, se bele karik, halakon tiha prática abusiva sira-ne'e tanba prática sira-ne'e mak interrompe uso sistema educativo hanesan instrumento perseguição política.

Ita hare katak Ministério da Educação, liuliu husi IX Governo, buka atu halo buat hotu, transferência ne'ebé iha, maibé afinal de contas transferência sira-ne'ebé halo ne'e halo tanba motivo sira seluk. Ne'ebe ami hein katak ita la bele contribui ba educação atubele sai fatin ida-ne'ebé, bele dehan karik, la seguro fali ba ita-nia oan sira atubele naran sá...

Ha'u hanoin, mak ne'e deit, ha'u-nia intervenção.

Obrigada, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinto Deputado Adolfo Martins.

Se faz favor.

Sr. **Adolfo Martins** (PLP): — Obrigado, Sr.^a Presidente.

Bom dia ba Mesa do Parlamento Nacional, ba colega Deputado no Deputada sira, S. Ex.^a Vice-Ministro dos Assuntos Parlamentares, mídia no povo do ben Timor-Leste.

Primeiro, hakarak sekunda declaração política Partido Libertação Popular nian, ne'ebé liga ho lista edital ne'ebé foin daudauk taka e hamosu reação barak husi ita-nia maluk sira-ne'ebé contribui uitoan ka barak luta ba independência ida-ne'e. Atu hatete de'it katak iha verificação de dados ba 2003 ho 2009 ne'e iha diferença uitoan, ne'e ha'u hakarak declara iha-ne'e.

Iha 2003, wainhira Governo hakarak halo verificação ba dados 2003 nian ne'e, ita manual de'it, mas depois iha 2009 nian ne'e ita usa ona *elektronik*. Maibé pronto, verificação dados ba 2003 nian ne'e ha'u la precisa ko'alia, mas hakarak foti de'it iha 2009 nian.

Ha'u hanoin, Deputado Deker mós iha-ne'e, hanesan representante Município Ermera mai iha nacional, e ha'u atu hakarak hatete de'it katak momento ne'ebá regras ne'ebé CCLN socializa tun bá iha base para halo verificação ba dados 2009 nian ne'e, iha-ne'ebá hatete, wainhira, depois de ema ida-idak bá preenche ona formulário ida-ne'e, bá verificação dados ne'e, tuir uitoan ka barak buat ne'ebé nia luta ba Rai ida-ne'e, iha-ne'ebá ne'e quando ema ida-idak preenche ona, ninia dados ne'e hatama kedas ba computador, depois bá kedas iha *data base*, *data base* depois loke kedas através de *power point*, tiro kedas ba iha didin-lolon ne'ebá, Comissão lê kedas, lê iha kedas ema nia oin, depois husu kedas ba audiência sira hotu, ba assembleia iha momento ne'ebé participa: «Hotu-hotu concorda ka lae? Dados ne'e loos ka lae? Hotu-hotu dehan loos, *ok*, taka!». Maibé, se dehan la loos, balu hakarak protesta, bele foti liman! Maibé iha-ne'ebá, momento ne'e, balu ne'ebé regista, iha verificação dados nia tama iha 8 a 14, tuir ninia contribuição uitoan ka barak ba Rai ida-ne'e nia independência ne'e, e nune'e mós ba 4 a 7, depois de hatama tiha ba computador, ba tiha iha *power point*, tiro tiha ba oin, lê tiha hotu, husu ba ema hotu-hotu concorda, la iha protesto, depois nia dados ne'e chave ona, hatama ba sistema chave ho 8 a 14. Maibé, nia problema ida mak ne'e, depois chave tiha ho 8 a 14, lista edital

ne'e sai bá taka, resultado ida 8 a 14 ne'e tun fali ba 4 a 7, ba fali menos 3. Pergunta mak ida ne'e: se dados ne'e ita hatama tiha ona, ema ida la book, nia bele book an iha laran? Ne'e pergunta.

Ha'u la hatene, keta *elektronik* ida-ne'e oin-seluk karik, ita hatama tiha buat ida, mas ita la book, nia book an rasik...

Deputado sira hamnasa.

...Depois, iha momento ne'ebá mós, antes atu chave dados ne'e, Comissão husu kedan: «Se Ita-Boot concorda ona ho ida-ne'e, Ita-Boot hasai kedas foto, depois halo declaração: “Ha'u rasik sei la contesta no sei la reclama tan iha loron ikus, baseia ba dados ne'ebé ha'u fó tiha ona”». Então, iha momento ne'ebá chave tiha ona, mas ikusmai mosu fali hanesan ohin ne'e, 8 a 14 halai fali ba menos 3, bá fali ou 4 a 7, ne'ebe ha'u la hatene, dados ne'e book an rasik ne'e mai husi ne'ebé karik. Eh, keta computador ida Ita-Boot sira usa ne'e mak nia sistema ne'e Ita-Boot sira *format* tiha iha laran be tau tau 8 a 14 mós nia book an ba 4 a 7 ou sei menos ba 3 anos?

E ha'u hatete buat ida-ne'e tanba momento verificação de dados iha 2003 ne'e ha'u mós hola parte iha Comissão hodi hakerek ema hotu-hotu nian, e ha'u entende uitoan buat ida-ne'e. E agora ha'u hakarak hatete, iha CCLN Nacional ne'e representante município ida-idak ne'e mai hotu iha-ne'e. Ne'e através de conferência municipal nian, CCLN municipal hili representante ida-idak mai tuur iha municipal nian hodi bele haree dados cada município nian. Então, se por exemplo, município hotu-hotu sala barak, hanesan Baucau, Ermera ho município sira seluk ne'ebé dados sala barak ne'e, pergunta ida mak ne'e: sira lubuk ida be delegação husi município mai tuur iha CCLN nacional ne'e, sai hanesan funcionário para depois fulan-fulan simu osan atu haree ema nia dados ne'e, sira-nia responsabilidade mak ida-ne'ebé? Ha'u fiar katak momento CCLN atu taka mós sira Ermera-oan ne'ebé representa Ermera para mai haree dados dados Ermera nian ne'e, se buat ruma la loos sira sempre ko'alia lai, hatete atubele hadi'a, maibé ha'u la hatene, tanba saida mak nia tem que sai hanesan ne'e.

Agora, reclamação 60 dias ne'ebé agora Governo fó ne'e iha buat rua, mas, ha'u hakarak hatete de'it, se Governo atu haruka halo reclamação para dados ema ida-idak nian tuir ninia contribuição, ne'e pelo contrário ho lei ne'ebé momento iha 2009 usa hodi halo verificação ne'e. Mas, se reclamação ba dados 2003 nian, ne'e bele, tan momento ne'ebá ita sei usa manual, tan, hanesan ohin ha'u hatete tiha ona, se ita halo tan reclamação, então momento ne'ebá hatete tiha ona, na'in rasik, quando concorda ona ho duração ida-ne'e, tama ona ba sistema, chave ona, e nia rasik sei la reclama tan iha loron ikus. Mas, agora pelo contrário, Governo haruka declara filafali.

Tuirmai, ha'u hakarak hatete tan...

Sr.^a **Presidente** (Maria Terezinha da Silva Viegas): — Por favor, conclui!

Sr. **Adolfo Martins** (PLP): — ... Sr.^a Presidente, uitoan tan de'it.

Ha'u agora agradece ba ha'u-nia colega Agio tanba durante ne'e husi Bancada CNRT sempre critica oposiçãu sira, dehan: «buka antena, bá tun mesmo que eleiçãu sei dook», mas afinal, ha'u-nia colega Agio ne'e ha'u agradece ba nia tan nia ko'alia buat ne'ebé honesto.

Sira bá toba iha-ne'ebá, hein to'o depois de eleiçãu sira manán, hetan cadeira 31 compara ho ami lubuk ida-ne'e...

Murmúrio husi Deputado sira husi CNRT.

Sr.^a **Presidente** (Maria Terezinha da Silva Viegas): — Muito obrigada.
Desculpa, distinto Deputado.

Sr. **Adolfo Martins** (PLP): — ... Ida tan, ha'u hakarak hatete kona-ba *statement* ida husi Deputado ida ohin hatete dehan Dr. Mari Alkatiri...

Presidente desliga Sr. Deputado ne'e nia microfone.

Sr.^a **Presidente** (Maria Terezinha da Silva Viegas): — Tuirmai, iha ponto de ordem rua.
Deputado David Dias «Mandati», se faz favor, ponto de ordem.

Sr. **David Dias Ximenes «Mandati»** (FRETILIN): — Obrigado, Presidente.
Bom dia ba maluk sira.

Ha'u ko'alia uitoan de'it kona-ba buat ida be ohin loron sai polémica boot, kona-ba lista veterano sira-nian. Ha'u hein tiha ona katak buat ne'e atu acontece duni hanesan ne'e, tan foun keda ha'u dehan katak ita-nia resistênciá ou ita-nia funu ne'e organizado e estruturado.

Uluk ita aproveita duni organizaçãu ho estrutura ne'e para depois ita mobiliza. Depois de funu hotu, manán tiha, quando ha'u ko'alia kona-ba organizaçãu ou estrutura, ema lakohi. O que é que veio a suceder? Cada um ia lá fazer o seu registo, e depois, não querem saber de nada onde é que está a organizaçãu. Então, sucedeu isto tudo, manipulaçãu. Uns que não foram presos, hoje dizem que foram presos, uns que nunca levaram tareias, hoje dizem que levam tareias. Isto tudo porquê? Ita-Boot sira tem que haree!

Desculpa, Presidente, ida be organizaçãu, Comité Executivo ou Comité Executivo da Luta da Frente Clandestina Cúpula ne'e mak hasai to'o ODIR (Órgão Diretivo Regional). CNRT ohin loron

aproveita nafatin de'it Comité Executivo da Zona, Núcleo de Resistência Popular, SELCOM. Vocês imaginam, porque é que fizeram isto? Para alguma intenção!

Muito obrigado.

Sr.^a **Presidente** (Maria Terezinha da Silva Viegas): — Muito obrigado, distinto Deputado.

Tuirmai, Deputado Domingos Augusto «Deker», ponto de ordem. Um minuto!

Se faz favor.

Sr. **Domingos Augusto «Deker»** (CNRT): — Desculpa, ha'u husu três minutos. Defesa de honra e aproveita atu clarifica buat ruma ba distinto Deputado Adolfo.

Sr.^a **Presidente** (Maria Terezinha da Silva Viegas): — Não, distinto Deputado! Um minuto.

Se faz favor.

Sr. **Domingos Augusto «Deker»** (CNRT): — Obrigado.

Atu repete dala ida tan katak buat hotu la perfeito. Tanba saida mak momento verificação iha Ermera, ha'u hatete, Ita-Boot bele clarifica iha Ermera, katak Comandante ida «Deker» ne'e monu ba iha falsificação ka lae. Ha'u cumpre guião. Iha território nacional ne'e hotu-hotu hatene, ha'u cumpre guião, e ha'u hatete ba combatente sira katak ha'u mai atu foti de'it ema ida-idak nia realidade ne'ebé contribui no fó ba luta ukun rasik an. Agora, direito atu formula sai oinsá ne'e Ita-Boot sira-nia dados ne'e mak orsida sei determina, la'ós «Deker» mak determina.

Tanba ne'e mak, distinto Deputado, Ita-Boot rasik mós buka compreende lai no tem que compreende, dala ida tan, tempo 60 dias ne'e atu halo saida. Ida ne'e mak importante.

Obrigado.

Sr.^a **Presidente** (Maria Terezinha da Silva Viegas): — Muito obrigado, distinto Deputado.

Tuirmai, distinto Deputado José Virgílio.

Ponto de ordem, um minuto.

Sr. **José Virgílio R. Ferreira** (CNRT): — Dala ida tan ha'u mós hakarak hato'o ba ha'u-nia colega Deputado Adolfo.

Iha momento ida-ne'ebá ne'e, situação ida ami bá toba ne'e ne'e ami repõe ordem constitucional tanba iha assalto poder...

Hamnasa husi FRETILIN no PLP.

... Iha assalto poder e Governo iha momento ne'ebá ne'e Governo ilegal, Governo de facto...

Protesto husi bancada oposiçõ.

...E ami bá toba duni, defende, tanba povo hetan susar iha-ne'ebá ne'e, imi dun povo ne'e mak ami bá defende, ami la buka votos. Maibé iha eleiçã ne'e povo mak decide, la'ós ha'u mak bá decide dehan: «povo ó tuu lai», povo mak decide ami ne'e. Ita-Boot sira mós povo hili mak ohin loron Ita-Boot sira-nia cadeira tun tiha lima ne'e, ne'e povo mak hili...

Múrmurio husi Deputado sira husi bancada oposiçã.

... Hanesan Deputado, hanesan responsabilidade, momento ne'ebá ami bá toba duni, toba defende povo. La hanesan, situaçã ida uluk ho agora ne'e. Agora ne'e Governo halo tuir duni ninia programa, iha plano, orçamento tau, e linha ministerial sira iha coordenaçã para halo atuaçã hodi lori povo ne'e bá hatuur iha nia fatin.

Mak ne'e de'it.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Ha'u la fó ona ponto de ordem tanba sei iha vinte e tal Deputados inscritos.

Tuirmai, distinta Deputada Maria Anabela Sávio.

Se faz favor.

Sr.^a **Maria Anabela Sávio** (FRETILIN): — Obrigado ba tempo, e bom dia ba Presidente em exercício, composiçã da Mesa, colegas distintos Deputados, Sr. Vice-Ministro, audiência no povo rona-na'in tomak.

Excelências,

Uluknanain, ha'u hakarak fó apoio ba declaraçã política Bancada PLP no FRETILIN nian, ne'ebé levanta kona-ba SEATOU nia serbisu, liuhusi evicçã, haterus povo Maubere sai fali bainaka iha nia Rain rasik.

Ita hotu sente ka lae, tempo Natal no Tinan Foun iha tinan ida ou rua liubá compara ho tinan 2024 nian? Ita observa, povo barak mak iha situaçã tristeza nia laran, liuliu sira-ne'ebé hetan evicçã husi IX Governo ida-ne'e. Sira atu hanoin hahán mak la iha ka, oan sira-nia escola ka hanoin lakon sira-nia hela-fatin no seluk tan.

Excelências,

Ita-nia povo sira-ne'e sente lakon ona esperança ba sira-nia futuro tanba nia Estado rasik mak halo açã assassinato ba nia povo rasik, halo evicçã ho forçada. Povo ida-ne'e atu sadere ba sé loos?

Tanba saida mak IX Governo ida-ne'e la trata povo ho digno, maibé haree nia povo liu fali colonialista sira-nia hahalok?

Sr. Vice-Ministro, povo lori imi bá fatin digno, maibé imi tau fali sira bá fatin lixo. Hatene ka lae, sira-ne'ebé hetan evicção husi imi, agora sira-nia paradeiro iha-ne'ebé?

Sr. Vice-Ministro, ha'u hakarak husu: uma hira ona mak hetan evicção no hetan ona compensação? Hakarak ka lakohi tem que selu sira-nia uma tanba osan povo nian tem que fila ba nia na'in.

Haree ba kotuk, FRETILIN sempre hamutuk ho povo Maubere hodi luta ba ukun rasik an tanba lakohi ema sama dignidade povo Maubere nian. Maibé, ikus-ikus ne'e IX Governo Constitucional mak pratica fali hahalok ne'ebé colonialista sira halo ba povo Maubere, liuhusi evicção ne'ebé Sr. Primeiro-Ministro, hanesan Chefe Governo, orienta liuhusi SEATOU, halo ba povo Maubere ne'e rasik.

Povo Maubere no Buibere sira hotu, FRETILIN sempre iha hanoin di'ak ba nia povo, tanba ne'e FRETILIN organiza povo tomak hodi luta hasoru colonialista, hodi defende Rai ida-ne'e no lakohi ema sama dignidade povo nian. FRETILIN mak hatene liu povo nia terus no susar, tanba ne'e FRETILIN sempre defende povo nia luta, halakon kiak no mukit ne'ebé nia povo hasoru.

Sr. Vice-Ministro, iha tempo campanha, CNRT nunca mais ko'alia kona-ba evicção, iha mak kadoras, auditoria no seluk tan. Deputado balu dehan, «povo hili CNRT manán iha 2023, kadoras tem que mai ona iha 2025». Tebes ka lae? Keta la consegue ona no programa sai hamoos Díli, aliás evicção ne'e karik, ka halo nu'usá?

Sr. Vice-Ministro, ha'u acompanha evicção no mídia, comunidade iha Fomento II, sira balu hetan entrevista dehan katak sira sei mata-bicho hela, de repente chefe aldeia sira mai haruka sira arruma sasán husik hela sira-nia fatin.

Ha'u desconfia, keta evicção ida-ne'e hanesan *pengalihan isu* ou desvia husi situação ida ba situação seluk, tanba, antes ne'e ação ema desconhecido ida tiro ex-Presidente Dr. Lú Olo nia residência...

Haklalak husi CNRT.

... No ha'u hakarak hatene, ação ida-ne'e nia processo agora to'o iha-ne'ebé ona? Posição ami FRETILIN nian mak ami pró ba desenvolvimento, maibé hahalok ne'ebé SEATOU implementa mak ladún loos.

Ita haree evicção ne'ebé halo, pelo menos prepara condição ba ita-nia povo, hodi nune'e povo sira mós sente contente ba desenvolvimento ida-ne'e.

Sr. Vice-Ministro, Ita-Boot sira sempre dehan, «SEATOU nia serbisu ne'e baseia ba lei, tanba lei mak fó dalan», maibé parte Governo mós tem que esclarece ou socializa Lei n.º 13/2017, de 5 de

junho, Regime Especial para a Definição da Titularidade dos Bens Imóveis. Lei ida-ne'e buka clarificação jurídica kona-ba na'in ba rai no halo efetivo dimensão oioin direito propriedade privado nian, ne'ebé prevê ona iha artigo 54.º n.º 1, Constituição RDTL.

Obrigado ba ita hotu nia atenção.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinta Deputada Cedelízia Faria dos Santos.

Faz favor.

Sr.^a **Cedelízia Faria dos Santos** (CNRT): — Muito obrigada, Sr.^a Presidente em exercício, atual Vice-Presidente do Parlamento Nacional.

Hau-nia respeito ba Ita-Boot, composição da Mesa, distintos Deputados, Excelência Vice-Ministro dos Assuntos Parlamentares, audiência, mídia, maluk rona-na'in Rádio Parlamento Nacional, povo do ben Timor-Leste, ha'u fiar katak sintoniza hela ita.

Uluknanain, ha'u hakarak fó ha'u-nia apreciação ba serbisu Diretora Executiva AIFAESA, Dr.^a Odete Viegas, ho nia equipa tomak, ne'ebé tutela iha Primeiro Vice-Primeiro-Ministro dos Assuntos Económicos nia okos, ba serbisu di'ak sira-ne'ebé sira começa hala'o ona iha fatin-fatin, ha'u aprecia ba ida-ne'e, hanesan feto ida-ne'ebé serbisu ativo tebetebes.

Maibé ha'u hakarak fó-hanoin mós katak iha loja barak ne'ebé ita sosa sasán, laós loja boot de'it, loja ki'ikoan natoon chinesa sira-nian iha ita-nia vizinho, ita-nia uma sorin sira-ne'e, fa'an sasán produto sira hanesan manu-tolun, sosis no na'an-manu feito sira-ne'e, ho condição barak mak la di'ak. Manu-tolun sira-ne'e ita sosa *rak* ida karik quase barak mak estraga hotu, hela ida-rua de'it mak di'ak. Ne'ebe ha'u husu hela ba AIFAESA, se bele karik, labele haree de'it ba loja boboot sira-ne'e, maibé bele tama mós iha loja ki'ikoan, natoon, loja *medium* sira iha população nia leet sira-ne'e, hodi haree ba assunto ida-ne'e.

No ha'u mós husu ba AIFAESA, liuliu ba Ministério do Comércio e Indústria, atu tau atenção ba loja sira-ne'ebé la tau *struck* folin iha sasán sira-ne'e. Ó bá husu mak nia dehan: «1 USD, 2 USD, 10 USD», hatún ka hasa'e conforme sira-nia hakarak. Ne'ebe ita iha Excelência Vice-Ministro, husu ba Ministro do Comércio e Indústria ne'e, ha'u apoia sira-nia programa ida halo *pameran* ne'e, maibé se bele mós haree, tau atenção ba ida-ne'e atu protege ita, comprador sira, nia direito.

Tuirmai, ha'u hakarak secunda declaração Deputado «Deker» nian kona-ba assunto veterano, ha'u apoia 100%, lei fó dalan ita 60 dias. Se ita hakarak taka de'it karik, ita hakarak subar de'it, ita selu de'it ona. Ne'e mak ita preocupa. 60 dias ne'e, usa oportunidade ida-ne'e para halo queixa se iha buat ruma ita la concorda, labele bá fali iha kotuk haruka halo filafali *press conference*.

E ha'u rona beibeik declaração política sira ko'alia kona-ba assunto evicção, halo ha'u atu dehan katak Deputado sira-ne'e, karik la tun liu bá base hodi haree preocupação povo sira-nian ne'ebé barak hela karik, la'ós mak ita loroloron ko'alia mak evicção, explica ba explica, mas la compreende hela nafatin de'it ne'e. Ita-nia ema sira-ne'e bá tiha ona município, bá tuur hakmatek tiha ona ne'ebá, agora ita mai ko'alia mak evicção, lori mak deficiente, lori mak feto, lori mak labarik, Ita-Boot sira nu'usá la bele ko'alia mós ba mane sira hanesan aman? Hanesan aman mós iha responsabilidade, lori nia família labele bá hela fali iha mota laran. Agora ita mai mak feto labarik, feto labarik, ami feto mós, ha'u husu favor ida, lalika monu ba laço político sira para ema usa de'it ita feto sira sai alvo político hodi assalta fali programa ne'ebé di'ak.

E ha'u mós acompanha, pela primeira vez, Ita-Boot sira ohin ko'alia, dehan Presidente da República lori Secretário de Estado bá queixa iha Tribunal, ha'u concorda, Presidente iha direito. Ha'u husu mós, se bele karik, Presidente lori mós ró Haksolok, avião ZEESM...

Hakilar husi Deputado sira husi bancada oposição.

... lori mós ponte Bekasi, ne'ebé fó prejuízo ba orçamento do Estado ne'e, osan boot ne'e, ne'e ha'u concorda, ne'e lori nafatin bá. Ha'u apoia nafatin SEATOU.

E ko'alia kona-ba toba hodi defende povo ne'e, ha'u hanoin, ne'e la'ós buat foun ida, mundo ne'e acompanha hela, bá toba hodi defende. Be imi, Governo ai-tonka sira, lori buldózer bá hakoi ema iha Metinaro ne'ebá ne'e, imi trata ema hanesan animal ne'e? Ne'e mak realidade hanesan Deputado Agio hatete ne'e, ikus povo tem que fó duni fiar ba PD ho CNRT hodi kaer ukun. Ita-Boot sira calma de'it, hein to'o 2028, Ita-Boot sira manán eleição – e ha'u fiar la manán ida – ...

Deputado sira husi bancada oposição hamnasa.

... ne'e mak Ita-Boot sira bá lori ema bá hela iha mota laran, lori ema bá hela iha estrada klaran, ne'e wainhira Ita-Boot sira halo programa mai iha-ne'e, mai aprova, depois executa.

Ikusliu, ha'u hamnasa fali Deputado dehan, sira bá mak SEATOU foin lori ema, foin halo indemnização, *emangnya* Governo harii SEATOU ne'e tanba imi bá ne'e ka? Governo tau osan, mai aprova, hodi executa programa tanba imi bá ne'e ka? Pára ona assalta poder bá! Ha'u hanoin katak depois de lakon eleição, Ita-Boot sira la assalta poder ona. Tanba Ita-Boot sira bá tiha dehan fali programa ne'e imi-nian fali ne'e, imi mak bá hasai fali povo ne'e, ne'e ita considera nafatin hanesan assalta poder. Tanba ne'e Programa IX Governo nian, nia iha direito tomak, povo fó fiar ba nia atu lidera Nação ida-ne'e, atu tau nia povo moris di'ak, ho digno, la'ós tanba Ita-Boot sira bá istori malu

mak programa ne'e la'o. Ne'e komik mak ne'e. Ne'ebe, ha'u husu ita halo *introspeksi* ba ita-nia an rasik, lalika halo *pembodohan publik*, *apalagi pembohongan publik*.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, iha ponto de ordem husi Deputado David Dias «Mandati».

Se faz favor, um minuto!

Sr. **David Dias Ximenes «Mandati»** (FRETILIN): — Obrigado, Presidente.

Ha'u atu dehan de'it katak la iha assalto de poder. Se iha assalto de poder, lori bá Tribunal, Tribunal decide! La iha assalto de poder! Ita-Boot sira lê didi'ak...

Protesto husi Deputado balu husi bancada Governo nian.

... Lalika hu ha, quando ita la hatene husu ema be hatene. La hatene!

Haree to'ok didi'ak buat ida ita-nia Regimento ne'e, artigo ida Ita-Boot sira tau para hasai Vicente Guterres ne'e iha-ne'ebá hela, iha-ne'ebá didi'ak hela, iha hela...

Múrmurio husi CNRT.

... lalika ida! Ita, quando la hatene, às vezes ita lakohi discute, mas pronto, às vezes precisa esclarecimento.

Segundo, la condena evicção, condena formas de evicção, ninia método ne'e. Ita-nia ema dehan katak lori fila ona bá foho ne'ebá, di'ak, iha-ne'ebá la di'ak mak sira tun mai ne'e, iha-ne'ebá moris la di'ak. Iha-ne'ebá kedas dehan: «Oh, imi Ermera sira, Atsabe sira lakohi hela iha foho be haree café, imi hakarak mai hotu fali iha-ne'e». Estrada la di'ak, be oinsá ita-nia produto sira-ne'e atu mai? Ne'ebe ita hotu-hotu hamutuk be atu hadi'a buat sira-ne'e. Labele hanesan ne'e!

Muito obrigado.

Sr.^a **Presidente** (Maria Terezinha da Silva Viegas): — A seguir, ponto de ordem, distinta Deputada Lúcia Norberta.

Se faz favor.

Sr.^a **Lúcia Norberta dos Santos Martins** (FRETILIN): — Sim, secunda ohin Deputado «Mandati» dehan ne'e. Deputado Agio ohin dehan katak assalto poder, tribunal natoon decide tiha ona ne'e nu'usá

Ita-Boot la contesta? Ita-Boot sira gosta contra mak buat ida decisão tribunal nian ne'e, ne'e toman tiha ona.

Segundo, kona-ba Secretário de Estado da Toponímia, Sr.^a Deputada ohin ko'alia ne'e ha'u duni mak ko'alia kona-ba indemnização. Ami mak ko'alia duni mak hodi naran sá... ne'e, tanba saida Sr. Secretário de Estado quando halo, nia tun ba ne'e nia halo...

Protesto husi CNRT.

... agora, Sr.^a Deputada, Ita-Boot Presidente Comissão C, Ita-Boot hatete lai, Orçamento 2025 ita debate ne'e osan indemnização ne'e iha ka lae? Ne'e imi halo plano la tuir lei ne'e mak ne'e ka.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, um ponto de ordem, distinto Deputado Adolfo Martins.

Se faz favor.

Sr. **Adolfo Martins** (PLP): — Obrigado, Presidente.

Ohin atu hatete de'it, horisehik iha declaração CNRT ne'e hatete katak horibainhira Deputado sira tun bá iha fatin evicção ne'e bá hala'o fali serbisu Governo nian, maibé atu hatete de'it, hanesan representante povo ne'e nia serbisu mak ida-ne'e duni. Se ita representante povo mak povo ida hasoru situação mukt loos hanesan ne'e, ita labele tun bá, ne'e oinsá? Wainhira ita tun bá, hatete fali dehan ne'e ita bá hala'o serbisu Governo nian, ha'u hanoin, *statement* sira-ne'e hotu hanesan hakarak alivia de'it ema seluk nia hanoin karik.

Ha'u concorda ha'u-nia maun Agio ohin dehan daudauk ne'e: «hadomi povo ne'e bá toba duni» – ami bá haree de'it – bá toba hanesan sira toba ne'e duni, bá toba hanesan ne'e duni.

Depois, ha'u mós hakarak hatete, sira-ne'ebé dehan, «Dr. Mari Alkatiri apoia SEATOU ne'e», rona didi'ak Mari Alkatiri nia liafuan ne'e, entende didi'ak! Labele halo especulação, mas tem que ser usa ita-nia kakutak ne'e para compreende ema nia liafuan ne'e hatete saida. Selae ita naran mai ko'alia de'it dehan: «Aih, Dr. Mari mós apoia, ne'ebe imi FRETILIN lalika ko'alia». Se Dr. Mari apoia, FRETILIN cada semana mai halo declaração política ne'e para halo saida?

Obrigado, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada.

A seguir, ponto de ordem, distinta Deputada Maria Angelina Sarmento.

Se faz favor.

Sr.^a **Maria Angelina Lopes Sarmento** (PLP): — Obrigada, Sr.^a Presidente.

Ha'u hanoin, se ita hakarak ko'alia loloos ne'e, hanesan legislador, ita arranca husi haree ba lei sira lai. Lei sira be ohin ha'u invoca iha-ne'e ne'e sé mak hatán mai ha'u dehan lei ne'e sala? Lei ne'e, artigo sira-ne'ebé ohin ha'u invoca iha-ne'e ne'e SEATOU halo hela. Ita-Boot sira kaer to'ok lei ne'e mak debate filafali mai bá! Be justa indemnização ne'e acontece ka? Ema hela iha mota laran ne'e pelo menos ita mós buka hatene situação social, económica ema nian ne'e, tanba saida mak obriga ema to'o hela iha mota laran. Tinan 10 resin ne'e ema nia economia ne'e só bele produz husi aterro rai-henek ne'e, aterro rai-henek ne'e mak foin bele hetan pão fuan ida loron ida ne'e, *sedangkan* osan ita foti husi fundo petrolífero ne'e bilhões de dólares, maibé ita seidauk consegue halo exportação produto ruma ne'ebé ita foti husi osan fundo petrolífero, ne'ebe obriga ema tem que hela iha mota laran. Então ita tem que mós buka factos ka buka hatene causa social ho económica saida mak povo ne'e enfrenta hodi obriga ema mai hela iha mota laran.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, ponto de ordem, distinta Deputada Cedelízia Faria dos Santos.

Se faz favor.

Sr.^a **Cedelízia Faria dos Santos** (CNRT): — Muito obrigada, Presidente.

Ha'u ko'alia iha-ne'e, Tribunal la decide ida, la baku martelo decide, Tribunal indefere.

Assalta poder ne'e ha'u mós Secretária-Geral iha-ne'e, be hotu-hotu lori buat sabraut mai hadau malu, tuku malu iha-ne'e, povo la acompanha ida ka?...

Murmúrio husi bancada oposição.

... Ita bá bosok beibeik halo saida? Ida-ne'e mak realidade, resultado mak povo decide ne'e. Ne'e sala ka?...

Bancada oposição murmura nafatin.

...Agora dehan tau orçamento, Ita-Boot sira iha lata ko'alia kona-ba orçamento, imi vota contra hela de'it ne'e? Claro, orçamento tau iha PAM Díli hodi halo indemnização. Agora, mai mak dehan orçamento, orçamento, orçamento.

Ha'u acompanha iha mídia, desculpa, Sr. ex-Primeiro-Ministro, Dr. Mari Alkatiri, ha'u la analisa halo nu'usá, maibé mídia tau katak Excelência ex-Primeiro-Ministro apoia serbisu SEATOU nian. Atu bá fali iha ne'ebé-ne'ebé, ha'u la acompanha, ha'u acompanha iha mídia. Ita bele bá loke fali mídia.

Ne'ebe ita ko'alia buat sira-ne'e loloos bá! *Omong putih kasih tahu lurus* ka, hanesan Deputado Antoninho Bianco ko'alia ne'e. Ne'ebe indemnização ne'e halo hela ne'e. Foin daudauk iha mota ne'e tanba mota atu bá sobu ne'e ita tem que bá salva ema nia vida. Situação ne'e trata la hanesan, ita compreende, ne'e ka? Ko'alia sasán ne'e loloos bá!

Obrigada.

Sr.^a **Presidente** (Maria Terezinha da Silva Viegas): — Tuirmai, intervenção, distinto Deputado Armando dos Santos.

Se favor favor.

Sr. **Armando dos Santos Lopes** (PD): — Di'ak, obrigado ba tempo.

Ba Sr.^a Presidente do Parlamento Nacional em exercício e composição da Mesa, ba S. Ex.^a Sr. Vice-Ministro dos Assuntos Parlamentares, ohin dadeer, molok atu mai, ha'u sente ksolok tebes tanba ha'u-nia manu kakatua sira iha uma hakilar ba malu.

E, ohin ha'u bele continua ha'u-nia intervenção horisehik nian katak tempo to'o ona ita husu ba Governo atu facilita passaporte ba ita-nia população, ba ita-nia juventude sira no ita-nia estudante sira iha município; no mós tempo to'o ona ita precisa atu facilita carta condução original ba motorista sira ne'ebé iha município; tempo to'o ona ita precisa cria condição ba SERVE, I.P (Serviço de Registo e Verificação Empresarial, Instituto Público) atu facilita licença ba negócio ki'ik ba povo sira iha município; no mós tempo to'o ona IX Governo mai ho nia espírito ne'ebé bolu dehan «*salus populi suprema lex*» ka *bahasa melayu* dehan katak *keselamatan manusia adalah hukum yang tertinggi*; tempo to'o ona mós atu ami husu ba Governo atu halo ordenamento território iha município, precisa taka ona placa sira ba rai Estado ka uma Estado ne'ebé povo sira hela; tempo to'o ona ita tem que projeta lei kona-ba licença construção uma privado sira iha município atu nune'e Governo bele antecipa no bele controla fatin risco sira iha-ne'ebé ita labele husik ita-nia ema sira atu hela ka halo construção iha município, e, área protegida no área ne'ebé comum Estado bele halo buat ruma ka implementa programa ba moris ba povo hotu-hotu.

Sr. Vice-Ministro, horisehik instituição hirak ne'ebé ha'u hato'o, ha'u hanoin, ita hotu-hotu hatene, katak cada fulan e cada loron sira contribui osan ba cofre Estado. Portanto, ida-ne'e mak povo merece husu nia *feedback* atu atende sira-nia preocupação iha município, hodi ida-ne'e sira mós sente katak contribuição hirak-ne'e fó ba cofre Estado iha duni folin no halo sira sente satisfeito, no hatudu ba povo katak IX Governo hahú concentra lori administração pública bá besik povo, hadomi povo liuhosi atendimento ida-ne'ebé di'ak.

E horisehik balu questiona kona-ba qualidade de educação no infraestrutura educativa ba IX Governo ida-ne'e, maluk sira, ko'alia kona-ba qualidade educação la'ós buat ida-ne'ebé fácil ita bele

atinge iha seis meses ou um ano, ita precisa leva tempo e por fase, depende ba sustentabilidade política Governo nian husi Governo ida ba Governo seluk.

Karik VIII Governo durante cinco anos de mandato resolve ona fatores currículo, recursos humanos, facilidades, estudantes, ambiente ida-ne'ebé seguro no confortável, gestão ba educação, avaliação, participação comunidade, inovação no desenvolvimento, fator hirak ne'ebé determina lori educação Timor-Leste ba qualidade? Ita hotu ko'alia, buat hotu ne'ebé ita apresenta ne'e midar duni, maibé realidade ha'u bele dehan katak mamuk iha ita-nia mandato.

Maluk Deputado sira, iha terreno, resultado fiscalização Comissão G nian hatudu katak construção sala de aula VIII Governo hahú iha 2022, iha fulan-março no abril quase barak mai finaliza iha 2023 iha fim do ano, leva um ano.

Ba maluk Deputado sira V Legislatura no ex-Membro Governo VIII Governo nian ne'ebé ha'u respeita, buat ne'ebé ami descobre através de fiscalização Comissão G nian ha'u hanoin katak to'o ona, e admira uitoan kona-ba projeto reabilitação sala de aula balu iha município ka iha capital Díli. Tuir *BoQ (Bill of Quantities)*, aloca orçamento ba sala neen, maibé iha terreno hela de'it balu, sala ida ha'u bele dehan katak ha'u la hatene osan ne'e tama ba bolso sé nian. Mas, ne'e pior liu mak – ba ha'u, sente ladún satisfeito – lori placa ho Primeiro-Ministro VIII Governo nia naran ho nia assinatura ba inauguração iha território tomak no mós iha município Lautém no iha município Díli, liuliu ba fatin ne'ebé ohin ha'u hatete...

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Sr. **Armando dos Santos Lopes** (PD): — ... Ida-ne'e mak ha'u sente ladún di'ak.

E obrigado ba tempo.

Sr.^a **Presidente** (Maria Terezinha da Silva Viegas): — A seguir, distinta Deputada Sância Paixão Bano.

Se faz favor.

Sr.^a **Sância Florência Paixão Bano** (FRETILIN): — Obrigada ba tempo.

S. Ex.^a Presidente do Parlamento Nacional em exercício, maluk Deputado sira, Sr. Vice-Ministro dos Assuntos Parlamentares, povo do ben Maubere no Buibere sira, bom dia.

Excelência, atu secunda tan declaração Bancada FRETILIN nian, no apoia tebes declaração sira seluk ne'ebé ohin colega Deputado sira ko'alia, katak política ordenamento IX Governo ba evicção forçada iha Díli laran ne'e sacrifica tebes povo kbiit-laek sira, estraga povo nia hela-fatin no la cria duni condição ne'ebé iha.

Comunidade sira husi 12 municípios, inclui RAEOA (Região Administrativa Especial de Oe-Cusse), mai hela iha Díli tanba economia uma-kain exige atu buka moris iha Díli, atu hadi'a duni economia iha sira-nia uma-kain rasik, hodi nune'e bele fó escola ba oan sira, no Governo estraga ida-ne'e hanesan mahon ba família ne'ebé husi foho no continua estudo sira iha Díli, liuliu ba jovem sira, serbisu SEATOU sobu estraga ne'e foin-sa'e sira lamenta tebes ho assunto refere.

Iha abril tinan 2023 liubá, iha Bekusi-Kraik hetan evicção, maibé Sr. Xanana, hanesan atual Primeiro-Ministro, ba defende uma-kain hitu ne'e. Tuir loloos evicção ne'e contra maka'as, ne'ebé Conselho Superior Magistratura Judicial nian ne'e hatete ona no iha ona decisão, maibé ikus hatete fali katak: «ukun ne'e ukun ba povo, povo mak kiak sira-ne'e», maibé nafatin Sr. Xanana nia ukun mak sobu, estraga uma atus ba atus iha Díli laran.

Sr. Vice-Ministro, ha'u hakarak continua tan ho ida-ne'e husu ha'u-nia pedido clarificação iha tinan kotuk kona-ba construção hotel andar ualu ne'ebé harii iha jardim Lifau entre Aeroporto Internacional Rota do Sândalo. Agora daudaun informação ne'ebé ha'u simu katak companhia chinesa ne'ebé kaer projeto ne'e harahun no sobu cemitério hamutuk 13. Projeto ne'e – iha orientação husi Presidente da Autoridade, Sr. Rogério Tiago Lobato – iha área Suco Lifau, Posto Sica, husi lia-na'in sira lamenta tebetebes ho ação refere, no sira husu atu hapara construção ne'e, liuliu besik capela ne'e, tanba sobu hetan mate-ruin hamutuk 13.

Sr. Vice-Ministro, favor ida, kona-ba assunto ne'e bele clarifica ho autoridade RAEOA. Ita hotu hatene katak ita Lei n.º 13/2017, de 5 de junho, Regime Especial para a Definição da Titularidade dos Bens Imóveis, artigo 8.º Bens do domínio público do Estado, ponto 3. alínea m), Cemitério público e Jardim dos Heróis, favor, Sr. Vice-Ministro, bele haree ida-ne'e, tanba ita hotu hatene katak Oe-Cusse lai mak 12 municípios iha. Se la iha Oe-Cusse, então município seluk la iha. Ida-ne'e ita hotu hatene katak foun ha'u halo pedido clarificação, maibé construção ne'e continua hala'o.

Favor, Sr. Vice-Ministro, bele haree kona-ba assunto ida-ne'e.

Obrigada barak.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinto Deputado Florentino Ximenes «Sinarai».

Se faz favor.

Sr **Florentino Ximenes da Costa «Sinarai»** (FRETILIN) — Excelência Presidente do Parlamento Nacional em exercício, componente da Mesa, distintos Deputados, Vice-Ministro dos Assuntos Parlamentares, mídia nacional sira hotu, povo do Timor-Leste, camarada Buibere no Maubere sira hotu.

Sr. Vice-Ministro, ha'u husu lailais Ita-Boot nia tempo atu atento didi'ak tanba, Sr. Vice-Ministro, depois de lista veteranos taka-sai husi Ministério para os Assuntos dos Combatentes da Libertação Nacional iha dia 15 de janeiro liubá, hamosu kedas polémica iha público no hamosu kedas reação oioin husi público ne'e rasik.

Ema balu mós dehan veterano *asli* sira-ne'e mak hahoris no hamosu mós veterano falso sira, hodi nune'e ema hamosu argumentos oioin, balu dehan hatama feen ho oan no sobrinha, sobrinho sira, atu sai hotu tiha veteranos, Sr. Vice-Ministro.

Hanesan representante povo, ha'u mós duvida tebes ho lista ne'ebé taka-sai ona ne'e. Exemplo ki'ik ida, atu fó-hanoin ba Sr. Vice-Ministro katak Senhora ida naran Olandina Caeiro, ema hotu hatene senhora ida-ne'e, nia participação iha luta ema hotu hatene katak senhora ida-ne'e inimigo sira mak viola ninia direito mós hanesan feto ida. Maibé, ha'u hakfodak tebetebes tanba Sr.^a Olandina Caeiro hetan de'it mak 0 a 3, Sr. Vice-Ministro.

Nune'e mós ho Sr. Luís da Costa, primo husi Sr. Xanana Gusmão rasik, ne'ebé desterra ba Ataúro ho tinan naruk tebes, maibé hetan de'it 0 a 3, Sr. Vice-Ministro, tanba ne'e ha'u husu atento.

Ho razão hirak-ne'e husu ba Ministro para os Assuntos dos Combatentes da Libertação Nacional, Sr. Gil «Oan Soru», atu halo controlo ba sistema registo ne'e rasik.

Husu mós ba Comissão Anti-Corrupção ka parte relevante sira seluk atu halo auditoria ba funcionário sira-ne'ebé toma conta ba sistema, tanba sistema ne'e assessor sira tuur iha-ne'ebá muda sai conforme sira-nia hakarak. Quando sira hetan *persen*, então ema sira-ne'e, tuir informação, sira mós iha direito ba 8 a 14. Aat liután, ema sira-ne'e la bá tan ai-laran, mas sira mós hetan 15 a 19. Ha'u husu atu halo *audit* ba funcionário sira-ne'e, Sr. Vice-Ministro.

Atu aproveita tempo ida-ne'e ha'u mós hakarak atu dehan, Sr. Vice-Ministro, see hela tilun ba iha Escola 4 de Setembro Díli nian, favor ida, tanba fenómeno boot ida mosu hela iha-ne'ebá, ema hasai ona professor 25 pessoas. Sr. Vice-Ministro, favor ida Ita-Boot sai husi ne'e karik bá kedan Escola 4 de Setembro ne'e, porque situação ne'ebá grave ba ita-nia oan sira atu halo aprendizagem.

Ha'u mós hakarak atu aproveita tempo ida-ne'e atu dehan ba ita hotu, distinto Deputado sira, katak ha'u tasak ona ho liafuan ameaça, porque iha ano oitenta e tal ha'u bá Atauro, sa'e, bapa sira hatete hanesan ne'e: «*Hoi, Anak kecil, diamlah kamu! Hoi, anak GPK (Gerakan Pengacau Keamanan) FRETILIN, diamlah kamu, jika kamu macam-macam, kami membuang kamu ke dalam air laut, biarlah dimakan ikan*», ha'u tasak ona, tebes!

Iha 1998, quando ha'u hakarak atu bá resolve problema ita-nia jovem da resistência ida nian, *milisi* Agostinho, hanesan *milisi* nia boot ida iha Loes ne'ebá, *Besi Merah Putih* nia boot, see tiha kilat hatama ba ha'u-nia kelen leet hodi dehan hanesan ne'e: «*Anak kecil, untuk apa kau datang berbicara kepada kami? Dia sudah mati karena dia ingin merdeka*». Ha'u dehan: «Ita-Boot ameaça sala».

Maibé, horisehik ha'u hakfodak tebes, ameaça boot ida iha Parlamento Nacional dehan ba ha'u, di'ak liu ha'u tem que cuidado. Hoi, Sr. Deputado, *jagalah mulut kamu yang berbisa, jagalah mulut kamu yang hina itu, sebab ó-nia mulut hina ne'e la pantas* atu temi ha'u-nia naran, porque *anda hanyalah seorang bekas narapidana yang seharusnya minta untuk diampuni*.

Obrigado barak.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinta Deputada Maria Rosa da Câmara «Bisoi».

Se faz favor.

Sr.^a **Maria Rosa da Câmara «Bisoi»** (CNRT): — Obrigada ba tempo.

Bom dia, Presidente, Vice-Ministro dos Assuntos Parlamentares, colegas Deputados no rona-na'in sira hotu.

Ohin ne'e ha'u ko'alia ponto ida ne'ebé Vice-Ministro tem que iha atenção to'ok kona-ba questão ne'e, dalan ida iha terminal Becora ba Paróquia Bedois nian iha escola no clínica iha-ne'ebá, maibé tempo udan ne'e sai tiha hanesan fali natar tanba tahu maka'as. Escola la'o mós labarik sira tem que ho uniforme, mas tahu ne'e la fó dalan duni, hanesan mós ema ne'ebé serbisu, ne'ebe atenção to'ok kona-ba questão ida-ne'e, tem que tau emergência ida to'ok atu normaliza tiha dalan ne'ebá bá, selae susar uitoan, iha paróquia ho comunidade nia movimento iha-ne'ebá husi loron to'o kalan, mas quando tempo udan liu la di'ak duni. Ne'e primeiro.

Segundo, atu ko'alia nafatin, kona-ba tempo udan ida agora daudauk ne'e susuk barak loos, husu to'ok ba Saúde atu rega susuk ne'e, ai-moruk ne'e iha karik bele normaliza to'ok iha uma sira ne'ebé risco. Tanba iha hospital mós deteta katak iha dengue lubuk ida mak tama iha-ne'ebá, ne'ebe susuk ida hanesan ne'ebá ne'e tem que rega to'ok ho ai-moruk ruma atu previne susuk iha tempo udan.

Terceiro, atu ko'alia kona-ba combatentes da libertação, hanesan ohin colega Deputado sira ko'alia, ha'u hakarak atu temi liu kona-ba Sr. Deputado «Kamarudin». Ita-Boot simu ka la simu, ha'u la iha questão ida kona-ba Ita-Boot atu simu ha'u-nia ideia, la simu mós *urusan*, iha-ne'ebá la muda pensão ida, Deputado, nunca se muda *lima cent*. Ita hakarak ko'alia loloos, combatentes ne'ebé iha grau 3 ne'e nia simu 276 USD, ko'a fali ba fundos ne'e buat ketak ida. Mas combatentes ida agora daudaun verifica ne'e mós nafatin ho lei ida-ne'e, lei ne'e kan vigora tiha ona.

Combatente ida-ne'ebé mate, grau 3, ha'u ko'alia kona-ba ki'ik, nia simu 230 USD ne'e lei ne'e la muda ida, de repente de'it taka lista muda mós ho lei ne'e, ne'e possível?

Deputado, ita Deputado tem que haree kona-ba buat ida Estatuto dos Combatentes da Libertação Nacional, ida-ne'e mak prevalece, haree husi Lei ne'e! Ko'alia de'it ne'e ladún di'ak.

Hakarak ko'alia katak ohin dehan Governo Xanana nian mak hanesan ne'e, sim, Governo Xanana nian mak iha II Legislatura cumpre duni Constituição da República ne'e. Iha artigo 11.º definição kona-ba combatentes da libertação nacional, nia duni mak Presidente da República, cria duni tuir lei ne'ebé nia cumpre para registo kona-ba combatentes da libertação atubele hetan ninia prestação ne'ebé definitivo.

Ne'ebe ohin simu osan ne'e ida-ne'ebé agora daudauk taka lista ne'e, lei ne'e husi Constituição da República iha artigo 11.º mak hatete. Mas, sé mak cumpre ida-ne'e foi Xanana nia ukun mak cumpre duni lei ida-ne'e.

Kona-ba terceira idade, terceira idade ne'e Constituição da República ko'alia iha artigo 20.º, mas, sé mak cumpre ida-ne'e Xanana nia ukun mak cumpre ida-ne'e. Ne'ebe, Deputado sira iha-ne'e la aceita ne'e *urusan*, imi-nia problema.

Ko'alia kona-ba SEATOU, ha'u hakarak ko'alia hanesan ne'e: loroloron ita rona mak ida-ne'e, sei sobu Becora ne'ebá ita sei rona aat liu ida-ne'e tan. Mas, socialização Becora nian ne'e halo hotu tiha ona, e hotu-hotu consciente, loja ne'ebé rabat estrada ne'e agora daudauk muda hela. Se bele, sa'e bá leten haree, bainhira to'o momento ida-ne'e bele levanta fali iha Plenária ida-ne'e.

Atu ko'alia de'it kona-ba simu ka la simu, uluk ko'alia dehan, «Xanana nia ukun ne'e mak estraga povo hanesan ne'ebá hanesan ne'e», keta haluha! – Deputado ida foin mai ne'e ha'u la dehan, mas Deputado ida tuan hanesan ha'u ne'e – ko'alia loos karik, sunu iha 2006 sé nia mandato mak halo ne'e Xanana nia mandato mak recupera. Ne'e la bele dehan katak Xanana estraga fali povo nia moris iha futuro, la dehan nune'e ida, Deputado sira, tem que hanoin halo didi'ak!

Sunu mutuk, sé mak recupera ne'e? Xanana nia mandato mak recupera. Ne'e ha'u hakarak ko'alia iha-ne'e. Ne'ebe la bele hadau bá! Ida bá hamriik kedas iha SEATOU nia oin, la iha despacho ida husi Parlamento, nia bá hamriik iha-ne'ebá ne'e atu hadau hanesan horibainhira hadau iha Parlamento ne'e.

Obrigada, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Atu fó-hanoin de'it ba distinto Deputado sira katak interveniente sei falta 17 Deputados, mais tan ponto de ordem, tanba ida-ne'e mak ha'u husu: ita continua de'it to'o hotu ou *break* lai, depois tama fali mai mak continua?

Lian husi Deputado sira hotu: — Continua de'it.

Sr.^a **Presidente** (Maria Terezinha da Silva Viegas): — Então, ita continua de'it.

Tuirmai, ponto de ordem, distinto Deputado Antoninho Bianco.

Se faz favor, um minuto!

Sr. **Antoninho Bianco** (FRETILIN): — Pronto, ha'u hanoin, agradece ba Maromak.

Ha'u atu ko'alia loos, Lei ida n.º 3 2006 ne'e tempo I Legislatura, e Governo ida que liderado husi FRETILIN duni. Pronto, sé mak hahú? Comissão ida iha Governo ne'e ha'u mak lidera, comissão iha Parlamento ne'e camarada Joaquim mak lidera.

Ne'ebe, se dehan katak ne'e iha CNRT, ne'e CNRT seidauk moris, partido ida agora ne'e seidauk moris, tanba ne'e mak labele dehan fali lei ne'e Ita-Boot sira mak halo ne'e, di'ak liu lalika. Tanba ha'u autor lei ne'e, comissão ida iha Governo ne'e ha'u mak lidera, e comissão iha Parlamento ne'e Camarada Joaquim mak lidera e ami rua sei nafatin iha-ne'e, tanba ne'e mak lalika ko'alia buat ne'e. Tanba ami rua sei nafatin, tanba ne'e mak lalika ko'alia bosok fali, ita autor vivo kona-ba lei ne'e além de Constituição, e halo lei ne'e mós la iha partido seluk mak halo lei ne'e.

Obrigado.

Sr.^a **Presidente** (Maria Terezinha da Silva Viegas): — Muito obrigada.

Tuirmai, distinto Deputado Hélder Freitas.

Ponto de ordem, um minuto!

Sr. **Hélder Freitas «Kamarudin»** (PLP): — Di'ak, obrigado ba Presidente.

Ohin, ha'u levanta iha-ne'e liuliu kona-ba pensão. Ida-ne'e hanesan liuhusi informação sai *viral* iha mídia, tanba ne'e mak ha'u foti para evita problema. Karik acontece hanesan ne'e, ita aumenta tan problema ba antigo combatente, veterano, tanba ne'e mak ha'u foti. Ha'u husu favor ida, tanba sai *viral* loos, keta halo sai acontece hanesan ne'e ita aumenta tan problema boot ba ita-nia maluk sira, liuliu ba veterano 2009 nian agora daudaun fó-sai ne'e, sai *viral* duni. Tanba ne'e mak ha'u foti iha-ne'e para ita hotu haree para foti daudaun, karik iha problema ruma hanesan ne'e karik bele dehan horibainhira ami foti ona maibé realidade mak nune'e, tanba ne'e mak ha'u foti iha-ne'e, Presidente.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, ponto de ordem, Deputada Maria Rosa da Câmara «Bisoi».

Um minuto!

Sr.^a **Maria Rosa da Câmara «Bisoi»** (CNRT): — Sim, obrigada, um minuto.

Ha'u la dehan katak la halo lei iha Parlamento, iha! N.º 3, halo! Mas ema ida mak cumpre hodi identifica veterano ne'e na'in hira, ida-ne'e lei. Ha'u ko'alia kona-ba recolha dados veteranos nian ne'e, definitivo kona-ba ninia escalão, ninia participação ka saida ne'e ne'e husi ema ida mak ba recolha. Ne'ebe, ha'u ko'alia ida-ne'e, Deputado, ha'u la bosok ida. Se Deputado ko'alia kona-ba bosok, ne'e

Deputado nia problema, mas ha'u la'ós hamutuk ho Ita-Boot durante ne'e, ha'u ema ida ne'ebé nunca hakarak hamutuk ho Ita-Boot durante 24 anos.

Deputado Kamarudin, lalika rona *isu* ida! Tun bá rona direta di'ak liu, rona *isu* ne'e la di'ak, ida-ne'e halo ita *stress*, ita-nia kakutak ne'e ki'ikoan hanesan katupa ne'e bele metan hotu

Obrigada.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

A seguir, ponto de ordem, Distinto Deputado Anacleto Freitas.

Se faz favor.

Sr. **Anacleto Freitas** (CNRT): — Obrigado ba tempo.

Ha'u hanoin, colega balu simu hela ha'u-nia liafuan ne'ebé horisehik ha'u hato'o. Ha'u ko'alia hela ba colega ne'e, se nia ko'alia ninia história, ami na'in-rua nia história la hanesan, nia mós halo, ha'u mós halo karik. Se nia halo karik, halo iha Baucau ne'ebá, ha'u mós halo iha Viqueque ne'ebá, husu de'it testemunha Senhor ida tuur iha-ne'ebá naran Boraluli, tuur iha-ne'ebá ne'e, husu, ha'u halo ka lae. Ne'ebe ha'u ko'alia ba nia, horisehik ha'u mak ko'alia duni, ha'u mak saida... duni. Mas, nia hanoin didi'ak! Ne'e ha'u repete.

Se nia ko'alia kona-ba ida liafuan horisehik ha'u ko'alia ne'e, história ita hotu iha historia. Sé mak la iha história? Ita hotu halo, mas ko'alia kona-ba ida ohin nia dehan «criminoso», ne'e ba *agama* seluk, ba iha *agama* católica ne'e São Paulo ne'e criminoso aat liu, maibé to'o tempo ida nia sai fali profeta di'ak ida ba religião católica, ne'ebe, se ha'u-nia primo la hatene karik, aprende duni, aprende lai! Se nia *agama* católica karik nia aprende didi'ak buat ida-ne'e, ne'ebe nia labele mai dehan fali criminoso. São Paulo ne'e criminoso aat liu mas to'o tempo ida-ne'e sai fali profeta di'ak ida, ne'ebe ida-ne'e ha'u fó-hanoin hela, tanba ha'u-nia primo la hatene karik ida-ne'e mak ha'u fó-hatene.

Sr.^a **Presidente** (Maria Terezinha da Silva Viegas): — Sei iha ponto de ordem ida, mas Deputado Kamarudin, ha'u husu ho devido respeito, orsida ko'alia ba malu de'it ho Deputada Bisoi.

A seguir, sei iha inscrições barak, hamutuk 17 Deputados.

Ne'ebe, ha'u fó ba Deputado António Doutel Sarmiento.

Se faz favor.

Sr. **Antoninho Doutel Sarmiento** (FRETILIN): — Ha'u nia naran Antoninho eh, la'ós António...

Sr.^a **Presidente** (Maria Terezinha da Silva Viegas): — Desculpa! Deputado Antoninho Doutel Sarmiento.

Se faz favor.

Sr. Antoninho Doutel Sarmiento (FRETILIN): — ... Di'ak, obrigado ba tempo.

Ha'u-nia respeito ba Presidente em exercício, presidência da Mesa, Vice-Ministro dos Assuntos Parlamentares no colega Deputado no Deputada sira, mídia, técnico sira, assessor, povo Maubere no Buibere, saudações revolucionárias!...

Sr. Deputado sira husi FRETILIN: — Sempre revolucionárias!

... Ha'u hakarak secunda declaração Bancada FRETILIN nian hodi hatete ba Vice-Ministro dos Assuntos Parlamentares katak halo evicção ka despejo administrativo ba cidadão sira la tuir procedimentos legais ne'e hatudu saida, hatudu katak maneira fácil husi ema incompetentes, ema medíocres ne'ebé ukun Rai no povo ida-ne'e.

Quando ko'alia liafuan despejo administrativo nakonu iha ibun laran, iha buat rua mak importante atu ita hatene uluk: lei ne'ebé fó dalan atu halo despejo administrativo, katak base legal, nune'e atuação ne'e tuir princípios, legalidades, para contra arbitrariedade, *kesembarangan* ne'ebé ita halo, e, segundo mak procedimentos legais liuhusi nia dalas, faseado, tuir decisão tribunal nian, ne'e tem que tuir dalan tribunal nian mak ita bele halo ida-ne'e. Nune'e saida mak SEATOU halo ne'e la tuir dalan, conceito jurídico despejo administrativo ne'e nian rasik.

Se ita harahun povo ida nia uma, ita harahun povo nia economia, vida social. Se ita harahun povo ida nia uma, hanesan, Sr. Vice-Ministro, ha'u haree iha comentário ida hatete, katak atu harii jardim, se atu harii jardim ida mak ita tem que harahun povo nia uma, ha'u iha pergunta: Ukun sira iha tinan barak ba kotuk ita halo jardim barabarak ne'e retorno hirak mak fó filafali ona ba Estado ida-ne'e?

Ha'u imagina, se la'ó ba Manatuto, ita bá Baucau karik, ema hakerek iha-ne'ebá ne'e *One Dolar Beach*, la hatene *one dolar* ne'e vezes tinan barak ne'e ita hatama retorno hira ba Estado? Ita harii jardim sira-ne'e.

Depois, sobu sasán sira, ha'u la hatene ida dudu ema sira, iha Same, Vice-Ministro, ita bá iha mercado ne'e fatin ida SEATOU haruka sobu ne'e naklekar hela iha-ne'ebá, samfradu hela, dudu sai tiha ema hotu. Ida-ne'e mak ita-nia problema, tanba ne'e mak ita buka oinsá atuação sira-ne'e nafatin respeita ita-nia ema sira, ita-nia povo. Hanesan intervenção balu hatete katak uluk ita bá hamaus povo, lori ita mai tuur iha fatin digno, ikus ita lori povo ba risco, tanis no halerik, buat hirak ne'e hotu. Ida-ne'e mak ita-nia problema. La contra evicção, maibé procedimento legal sira mak ita tem que cumpre.

Tuirfalimai ha'u hakarak hatete ba Vice-Ministro, iha infraestrutura sira balu, halo moru hale'u hospital ida iha Luak ne'e, companhia to'o ohin exige hela osan seidauk selu. Muro ne'e halo tiha hotu

ona, ema usa, mas dehan Ministra Social karik seidauk fó osan ba companhia ne'e ka halo nu'ussá, sira exige buat ida ne'e tem que fó.

Terceiro, atu hatete, iha tinan kotuk ha'u husu, projeto ida halo estrada ba Alas Vila ne'e to'o agora Ministro seidauk fó mai ha'u explicação ida loloos. Horibainhira hatete hela fó ministro atu informa hela ba Ministro da Obras Públicas atu hatete ba ita, tanbasá mak bá halo tiha lançamento, sai tiha iha televisão, kesi tiha kaebauk ba ulun, kahe tiha tais, depois projeto ne'e parado hela. Depois entrega fali ba katuas sira iha-ne'ebá, hanesan katuas sira mak loke fali tender ba companhia hirak ne'e. Ita buka atu hetan explicação para labele halo hanesan horisehik ha'u-nia colega sira dehan, ohin iha-ne'e mós dehan, *pembohongan publik* ne'e, lançamento sobre lançamento buat hotu mak parado hela.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado Dário Madeira.

Faz favor.

Sr. **Dário Madeira** (FRETILIN): — Obrigado ba Presidente em exercício, composição da Mesa, Vice-Ministro, distinta e distinto Deputado sira hotu, povo doben Timor-Leste.

Iha-ne'e ha'u hakarak ko'alia, segunda declaração Bancada FRETILIN no PLP nian ne'ebé ohin halo.

Primeiro, hakarak atu ko'alia, FRETILIN, em princípio, la contra evicção, maibé contra nia procedimento atu halo evicção, ne'e mak sala. Ohin ita halo evicção atu muda ema ida tem que ho plano, la'ós toba hadeer mai, tanba mota tun, ita bá luflafu ema sira-ne'e arbiru de'it, sira atu bá toba iha-ne'ebé mós ita la interesse. FRETILIN contra mak ida-ne'e, tanba ne'e tratamento ida desumano. Ita nunca mais atu usa ita-nia sentimento solidariedade ba feto, labarik, inan isin-rua sira, avó sira iha-ne'ebá, ita la hanoin ida-ne'e. Ita nem hanoin, preocupa sira-nia necessidade ne'e. Ohin ita bá sobu ho forçada, lori Polícia no F-FDTL ita bá sobu ne'e, ita hanoin sira ne'e atu bá hela iha-ne'ebé?

Ha'u fiar, SEATOU la hanoin ida-ne'e, Governo ida-ne'e la hanoin ida-ne'e duni.

Dala ida tan, FRETILIN la contra evicção maibé tem que evicção ida-ne'ebé ho regra, tuir ninia procedimento ida di'ak, para povo sai ne'e mós sai ho digno. E, tula-sai ne'e tula duni, tanba exige barak começa tula-sai, mas tula-sai ne'e la iha condição iha município ne'ebá.

Deputado sira iha Ermera bele confirma ida-ne'e, sira-ne'ebé iha Fomento II bá Ermera ne'e, daudaun ne'e agora toba fali iha ponte okos karik, sira mai fali tiha ona karik, tanba iha-ne'ebá sira seidauk iha condição, ne'e! Tanba indemnização to'o agora mós seidauk fó, foti hotu tiha iha bancada to'o agora seidauk selu. Ida-ne'e mak realidade. Tanba ne'e, colega Deputado sira ko'alia parabéns no

obrigado ne'e, ita obrigado ida iha ema nia sofrimento leten ne'e ladún di'ak ida. Maibé povo mak hatene.

Graças a Deus, karik halo evicção tan ba parte ba Becora nian ne'e, loke estrada ne'e di'ak liu para ami husi parte Lorosa'e mai ne'e ami tama iha Díli mós ami la'o livre uitoan. Maibé husu nafatin, evicção halo, maibé tem que ho regra, labele bá duni tan de'it!

Tuirmai, ha'u hakarak atu ko'alia uitoan mós kona-ba dados veteranos.

Ha'u concorda completamente saida mak Deputado Adolfo ohin ko'alia, sistema ne'e saida, tem que compreende para ita explica sistema ne'e para bele convince ema, selae ita ko'alia sistema, sistema, maibé ita la consegue convince ema, para hamosu pergunta nafatin de'it. Momento quando halo verificação ne'e ida-ne'e mak acontece duni, confirma tiha, husu tiha dados ema ne'e nian tama tiha ba data ne'e, depois sai fali iha *power point* iha-ne'ebá ne'e ko'alia dehan katak «ó concorda ho ida-ne'e ka lae?», «concorda!» «Ikusmai, ó sei la protesta?» «La protesta!», então nia halo tiha declaração ida-ne'e no assina tiha ona iha-ne'ebá, teki-teki de'it dados ne'e taka-sai, buat ne'e muda an mesak ne'e, sistema ne'e oin seluk fali. Sistema ne'e ema mak gere iha-ne'ebá, tanba ne'e ha'u concorda ho declaração Deputado sira-nian ne'ebé ohin halo, CAC começa kokoteek ne'e tem que tolun. Começa horibainrua no horibaintolu, lista, quando taka-sai, CAC ne'e kokoteek ona, ha'u husu para CAC ne'e tem que tolun, tem que investiga ema sira ne'ebé toma conta base de dados ne'e tanba sira la *update* data ne'e baseia ba dados ne'ebé equipa de verificação halo. Iha-ne'e ha'u la fó sala ba equipa verificação, veterano sira-ne'ebé bá halo verificação, ha'u la fó sala ba ida-ne'e, maibé ninia fukun ne'e mak ida edital data ba sistema ne'e, ida-ne'e tem que haree didi'ak, tanba ne'e iha problema.

Ikusliu, atu adianta lailais, iha Viqueque ambulância mai halo manutenção iha Díli, mai choque iha Baucau, depois Governo ne'e dehan «labele hadi'a», condutor ambulância ne'e rasik bá hadi'a usa nia osan rasik. Depois de hadi'a hotu tiha, Sr.^a Ministra transfere ambulância ne'e ba fali Ermera, Viqueque Vila agora ambulância la iha, ba hospital município ne'e agora ambulância la iha, usa fali apoio husi DHS nian mak bá apoio iha-ne'ebá, maibé condutor sira labele lori carreta ne'e, só condutor husi DHS mak bele ba lori, sira agora tuur iha ne'ebá quase fulan ida liu ona sira simu osan de'it. Ha'u husu para Deputado Anacleto bele confirma ida-ne'e, sé mak condutor hadi'a carreta ne'e, Deputado conhece di'ak liu, tem que haree ida-ne'e.

Ida ikusliu educação nian, husu ba Ministra da Educação atu haree mós diretor da escola sira-ne'ebé foin daudauk hetan nomeação sira-ne'e, tem que ko'alia ho diretor da escola no inspetor da escola. Liuliu ba secundária ninian tem que controla diretor da escola tanba diretor da escola balu hetan tiha nomeação hanesan diretor da escola, to'o agora seidauk tama escola, desde tinan uluk 2024 mai to'o agora, maibé nia simu osan, halo mós mal gestão. Prática de mal gestão ne'e Governo mak estabelece. Uluk liu iha escola secundária ne'e iha diretor ida, vice, adjunto ida ho GAT (Gabinete de

Apoio Técnico), agora GAT la iha, osan ne'ebé apoio ba escola sira ne'e diretamente gere husi diretor da escola no vice mós la hatene.

Obrigado barak.

Sr.^a **Presidente** (Maria Terezinha da Silva Viegas): — Obrigada ba Sr. Deputado.

Tuirmai, distinto Deputado Natalino dos Santos.

Faz favor.

Sr. **Natalino dos Santos Nascimento** (CNRT): — Sim.

Bom dia ba Sr.^a Presidente, Mesa, Sr. Vice-Ministro dos Assuntos Parlamentares, colega distinto Deputado sira mak ha'u respeita no povo do ben Timor-Leste tomak ne'ebé ha'u hadomi.

Primeiro, ha'u preocupa tebetebes ho Sr. Deputado sira-ne'e, quase segunda e terça ita halo declaração e Governo rasik hatete tiha ona, pronto atu mai.

Regimento artigo 152.^o fó dalan ba debate com os Ministros, e horisehik Presidente do Parlamento anuncia tiha ona, agora depende ba colega sira. Tanba ne'e mak ha'u haree katak assunto ida SEATOU nia implementação ne'e politização duni, foti segunda e terça, segunda e terça, explica tiha ona, mas ita foti nafatin. Tanba ne'e ha'u husu ba colega sira, se Ita-Boot sira haree katak caso ne'e importante tebetebes, halo pedido para debate ho Governo!

Segundo, ita balu às vezes interpreta lei tuir ita-nia hakarak, ita-nia gosto de'it, Lei Expropriação. Lei Expropriação ne'e atu halo indemnização ka compensação ba rai ne'ebé privado, que atu usa ba utilização público. Agora atu halo indemnização justa ida, tuir interpretação, iha mota laran, iha mota-ninin ne'e ita halo indemnização justa? *Sedangkan* desastre mai daudauk ona atu lori sira, Governo foti ação atu bá salva, ita hakarak exige dehan katak interpreta lei, tuir ita-nia hakarak.

Colega sira, povo sira haree hela ita, ema sira hasai curso Direito ne'e haree hela ita-nia interpretação ba lei ne'e, tanba ne'e mak ha'u haree katak às vezes ita politiza fali sasán ne'e iha-ne'e.

SEATOU implementa sasán sira-ne'e mós tuir lei, tuir Lei de Ordenamento do Território mós sei hatete tem que halo duni ordenamento, iha decreto-lei ne'ebé iha 2008, iha VIII Governo halo tiha ona alteração, Lei n.º 3, ida-ne'e mak fó competência ba halo ordenamento cidade ida di'ak.

Agora ita mai ko'alia violação direitos humanos, se mota lori karik oinsá? Ita atu dehan mota mak viola ema nia direito? Ita fó aplauso ba Chefe Suco Bebonuk, começa avisa ona, sensibiliza ona cidadão sira e começa sai daudaun ona. Ita-Boot sira bá to'o Bebonuk, sa'e husi mota ninin ne'e ema ida-idak sobu ninia uma, ne'e hatudu katak população aceita duni e sira coopera duni. Tanba ne'e ha'u husu ba colega sira, liuliu husi bancada oposição, Ita-Boot sira halo to'ok requerimento, bolu membro Governo mai, tuir Regimento artigo 152.^o para depois ita bele hela ho clarificação, clareza, selae ita semana-semana foti mak tópico ida-ne'e hela de'it.

Terceiro, ha'u hakarak foti questão ida kona-ba lista combatente sira-nian. Iha critério katak 60 dias sé mak la satisfaz bele halo contestação, iha-ne'ebá ita tem que apresenta dados para depois bele minimiza buat ida veterano falso ne'e.

Ita hotu tuir hela funu ne'e e ita hatene. Iha funu ne'e iha etapa tolu: 1975 to'o 1980 ne'e fase ida ba Comité Central, e setor ne'e fahe ba setor neen; depois de 1980, reorganização filafalimai ne'e fahe ba região tolu; mai fali iha noventa e tal mai leten mak fahe ba região e sub-região, estrutura ne'e iha hela.

Ha'u aceita ho saida mak ohin Deputado Mandati hatete, funu ne'e organizado, orientado e estruturado. Agora, tanbasá mak acontece ida-ne'e, filafali ba ida-idak nia consciência. Responsabilidade, ita-nia responsável sira ne'ebé uluk orienta, organiza ne'e atu haree, labele bá haree naran taka ka sai ona, nia husik tiha.

Se funu ne'e organizado, orientado, estruturado, então ita sei iha nafatin responsabilidade. Tanba ne'e ha'u haree katak assunto ne'e assunto importante duni e husu ba Governo atu tau atenção.

Ikusliu, ha'u hakarak foti questão ida kona-ba eletricidade. Iha Covalima, Posto Zumalai, Suco Lour, Aldeia Somo Kanua, to'o agora seidauk hetan acesso ba eletricidade. Ha'u husu ba Sr. Vice-Ministro atu tau consideração ba aldeia ida-ne'e, to'o agora la hetan acesso ba eletricidade.

Ha'u sente, ida-ne'e de'it mak ha'u hakarak hato'o.

Obrigado ba Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinto Deputado José da Cruz.

Faz favor.

Sr. **José da Cruz** (FRETILIN): — Obrigado, Sr.^a Presidente em exercício, composição da Mesa, Sr. Vice-Ministro dos Assuntos Parlamentares, distinta no distinto Deputado sira hotu no povo Maubere no Buibere.

Ha'u hakarak sekunda intervenção colega Deputada Lília nian sobre decisão transferência professor no professora sira iha Município Bobonaro.

Simu mós lamentação husi professor ida ho naran Sr. Lázaro, ne'ebé ho deficiência física, hetan fali transferência husi Escola Malibaka ba Escola Secundária Geral Dom Samara Balibó. Ne'ebe ita bele hatete katak decisão ida-ne'e dala ruma la haree ba ema nia condição física, ema ho deficiência, ne'ebé loloos ne'e Diretor tem que hatene katak ema ho deficiência mós iha direito atu hetan promoção, atu hetan proteção tuir Constituição hatete.

Constituição artigo 21.º n.º 2 ne'e hatete momoos, Estado iha dever atu protege ema ho deficiência sira-ne'e para bele halo serbisu ho didi'ak, maibé diretor ida-ne'e la haree ba ema nia condição física, halo transferência por vingança.

Ha'u hanoin, ida-ne'e husu ba PDHJ Município Bobonaro nian atubele haree, halo to'ok aproximação ida ba diretor educação ida-ne'e para bele revê filafali nia decisão, que ema ho deficiente ne'ebé loloos tem que hetan serbisu-fatin iha condição ne'ebé loloos labele tau risco ba nia an.

Segundo, sustenta mós declaração Bancada nian sobre evicção. Ita hatene loos ona, FRETILIN, desde declaração início hatete ona katak FRETILIN la contra evicção ne'ebé atu ordena cidade Díli ou cidade capital de Timor, mas pelo menos evicção ne'ebé atu alastra mós bá to'o iha município ne'e, ha'u hanoin, Secretário de Estado ne'e buka atu aprende e halo revisão ba ninia atuação sira-ne'ebé iha, atuação sira-ne'ebé, dala ruma, ita hatete daudauk ona iha-ne'e, katak haree ema nia problema. Se atuação sira ne'ebé ikus resulta ema tem que lakon ema nia rendimento, lakon ema nia hela-fatin, labarik sira la bele estuda ho di'ak, ema inan isin-rua sira la bele hela iha fatin di'ak, ne'e problema.

Ita fó parabéns, mas ema nia prestação la di'ak ne'e halo nu'usá? Ema baibain fó parabéns ne'e ba prestação ida-ne'ebé ema hotu louva, mas prestação ida que sacrifica ema ne'e ita fó parabéns, ita orgulho tan de'it, ha'u hanoin, ne'e contra la halimar ha'u-nia lógica ne'e.

Ha'u fó parabéns ba ema ne'ebé foti povo ida-ne'e nia dignidade ba leten, Estado ida-ne'e nia dignidade ba leten, ne'e mak ita dehan parabéns ne'e iha fatin. Se fó parabéns mós ema halo violação ba ema nia direito, ne'e ita parabéns dukur de'it ne'e, ha'u hanoin, ita la contribui atu hadi'a ita-nia Governo, ita-nia Estado ida-ne'e.

Ha'u hanoin, ha'u-nia raciocínio ne'e, ha'u haree, durante ne'e katak iha ema balu la consegue halo introspeção didi'ak ba nia an. Liafuan ida parabéns ne'e *bahasa* saida? Ema tem que iha prestação. Iha escola karik ita fó parabéns ba ita-nia oan sira bá escola ne'e fila mai tanba nia lori valor di'ak. Ida-ne'e hatún povo nia dignidade, Governo ida-ne'e nia dignidade, depois parabéns tan, cómico!

Ha'u hanoin, ida-ne'e mak ha'u hakarak hato'o.

Obrigado barak, Presidente.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinta Deputada Maria Gorumali Barreto.

Faz favor.

Sr.^a **Maria Gorumali Barreto** (CNRT): — Obrigada ba tempo, oportunidade.

Ha'u-nia respeito ba Sr.^a Presidente ho composição da Mesa, caro distinto Deputado sira hotu, audiência tomak no ba rona-na'in Rádio Parlamento Nacional, bom dia ba Ita-Boot sira hotu.

Agradece ba Maromak tanba ohin ita sei continua nafatin Plenária ba loron terça-feira nian.

Primeiro, Sr.^a Presidente, ha'u iha questão ida kona-ba fundo Programa de Desenvolvimento Integrado Municipal (PDIM) ne'ebé aloca ba município sira hotu, iha problema ne'ebé ami deteta husi Comissão F nia fiscalização. Ami haree katak Fundo PDIM ne'ebé aloca ba Município Bobonaro, Presidente Autoridade Município halo reabilitação ba uma maternidade iha Centro Saúde Atabae, reabilitação ne'e la tuir standard saúde nian tanba uma maternidade ne'e la iha espaço ba fatin sala partos no mós sala observação ba paciente inan isin-rua nian, tanba ne'e mak ha'u foti questão ida-ne'e.

Hanesan mós iha Município Lautém, usa osan PDIM harii uma mortuário iha Centro Internamento Saúde Município Lautém, maibé uma mortuário ne'e la preenche requisito tanba sala ba rai maktoban ne'e espaço la iha, maibé sala ba rai documentos no mós pessoal sira ne'ebé serbisu iha mortuário luan liu fali do que sala ba mortuário. Depois, quando ami husu ba Chefe Centro Internamento, nia dehan katak bainhira iha ema ruma mate mak tau iha mortuário ne'e sira sei tau regras ida tama ida-ida.

Ida-ne'e explicação ida-ne'ebé la claro, tanba ne'e ha'u foti iha-ne'e para husu ba Sr. Vice-Ministro atubele hato'o ba MAE, liuliu ba presidente autoridade sira, atu usa osan ida-ne'e ba construção saida de'it precisa halo cooperação, coordenação ho ministério relevante tanba cada ministério, liuliu saúde ne'e, iha ninia *standard* quando ita halo construção ruma ba facilidade saúde.

Kona-ba ai-moruk *expire*, ne'ebé ohin Deputado sira ko'alia, baseia ba fiscalização Comissão F nian iha terreno hatudu katak ai-moruk sira-ne'ebé *expire* ne'e mai husi Governo anterior, ida-ne'e mak ha'u hakarak clarifica.

Segundo, kona-ba assunto veterano, ha'u secunda ho Deputado Deker nian katak lista ne'e seidak perfeito, tanba ne'e mak MACLN fó-sai iha dia 15 de janeiro para hotu-hotu bele haree lista ne'e. Karik ema sira ne'ebé naran sai la tuir ninia participação durante resistência, bele halo reclamação, sei iha tempo 60 dias halo reclamação baseia ba artigo 18.º Lei n.º 3/2024, de 12 junho, Terceira alteração à Lei n.º 3/2006. Ida-ne'e claro iha-ne'ebá.

Ne'ebe, ba colega Deputado sira ne'ebé hatene lei ne'e labele mai questiona, protesta maka'as fali assunto sira-ne'e, maibé ita facilita informação ba ita-nia maluk veterano sira para sira bele usa didi'ak 60 dias ne'e para bele halo reclamação.

Depois, kona-ba declaração política husi Bancada PLP, dehan katak «Sr. Kay Rala Xanana Gusmão lakohi veterano existe iha Timor-Leste», ne'e sala boot! Sala boot tanba saida? Ha'u hakarak husu ba Ita-Boot: subsídio ba veterano ne'e sé mak cria? E harii comissão ne'e sé mak halo? Ne'e mai husi sé?

Ha'u hakarak atu dehan ba Ita-Boot sira katak Comandante em Chefe das FALINTIL seidak registo quando nia alin veterano sira seidak registo hotu no problema veterano seidak resolve. Quando resolve ona, nia foin bá registo, ne'ebe la'ós dehan tanba nia la registo ne'ebe nia lakohi

veterano existe iha Timor-Leste, lae! Ne'e, ha'u hanoin, ha'u-nia colega Deputado ne'e hanoin mós sala.

Kona-ba educação, ha'u hakarak hato'o katak Sr.^a Ministra da Educação foin halo reunião ida ho professor sira, hamutuk 1.800, e la iha queixa husi professor sira kona-ba assunto ida-ne'ebé ohin colega sira foti ne'e...

Sr.^a **Presidente** (Maria Terezinha da Silva Viegas): — Por favor conclui!

Sr.^a **Maria Gorumali Barreto** (CNRT): — ... Sr.^a Ministra dehan, reunião ne'e hamutuk ho superintendente sira mós, simu relatório fó-sai katak professor balu tama tarde sai cedo, estudante balu lê seidauk hatene, sala de aula sei falta no seluk-seluk tan...

Sr.^a **Presidente** (Maria Terezinha da Silva Viegas): — Muito obrigada, Sr.^a Deputada, por favor conclui!

Sr.^a **Maria Gorumali Barreto** (CNRT): — ...ho nune'e Ministra mós aplica regras disciplinares ba professores no foti auto hasoru professores ne'ebé contra regras. Ida-ne'e mak loos, ne'ebe labele mai halo *hoax*!...

Sr. Presidente desliga Sr.^a Deputada ne'e nia microfone.

Sr.^a **Presidente** (Maria Terezinha da Silva Viegas): — Tuirmai, distinto Deputado Antoninho Bianco.

Faz favor.

Sr. **Antoninho Bianco** (FRETILIN): — Obrigado, Maromak, ema sei moris hotu be ami sei ko'alia. Agradece!

Ha'u hanoin, Sr.^a Presidente Parlamento Nacional, componente da Mesa, Vice-Ministro dos Assuntos Parlamentares ne'ebé representa Governo, maluk sira hotu, ha'u secunda ami-nia declaração, Bancada FRETILIN nian, e mós secunda declaração no liafuan ne'ebé liga ba povo nia sofrimento. Ne'ebe, maluk sira, desenvolvimento ne'e halo ema contente, la'ós desenvolvimento halo ema triste, tanis, ho seluseluk. Desenvolvimento no atuação ne'ebé halo ema tanis, terus no susar, ne'e contra princípio desenvolvimento. Princípio desenvolvimento, se tuir ordenamento território, iha hierarquia, hierarquia legal no hierarquia instrumento. Hierarquia legal mak baibain lei iha ona, depois decreto-lei, maibé, hierarquia ida ema dehan instrumento ne'e tem que liga ba, ema dehan, plano

especial nacional, *national plan*, ne'e tem que iha, no ordenamento ne'e tem que iha. Depois, husi ne'e mai fali, ita bele dehan, plano municipal.

Iha municipal iha buat rua: urbano ho cidade. Então iha ka lae *Master Plan of Díli*. Iha ka lae? Se la iha, ne'e halo nu'usá? Então, oinsá usa atu halo evicção? Evicção ne'e buat ida *penggusuran*, termo ne'e ha'u rasik ladún gosta. Evicção quer dizer ida por emergência ne'e tuir loos iha corredor ba princípios legais ordenamento nian mós labele, e princípio instrumento técnico mós la preenche.

Ha'u hakarak husu ba Vice-Ministro bele hatán ha'u-nian ne'e, aspetos legais, husi lei to'o decreto-lei ne'ebé liga, e aspeto técnico, ne'ebé ohin ha'u hatete ne'e, *rencana tata ruang nasional*, iha Indonésia karik hanesan ne'e, ou plano especial nacional, ou *national plan*, ne'e iha! Tuirmai plano municipal, iha Díli ne'e, evicção ne'e plano mestre Díli nian iha ka lae? Se ida-ne'e la iha, ita halo evicção, *penggusuran secara paksa*, ne'e *di luar* ona, fora husi regras, ita bele hatete.

Tanba ne'e, ha'u hanoin, maluk sira ohin dehan Governo nia programa, Ita-Boot nia, imi ko'alia iha eleição uluk mak hanesan ne'e, ema la hili imi. Dehan, «ami tama, ami sei ra'ut imi, dudu imi», *pasti* ema la hili. Maibé, pronto, buat ne'e subar tiha, to'o ikusmai mak ita dudu ema iha fatin-fatin. Ne'e la'ós iha mota laran ne'e, maibé, agora tama ona Becora no fatin-fatin ne'e, ne'e desastres naturais ka desastre humano ne'ebé planeado husi Governo, *jadi* desastre ne'ebé acontece ho emergência, ne'e mak ami contra.

Pronto, ita dehan desenvolvimento ne'e planeado, desenvolvimento organizado e coordenado para depois ninia efeito positivo mak mosu ba ema ne'e fó moris di'ak ba ema. Ema ne'e indivíduo, grupo, família, até que ba iha nível suco, aldeia, ne'e ema. Ne'e mak ita precisa dehan, conceito ne'e loos, então buat hotu-hotu la'o di'ak, mas conceito errado ba processo desenvolvimento, então afeta hanesan agora ita pró-contra ne'e. Tanba iha conceito planeamento desenvolvimento errado, ema ida-idak ba halo ninian. Agora SEATOU mak sai alvo, mas SEATOU ne'e executa buat ne'ebé Governo halo. Agora, Governo ne'e halo ne'e mak la tuir dalan, SEATOU mak sala, Ministro hotu-hotu nian iha-ne'ebé?

Ha'u hanoin, tuir loloos Presidente da República lori mak Governo, tanba atuação SEATOU nian nian ne'e é uma decisão la'ós unilateral, é uma decisão própria deste Governo, tanba ne'e lori mak Governo hodi hatete katak sentido de responsabilidade ba atuação ne'ebé sé mak representa é SEATOU.

Ha'u hanoin, ida-ne'e mak ami FRETILIN sempre dehan, ita la'o tuir dalan loos. Lia loos liuliu mak ne'e: lia loos no dalan loos ne'e la iha ódio malu. Ami fó-hatene ida-ne'e hodi fanun Ita-Boot sira. Keta iha nakukun karik, naroman mak hato'o ba iha-ne'ebá.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinta Deputada Aliança da Conceição.

Faz favor.

Sr.^a **Aliança da Conceição Araújo** (CNRT): — Muito boa tarde ba Sr.^a Presidente Parlamento Nacional em exercício, ba Vice-Presidente no Secretária, ba Srs. Deputados e Deputadas, ba Sr. Vice-Ministro dos Assunto Parlamentares, ba ita hotu no povo doben Timor-Leste.

Ha'u mós atu responde uitoan, tanba ha'u-nia colega Deputado ida hatete, «Saida mak parabéns, parabéns hela de'it. Parabéns ne'e ba ita-nia oan sira ba simu sira-nia *nilai* di'ak mak ita parabéns. Ne'e hotu-hotu ho parabéns, parabéns hela de'it». Ha'u atu hatete ba Ita-Boot katak ida-ne'e problema ita-nian fali ona, atu dehan parabéns ka la parabéns ne'e la ho ha'u.

Em primeiro lugar, ha'u hakarak secunda declaração política Bancada CNRT nian horisehik, ho mós ha'u-nia maluk Deputado husi Governo ne'ebé ohin ko'alia ona liafuan ruma.

Ha'u hakarak secunda declaração Bancada CNRT nian no hato'o parabéns ba IX Governo Constitucional, liuhosi Secretário de Estado dos Assuntos da Toponímia e Organização Urbana (SEATOU), maski simu crítica barak, maibé continua hala'o serbisu tuir nia dalan no baseia ba Decreto-Lei n.º 33/2008, ne'ebé halo primeira alteração ho Decreto-Lei n.º 3/2024, de 27 de agosto, Sobre Higiene e Ordem Pública, kona-ba organização espaço público, proibições no sanções, inclui Lei Bases do Ordenamento do Território kona-ba plano especial cidades urbanas, ne'ebé mencionado ona iha declaração política Bancada CNRT nian.

Lei sira-ne'e Parlamento mak aprova no SEATOU executa serbisu baseia ba lei. IX Governo Constitucional hanoin no hatene saida mak tem que halo, tanba ne'e, husu ba Deputado sira atu labele politiza situação. Povo agora matenek ona no hakarak contribui no coopera ba evicção ida-ne'e, depois de tudo isto povo labele iha fatin ne'ebé ho risco. Hanesan iha anos anteriores, vítima barak durante inundações no iha momento ne'ebé VIII Governo ukun mas seidauk halo ação ruma hanesan Maun Boot Kay Rala Xanana Gusmão halo.

Ohin loron ema hotu critica SEATOU no IX Governo, maibé loron ida hotu-hotu sei goza no agradece ba buat hirak-ne'e. Exemplo ida ita bele foti mak Porto Tibar, uluk, quando obra refere seidauk inicia, Maun Boot Kay Rala Xanana hetan crítica oioin, mas desde obra finaliza ho sucesso, hotu-hotu aproveita. Hanesan mós fatin sira ne'ebé antes ne'e hetan evicção, agora halo ona estrada no alargamento estrada no sira ida protesta e critica ne'e mós utiliza no hetan benefício hotu husi ba obra hirak-ne'e.

Antes critica, keta haluha haree avião ZEEMS iha Oe-Cusse, ne'ebé agora daudauk parado hela. Pior liu mak avião refere la iha recibo de compra no avião refere sei iha hela companhia seluk nia naran. Ita-Boot sira ko'alia kona-ba falta de sensibilização humana husi IX Governo Constitucional tanba evicção, oinsá uluk bá sobu no duni comunidade Fulolo hodi harii residência ne'e, será que

momento ne'ebá povo la sai vítima no halerik? Ida-ne'e mak ita hanaran «bom gestor» compara ho Governo ida agora halo evicção tanba população sira harii uma iha fatin risco no atu hadi'a capital?

IX Governo hala'o nia serbisu tuir lei fó dalan, seidauk tane liman, crítica oioin mak mosu, maibé ida-ne'e hanesan força ida ba IX Governo atu continua serbisu no husik sucesso mak halo barulho. Povo hatene no bele haree sé mak ukun ho loloos no sé mak hakarak duni desenvolve Rai ida-ne'e.

Ha'u atu responde uitoan sobre ohin ha'u-nia maluk Deputado balu hatete, «Maun Xanana lakohi veterano, nia la bá registo, nia lakohi hatene», ne'e hanesan ha'u-nia maluk Deputado balu responde tiha ona, la'ós nia lakohi, la'ós nia la interesse, tanba nia hanoin ba nia maun alin sira barak, nia tiun, avó...

Sr.^a **Presidente** (Maria Terezinha da Silva Viegas): — Por favor conclui, distinta Deputada

Sr.^a **Aliança da Conceição Araújo** (CNRT): — ... ida-ne'e ha'u la precisa hatete ona.

Só ida de'it, ha'u la fiar katak Presidente da República bá queixa SEATOU iha Ministério Público, ida-ne'e la loos ida! Ne'ebe, ha'u husu ba jornal, alias *Jornal Independente* ne'e, atu hakerek sasán loloos, labele inventa dehan Presidente da República atu queixa fali SEATOU ba Ministério Público. Ha'u la fiar ida! Ha'u hatene katak Presidente da República ema ida matenek, nia hatene sukat sasán.

Obrigada, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinto Deputado Anacleto Freitas.

Faz favor.

Sr. **Anacleto Freitas** (CNRT): — Obrigado ba tempo.

Ha'u-nia respeito ba Presidente Parlamento Nacional em exercício, composição da Mesa, colega Deputado no Deputada sira hotu, mídia, assessor sira, técnico sira e povo Timor laran tomak, boa tarde ba ita hotu.

Ha'u hakarak atu hato'o hela de'it kona-ba preocupação povo nian iha kraik kona-ba veterano. Veterano sira ne'ebé agora daudauk naran taka-sai, depende ema ko'alia, mas lei ne'e mak halo discriminação boot ba ita-nia veterano sira.

Lei ida uluk, ita-nia ema luta-na'in sira-ne'ebé mate iha ai-laran, mate klosan, nia maun-alin ka nia feton sira bele simu nia direito, mas lei ida agora dehan só nia oan ka nia feen mak bele simu. Será que nia mate klosan, ita halakon tiha de'it nia direito ida-ne'ebé nia luta ne'e ka? Ne'e preocupação boot ida. Ne'ebe, karik Vice-Ministro alista para depois bele hato'o ba ita-nia Direção Combatente Libertação Nacional, veterano nian, para depois bele hato'o ida-ne'e, tanba sira ne'ebé foin daudauk

mate klosan iha ai-laran, ita, quando recolha nia resto mortal ne'e, tem que halo cerimónia cultural. Buat sira-ne'e processo la'o naruk no to'o mai iha saida... mas agora ita halakon tiha nia direito ne'e bele ka lae?

Tanba preocupação iha kraik mak hato'o hela mai, nune'e ha'u bele hato'o hela ba Vice-Ministro dos Assuntos Parlamentares para depois bele haree to'ok, se ida-ne'e mak acontece, dala ruma ita bele halo discriminação ba ita-nia luta-na'in sira. Uluk bele, agora labele fali, só ninia oan ho ninia feen mak simu, será que nia mate klosan, coitado, ita halakon tiha de'it? Ne'e ida.

Ida fali mak hakarak ha'u atu hato'o hela ba ha'u-nia maun-alin sira balu – agora la iha ne'e mas ha'u hakarak hato'o hela – ita hakarak atu sai herói ka sai Maun Boot ne'e tem que conta ita-nia história rasik ou ita mai ho ita-nia naran rasik, labele lori fali ema seluk nia naran, mai conta fali ema seluk nia história. Ne'e, ha'u hanoin, ladún di'ak, ne'e ita Maun Boot mós, ha'u hanoin, Maun Boot ne'e ladún loos, ne'e ka? Ne'ebe ha'u fó-hanoin hela de'it, ita hakarak sai Maun Boot tem que mai ho naran rasik ou mai ho história rasik. Ne'e ida.

Ida fali mak ohin ha'u-nia camarada Kamarudin ko'alia, ha'u hanoin, ha'u mós apoia hela nia uitoan. Maibé nia mós labele sees husi ninia *tanggung jawab* tanba Kamarudin ne'e naran boot iha Baucau, nia mós tama iha verificação lista kona-ba veterano nian. Ne'ebe, ha'u-nia camarada mós tem que hola responsabilidade iha verificação ne'e. Karik iha falso mós ha'u-nia maun-alin bele ko'alia, ida-ne'ebé dedicação ne'e la to'o karik mós ha'u-nia maun-alin ne'e bele hatene, ne'ebe, ha'u hanoin, ha'u husu ba ha'u-nia Maun Kamarudin labele sees husi ninia *tanggung jawab* ne'ebé uluk ne'e.

Ha'u hanoin, ha'u-nia preocupação mak ne'e de'it.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinta Deputada Maria Angélica Rangel.

Faz favor.

Sr.^a **Maria Angélica Rangel da C. dos Reis** (FRETILIN): — Muito obrigada, Sr.^a Presidente, composição da Mesa, Srs. distintos Deputados, Sr. Vice-Ministro.

Depois de rona tiha discussão ne'ebé naruk husi dadeer to'o lokraik, husi horisehik to'o ohin, FRETILIN hakarak ko'alia buat ne'ebé loos.

Evicção ne'e FRETILIN la'ós foin ko'alia horisehik, horibainrua ho ohin, FRETILIN ko'alia desde início halo evicção ba ita-nia maluk timoroan sira atu halo preparação Santo Padre atu mai, katak ita dehan ita halo evicção ne'e atu nune'e ita-nia país ne'e capaz, ita-nia cidade ne'e capaz hodi simu ita-nia Santo Padre. Ita concorda, FRETILIN mós concorda dehan katak halo ita-nia cidade ne'e ho di'ak, maibé atuação ne'ebé desumana halo ba ita-nia ema sira ne'e mak FRETILIN sempre ko'alia, la'ós

FRETILIN foin ko'alia horisehik horibainrua, atuação desumano, atuação cruel sira-ne'e mak FRETILIN contra.

Agora, ha'u rona, Secretário Estado ko'alia dehan katak osan atu tau ba evicção halo indemnização ne'e iha, iha-ne'ebé? La iha!

Secretário de Estado declara iha público dehan osan tau desde 2023, foin audiência pública Conta Geral do Estado 2023 ami, Comissão C, e ha'u rasik hanesan membro da Comissão C, hanesan Deputada, husu ba Governo, «osan ne'e iha-ne'ebé?», tanba Sr. Secretário de Estado nia osan iha 2023 ne'e 540.000 USD, ne'ebé tau de'it ba Salário e Bens e Serviços. 2024, Sr. Secretário de Estado SEATOU nia osan 760 mil dólares, ne'ebé tau de'it ba bens e serviços e salários e vencimentos. Iha 2025, Sr. Secretário de Estado nia osan 940 mil dólares, osan sira-ne'e to'o atu halo evicção?

Ita halo atuação cruel ne'e tanba ita la haree ba ita-nia inan sira tanis, ita la husu tanbasá sira mai hela iha mota-ninin. Tanbasá sira mai hela iha estrada-ninin, tanbasá sira mai ocupa espaço Estado? Tanba causa ida, causa ne'e mak hakarak ukun rasik an.

Uluk ita-nia povo sira hotu-hotu la hela iha cidade, tanba ukun an ida-ne'e mak povo sira concentra, mai buka sira-nia moris iha Díli laran. Povo la husu ita atu fó osan ba sira, povo hakarak liberdade ida be sira hetan depois de ukun an ne'e, sira atu hadi'a sira-nia vida, hadi'a vida social, hadi'a vida política, hadi'a vida economia. La'ós povo atu mai tane liman, maibé ita bá ukun ita dehan atu serbí povo ne'e mak ita halo atuação de'it ba iha evicção ne'e ho ato desumano, ho ato ne'ebé cruel? Ida-ne'e mak ita hakarak? Ida-ne'e mak ita hadomi povo? Ida-ne'e mak dehan ita serbí povo?

Ita-nia programa iha IX Governo nian ko'alia buat barak ne'ebé furak-furak hakerek iha livro ne'e, maibé nia implementação la iha, Sr. Vice-Ministro.

Horisehik ha'u mós rona ko'alia kona-ba ita-nia Primeiro-Ministro nia naran, e ema barak la contente quando FRETILIN ko'alia Primeiro-Ministro. Primeiro-Ministro tem que responsável duni ba ato governação ida-ne'e tanba nia mak Chefe do Governo.

Horisehik Sr. Vice-Ministro dehan: «Primeiro-Ministro ne'e nunca ko'alia bosok dala ida». Sr. Vice-Ministro, ha'u husu ba Ita-Boot: quando discussão ida ha'u dehan, «Maun assina», Maun dehan «Ha'u la assina», depois to'o ikus Maun dehan assina duni – ida-ne'e ato desonesto – ida-ne'e ato loos? La bosok?

Quando Maun Xanana la respeita órgão soberania ida, dehan Deputada ida beik-teen, ida-ne'e ato saida? Maun Xanana nia valor liderança ne'e la merece atu ko'alia ba Deputada ida, fará mais hanesan ha'u ida ki'ikoan ne'e. Ida-ne'e ita bolu liafuan saida, Sr. Vice-Ministro? Dehan mai ha'u!

Ohin Sr.^a Deputada Lita Sarmento ko'alia kona-ba atuação ne'ebé contra lei, Ita-Boot sira bele fó resposta ba resolução, ba convenção sira ne'ebé ita aprova, Ita-Boot sira fó resposta! La'ós resposta ne'ebé ita atu mai gaba malu, dehan gaba Maun Xanana, Maun Xanana...

Haklalak husi Deputado sira husi Bancada CNRT.

... Ita hotu-hotu respeita Sr. Primeiro-Ministro, nia hanesan liderança.

Agora, – atu conclui – liafuan ida be Sr. Primeiro-Ministro ko'alia, «ha'u la'ós veterano», ida-ne'e Sr. Primeiro-Ministro bosok ka lae? Na verdade Sr. Primeiro-Ministro mak Comandante em Chefe das FALINTIL, agora nia dehan nia la veterano, ne'e nia bosok ka la bosok?

Muito obrigada.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinto Deputado António da Conceição.

Faz favor.

Sr. **António da Conceição «Kallohan»** (PD): — Muito obrigado.

Boa tarde ba Sr.^a Presidente, boa tarde ba Sr. Vice-Ministro dos Assuntos Parlamentares.

Ha'u hahú atu, primeiro, ko'alia kona-ba *isu* sira hotu ne'ebé ohin ita debate iha ligação ba mídia ida-ne'ebé ko'alia kona-ba Meta Malik, e ha'u hanesan ema PD, Meta Malik mós ema PD, ha'u-nia laran moras tebes tanba ema ne'e la iha tiha ona.

Ema ne'e participa duni iha governação anterior ho nia ato pessoal, la'ós em nome do partido, tanba ha'u la nega nia ema PD. Maibé, ha'u triste bainhira nia la iha ona mak ita contesta. Ha'u husu atu ita hotu-hotu hola responsabilidade ba ita-nia ato. Ida be mate ne'e lian la iha tiha ona e sei la defende nia an, mas ita sira be moris ne'e halo ho ita-nia consciência, ho responsabilidade. Meta Malik kala tinan ida ho balun de'it efetivo, o resto bele husu Sr. Ministro atual ne'e mós ninia responsabilidade, ne'e mak ita justo. Ita labele soe fatuk subar liman! Ne'e ladún di'ak.

Segundo, ha'u hakarak mós atu dehan, Sr. Ministro, Sr. Primeiro-Ministro iha fatin ida-ne'e, iha debate OGE liubá ne'e, husu ami atu tau matan ba membro Governo sira, ajuda controla. Ami husi Bancada do Governo certamente halo ami-nia função, hasé bainhira ladún di'ak, maibé la'ós contra, dala ida tan ha'u repete buat ida-ne'e. Hasé ne'e la'ós atu dehan «ha'u contra ó», hasé ne'e, hanesan Sr. Primeiro-Ministro dehan, ajuda controla atu realiza compromissos ne'ebé IX Governo halo iha oportunidade ita debate Orçamento Geral do Estado.

2025 ano de implementação, tanba ne'e ha'u husu atu ita hotu-hotu ne'ebé iha Uma-Fukun ida-ne'e bele iha responsabilidade ida hamutuk atu hanoin katak Nação ita-nian. Por mais duro a palavra, liafuan bele kro'at, maibé sempre di'ak quando ita hanoin ida-ne'e ba interesse comum, la'ós ba interesse grupo ida nian, muito menos atu ita hotu – atu dehan de'it – buat hotu-hotu ne'ebé ita halo ne'e ita contra ita-nia líder. Ita-nia líder sira lori ona ita ba ukun an, ita tem que assume responsabilidade atu liberta ita-nia povo, ne'e mak loos. Mas, bainhira ita hotu-hotu sente liafuan

kro'at hanesan fali tudik sona ita mate, ida-ne'e ita halo mate ita-nia an. Tanba ne'e ha'u, hanesan mós bancada do Governo, la'ós dehan katak la aceita ho buat hotu ne'ebé oposição sira ko'alia, ha'u concorda hanesan mós ha'u-nia declaração da Bancada dehan tiha ona, ita precisa iha atuação ida-ne'ebé coordenada, organizada para depois ita bele fó razão ba ita-nia povo, selae ita bele dehan katak ita halo atividades soltas, naranaran de'it. Ita precisa ne'e iha planeamento ida, ita precisa orçamento ida para depois bele mitiga ninia efeitos sociais ne'ebé ato ne'e rasik causa. La'ós sira la hatene halo, sira hatene, maibé dala ruma ne'e ida be de repente ne'e mak halo ema laran moras ne'e mós iha, e, ida-ne'e normal, é humano. Ita labele dehan katak nia mai tiha husi Atsabe buka hela moris iha-ne'ebá, de repente de'it nia tem que fila bá, Balu hola malu iha Díli, iha foho sira fatin mós la iha. Ita halo estudos buat sira hanesan ne'e hodi compreende ita-nia povo nia situação, ne'e filafali ba ita hotu atu hatene para depois ita bele halo mitigação ida didi'ak, e naran ne'e ba ita, povo ne'e la iha naran ida.

E último, ha'u husu de'it, tanba buat sira-ne'e hotu ita ko'alia Díli de'it, mas labele haluha estrada sira iha foho ne'e ema precisa tebes. Ita hotu-hotu ko'alia ita-nia municípios, ita hotu-hotu ko'alia kona-ba ita-nia ema sira ne'ebé precisa tebes desenvolvimento, ha'u espera Ministério das Obras Públicas labele aproveita de'it oportunidade ida hasai ema iha Díli, loke estrada luan ne'e atu nafatin buka vida ida fácil atu justifica ato governativo Obras Públicas nian, hodi favorece lailais sé mak atu halo projeto ida-ne'e, ha'u hein katak ministro ne'e tem que preocupa mós ba doze municípios ne'ebé estrada aat hela.

Muito obrigado, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, distinta Deputada Helena Martins Belo.

Faz favor.

Sr.^a **Helena Martins Belo** (FRETILIN): — Obrigada ba tempo.

Boa tarde ba Presidente em exercício, composição da Mesa, colega Deputada e Deputado sira, Sr. Vice-Ministro no povo Buibere no Maubere.

Primeiro, ha'u reforça nafatin declaração Bancada kona-ba evicção ne'ebé halo, gestão ne'ebé ho brutal, ho desumano, desonesto hasoru ita-nia povo rasik. Desde hahú kedas husi Bidau Massaur mai to'o agora FRETILIN sempre questiona kona-ba ida-ne'e, atu hadi'a gestão oinsá mak atu muda ita-nia ema sira-ne'e, tanba ne'e mak ami fó-hanoin beibeik atu oinsá mak melhora gestão ida-ne'e. Maibé, Governo lakohi rona.

Ha'u bá liu kedas iha Baucau. Baucau mós Presidente Autoridade hakarak tuir kedas ona ida-ne'e, mas saida mak nia cria iha-ne'ebá? Hanesan Baucau oan, ha'u discorda tebes ho colega sira-ne'ebé ohin ko'alia. Ema coopera ona, hotu-hotu bá concentra ona iha leten, tanba saida mak la iha

condições, hodi sira filafali ba kraik? Ne'e ami iha-ne'ebá, ami hatene. Lalika mai conta fali dehan, «ha'u sosa saburaka» ka sosa hudi tasak ka sosa saida-saida ne'e, lalika mai conta fali ita-nia privado iha-ne'e, conta mak dehan katak saida mak factos ne'ebé acontece iha-ne'ebá! La iha duni plano atu loke dalan oinsá mak atividade mercado ne'e iha gestão ida-ne'ebé di'ak, tanba dalan tama ne'e difícil duni, microlete sira tama ne'e lori horas rua para de'it iha-ne'ebá e ema comprador la iha duni atu sosa sira-nia produto, tanba ne'e mak sira balu tem que filafali ba hodi acontece iha dia 13 de janeiro ne'e. Hanesan feto, ita tem que solidariza ita-nia maluk feto ne'ebé hetan baku no to'o kanek, agora daudauk nia processo iha hela Ministério Público. Ne'ebe, ha'u lakohi mak dehan fali, iha-ne'ebá la coopera, lae! Comunidade coopera máximo, tanba de'it gestão husi gestor máximo, liuliu mak Senhora Presidente Autoridade lori fali ninia autoridade hanesan mós Sr. SEATOU bá aplica iha-ne'ebá, implica duni ba comunidade sira, liuliu vítima iha mercado negociante sira-nian.

Lalika bá dook ida, iha Kota Lama, saida mak acontece iha-ne'ebá? To'o tesi fali ai hanesan fali halo luhan ba ita-nia vendedores, moe boot ba ita. Sá Nação ida mak ita harii tiha, em vez de organiza halo didi'ak mak ko'alia ho ema lori bá, bá tesi fali ai hodi halo lutu hale'u fali sira? Ne'e gestão sala! Tanba ne'e mak ita buka, ami fó-hanoin para hadi'a gestão ida-ne'e.

Tuirmai, ha'u hakarak hatete ba, Sr. Vice-Ministro ajuda hela, Ministério Agricultura, tanba irrigação Garubi-Galata ne'ebé tuir loloos dehan Ministro atu bá halo inauguração ka atu bá loke irrigação ne'e iha dezembro, maibé comunidade agricultora sira iha-ne'ebá hein, hein la tun bá, e agora tempo ema atu halai natar, maibé Ministro rasik promete tiha la bá, agora to'o ona janeiro atu hotu tan ona la bá. E, aat liután, companhia refere la remata e arruma ona sira-nia equipamentos atu sai ona husi fatin, ne'ebe favor ida encaminha hela bá.

No mós, ida tan kona-ba barragem iha mota, hahú husi Mota Seixal no mota ki'ikoan sira, oinsá mak atu assegura barragem sira-ne'e ho di'ak, ou IGE ne'e bele bá halo normalização ba bee-dalan atu nune'e bee bele tuir nia dalan para labele implica ba ita-nia comunidade sira-ne'ebé hela besik iha mota sira-ne'e, tanba bee nia volume sempre mai destrói beibeik.

Ikusliu, ba veteranos nian, ha'u hakarak atu husu, Vice-Ministro: – Sr. Ministro atual, uluk desde mai hanesan Secretário Estado, sa'e ba Ministro, iha comissão rasik ami sempre husu, mas buat ne'e mosu nafatin – reclamação mak sei nafatin karik Governo nia resposta saida ba sira? Ida-ne'e ha'u hakarak atu Ita-Boot bele explica.

Governo ida-ne'e halo mak drama, teatro, *fashion show*, festas, turistas bá rai-li'ur nadodon tun-sa'e, maibé ita-nia povo ne'e mak sai fali vítima ba desenvolvimento ida-ne'e. Ita espera katak ukun ne'e ho responsabilidade, sim, povo fó fiar ba CNRT ne'ebé ukun tinan barak liu.

Iha ikusliu atu hatete katak ai-moruk ne'ebé sunu, uluk ami bá halo fiscalização la iha ai-moruk ne'ebé husik hela husi Governo anterior. Quando ida sala ne'e ita hatete sala, barani atu hatete buat

ne'ebé loos, labele duun fali ba malu tanba Estado ne'e atu la'o bá oin iha duni continuidade ba iha governação.

Ida-ne'e mak ha'u hakarak hatete.

Obrigada, Presidente.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

Tuirmai, distinto Deputado António Verdial Ferreira.

Se faz favor.

Sr. **António Verdial da Silva Ferreira** (KHUNTO): — Obrigado.

Presidente Parlamento Nacional em exercício ho ninia composição da Mesa, Excelência Vice-Ministro dos Assuntos Parlamentares, caro distinto e distinta Deputado e Deputada sira, e mídia, Rádio Parlamento Nacional, técnico sira, assessora no assessor sira no povo doben Timor-Leste, iha meio-dia kmanek ida-ne'e ha'u hakarak atu hato'o hela preocupação balu mai husi comunidade sira iha posto Same, liga ho atendimento husi pessoal saúde sira iha município.

Informação ne'ebé tama mai hatete katak pessoal ou assistente sira-ne'ebé halo operação ka controlo ba oxigénio ba paciente sira iha hospital la iha, e guarda hospital sira maka durante ne'e halo fali serbisu ida-ne'e ou ka sira maka monta fali oxigénio ba paciente sira-ne'ebé halo hela tratamento iha hospital refere. Tanba ne'e, ho informação ida-ne'e la'ós atu halo crítica, maibé hakarak hato'o hela ba S. Ex.^a Vice-Ministro dos Assuntos Parlamentares atu encaminha hela informação ida-ne'e ba ministério relevante atu halo to'ok confirmação ida ho saúde município nian para bele observa to'ok situação sira-ne'ebé acontece iha cada município sira. Ne'e realidade.

Tuirfalimai, atu ko'alia kona mós ba assunto estrada ida ne'ebé husi Ainaro Vila to'o ba iha suco ida naran Soru Kraik. Estrada ne'ebé tuan no kleur ne'e monu tiha iha tempo liubá, maibé ke'e fali estrada foun ida, iha bailoro comunidade acesso estrada ne'e ho di'ak tanba bailoro motor ka carreta sira-ne'ebé lori produto foho nian ne'e hodi ba liga ho suco refere ho mercado vila ne'e la'o ho di'ak, sucesso, maibé udan hanesan ne'e sira acesso estrada ne'e la di'ak tanba mesak tahu de'it.

Iha suco refere iha duzentos e tal população, maibé agora sira hasoru preocupação boot tanba sira-nia produto ne'e atu lori mai iha Ainaro Vila hodi hetan netik osan uituan à rasca loos tanba sira liu bá-mai la di'ak tanba tahu. Se bele karik, atu hatete mós ba S. Ex.^a Vice-Ministro dos Assuntos Parlamentares, bele hato'o to'ok ba ministério relevante, bele chama atenção to'ok, bele haree to'ok ba dalan sira-ne'e, tuirmai povo ne'e bele acesso ho di'ak.

Ha'u-nia intervenção mak ne'e de'it.

Hato'o obrigado wa'in, Presidente Parlamento Nacional.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Tuirmai, Deputada Cristina Yuri Rebelo. Mas la iha, ha'u fó kedas ba distinto Deputado Joaquim dos Santos.

Se faz favor.

Sr. **Joaquim dos Santos «Boraluli»** (FRETILIN): — Obrigado, Presidente, bom dia.

Ba povo Maubere, ha'u-nia saudações revolucionárias.

Ha'u atu desenvolve uitoan declaração política Bancada FRETILIN nian baseia ba os princípios da lei e espírito da lei porque quando ita compreende governação ne'e, ha'u concorda ho Deputado PD ida ohin foti conceito jurídico e político ida kona-ba termo clássico ne'ebé ema barak haluhan tiha ona, ita relembra fali iha-ne'e, «*Salus Populi Suprema Lex*».

Ita-nia Constituição artigo 6.º alínea e) ne'e claro, objetivo de Estado, e qualquer ato governação tem que orienta ba objetivo de Estado. E ita haree iha IX Governo, ikus-ikus ne'e nia atuação ne'e la respeita ona objetivo de Estado tuir Constituição artigo 6.º ne'e, garante bem-estar dos cidadãos.

«*Salus Populi Suprema Lex*» nia sentido mak ne'e: lei aas liu iha Estado ida maka bem-estar do povo, ah, princípio ida-ne'e mak ita-nia IX Governo la respeita ne'e, ne'ebe ita discute malu atu lori malu bá respeita princípios de Estado ne'ebé ita tau iha Constituição. Ne'e primeiro.

E depois, quando ita halo plano tuir ita-nia programa político, ita kaer ba artigo 54.º Constituição, tuir loloos ne'e Governo nia ação ne'e tem que respeita, pelo menos, espírito haat ka lima ne'ebé ita define iha Constituição, artigo 54.º, liuliu n.º 3. Ida-ne'e ha'u ko'alia hanesan ex-Deputado Assembleia Constituinte.

Primeiro mak ne'e: se Governo hakarak halo evicção, tem que tuir procedimento sira-ne'ebé lei halo kona-ba expropriação ou despejo administrativo. Evicção ne'e tem que protege cidadão sira-nia direito ne'ebé garante iha Constituição. Terceiro, buka evita violência no violações de direitos humanos atu cidadão sira ne'ebé prejudicado karik labele lori Governo bá Tribunal. Ne'e! Halo indemnização ba vítima sira-nia prejuízo, ne'e significa ita reconhece sala ne'ebé fó prejuízo ba vítima sira, ne'e duni, valor indemnização ba prejuízo ne'e la'ós Primeiro-Ministro mak decide mesak, tem que ser liu husi decisão Tribunal. Ha'u hanoin, caraterística ida-ne'e maka ita precisa aprofunda liga ho ita-nia atuação iha governação, liuliu liga ba SEATOU ninia knaar ne'e, e ita discute ne'e tem que baseia ba observação ba espírito da Constituição. Ida-ne'e!

Quarto, ita labele complica despejo administrativo, ne'ebé pertence ba competência Governo nian, ho expropriação, ne'ebé trata kona ba utilidade pública. E, ida segundo kona-ba utilidade pública ne'e tem que iha decisão Tribunal. Ita, quando hakarak repõe ordem democrática tem que interpreta Constituição nia espírito foin ita halo atuação, quando ko'alia kona-ba expropriação por utilidade pública. Liuliu husi Kuluhun atu bá Fatuahi ne'e iha-ne'ebá iha título rua: privado e balu Estado, la'ós

privado de'it, la'ós Estado de'it, então, quando aplica, tem que ser respeita princípios ne'ebé Constituição garante.

Atu taka ha'u atu..., pois tempo la iha ona, bele fó tan ha'u um minuto, Presidente,...

Hamnasa husi CNRT.

... atu ko'alia uitoan kona-ba veteranos nian ne'e, bele ka lae? Se bele, um minuto de'it...

Sr.^a **Presidente** (Maria Terezinha da Silva Viegas): — Meio minuto pode ser. Um minuto não dá porque aqui ainda têm três Deputados.

Sr. **Joaquim dos Santos «Boraluli»** (FRETILIN): — ... Um minuto, obrigado...

Sr.^a **Presidente** (Maria Terezinha da Silva Viegas): — Meio minuto, Deputado, não é um minuto!

Sr. **Joaquim dos Santos «Boraluli»** (FRETILIN): — ... Obrigado ba laran di'ak.

Hanesan ne'e, kona-ba assuntos veteranos nian ne'e ha'u lakohi ko'alia barak, causa principal ne'e iha mudança lei ne'e, causa principal. Ne'e ida.

Segundo, labele complica conceito ida be dedicação exclusiva ho tempo de participação. Dedicação exclusiva ne'e refere ba combatentes titular ne'ebé merece atu hetan direito ba reforma. Tuir espírito de lei ne'e dehan hanesan ne'e. Mas, ha'u haree, sira complica sasán sira-ne'e, ne'e mak agora mosu problemas ne'e. Ida-ne'e! Tanba ne'e mak ha'u sugere, hanesan autor ba lei ne'e, atu Conselho ho Ministério di'ak liu retira tiha lai documento ne'ebé publica ne'e, cria fali comissão ida hodi halo reverificação, tanba problema falsificação mosu tiha ona iha processo hatama ba dados. Imagina ema ida moris iha 90, nia hetan direito de participação 8 a 14, to'o 1999 nia foin 8 anos, como é que nia combatente 8 a 14? Porque iha ona favoritismo e falsificação. Solução di'ak mak ne'e, retira documento, halo reverificação ba dados!

Sr.^a **Presidente** (Maria Terezinha da Silva Viegas): — Muito obrigada.

A seguir, distinto Deputado Francisco da Costa «Ikulay».

Se faz favor.

Sr. **Francisco da Costa «Ikulay»** (CNRT): — Obrigado, Presidente em exercício.

Vice, Secretárias, Vice-Ministro dos Assuntos Parlamentares, distinto Deputado sira hotu, ha'u-nia boa tarde.

Primeiro, ha'u atu hakarak hatete hanesan ne'e: ha'u haree, e ha'u-nia acompanhamento, katak recurso timoroan lubuk ida di'ak iha Parlamento ne'e mas halo an tiha hanesan ami sira-ne'ebé mai husi foho ne'e.

Segundo, ha'u hakarak hatete, colega sira, ita hetan oportunidade lalika sukat ita-nia an liu fali ita-nia líder histórico sira no desrespeita ita-nia líder timoroan sira. Iha-ne'e Maun Boot Taur Matan Ruak ami respeita, Maun Boot Lú Olo ami respeita, sukat ita-nia liafuan bá, colega sira! Sem sira, ita mós kala la mai tuur iha oportunidade ida-ne'e karik, colega sira. Tanba ne'e, favor boot ida, primeiro tem que sukat. Respeita ema seluk, wainhira hakarak ema seluk respeita ita, colega sira, favor boot ida!

Segundo, Presidente, ohin colega balu preocupa ba ami-nia colega balu fó parabéns bá, mas ha'u hakarak fó parabéns ba Presidente Autoridade Município Baucau. Ha'u repete tan dala ida, ha'u fó parabéns ba Presidente Autoridade Município Baucau tanba, maski muda ita-nia inan-aman sira-ne'ebé fila-liman-na'in husi fatin ida bá fatin seluk, ha'u concorda ne'e tanbasá, quase presidente município ka autoridade município ne'e ema na'in-lima ka neen mak troca malu ona, mas difícil ba sira atubele halo. Parabéns tanba autoridade ida-ne'e bele halo, parabéns! Ha'u bele dehan, difícil ba ema seluk atu halo buat ne'ebé difícil no fácil ba ema seluk buat ne'ebé difícil iha ema seluk nia matan, ida mak Autoridade Município Baucau.

Ida di'ak mós agora daudauk ne'e sira identifica vendedor sira-ne'ebé mai husi estrangeiro, ne'ebé fa'an retalho ka *eceran* ne'e, começa book ona, katak oportunidade mós ba timoroan, Baucau oan, sira começa halo. Identifica mós buat sira ne'ebé ema husi Índia sira fa'an, la'o-rai sira-ne'e. La iha licença, maibé sira bele fa'an ba to'o iha foho iha Baucau, iha posto sira, sira começa identifica no kaer sira balu ona, iha processo nia laran. Tanba ne'e parabéns!

Claro, colega sira, ha'u apoia Ita-Boot sira-nia hanoin balu que merece duni, buat balu ita tem que hadi'a duni, la'ós buat hotu sala ka mesak loos de'it. Apoia! Maibé Ita-Boot sira, quando ko'alia, labele ida sala ne'e de'it, ida di'ak mós imi tem que agradece ka! Agora imi kaer loos ida be la loos nian de'it, ida loos mós imi lakohi ko'alia ne'e, iha-ne'e mak orsida ita barulho, colega sira, barulho ne'e iha-ne'e!

Ha'u ko'alia ne'e ho honestidade. Biar ha'u ha'u ema político, biar líder político, mas ha'u ko'alia ho honestidade, katak buat balu ita tem que hadi'a duni.

Maibé, colega sira, ida mós ita tinan 20 ona ukun an ne'e, aban-bainrua ida bá ukun mós sei tutan buat ne'ebé ita agora *kritik* hela ne'e. Be ita atu halo fali hodi sees fali husi buat ida-ne'e ka? La iha ida, colega Deputado sira! Ida-ne'e mak programa qualquer Governo atu bá ukun, povo fó fiar ne'e, ida-ne'e mak sei halo. Tanba ne'e, buat di'ak ne'ebé Governo ida-ne'e halo, imi mós tem que respeita, fó valor bá! Agora imi kaer mesak buat ida la di'ak nian mak ko'alia mesak sala hela deit ne'e, colega sira, barulho ne'e iha-ne'e.

Pronto, colega sira, sobre veterano sira-nian. Tanba tempo... Mas colega sira...

Se bele um minuto, bele ka lae, Presidente?...

Lian husi CNRT: — Bele!

Sr.^a **Presidente** (Maria Terezinha da Silva Viegas): — Meio minuto!

Sr. **Francisco da Costa «Ikulay»** (CNRT): — ... Sobre veterano nian ne'e, colega sira, ita só hatene mak fó sala de'it ba ema seluk. Sé de'it mak tuur iha Comissão Verificação de Dados, nia sempre enfrenta buat barak, sala ne'e iha. Ha'u tuur iha oin, sé mak serbisu hamutuk ho ha'u, ha'u conhece, se ha'u tuur iha oin, ema sira ne'ebé serbisu ho comandante sira seluk mai halo verificação, ne'e ha'u la conhece. Sala ne'e ida iha-ne'e.

Agora, colega sira, então precisa ita-nia apoio atu oinsá mak halo di'ak. Ita labele fó sala de'it ba Comissão Verificadora sira agora ne'e. Colega sira balu sai verificador, mas agora ne'e iha hela Parlamento ne'e, depois sira hakarak sees an husi sira-nia responsabilidade mós. Labele ka! Naksalak tiha ona, ita começa fó sala ba ema seluk, ita hakarak sees husi ita-nia responsabilidade, labele! Se hahú ita mós envolve iha laran, ita mós tem que iha responsabilidade oinsá atu hadi'a, ida-ne'e mak dehan ita timoroan.

Obrigado barak.

Sr.^a **Presidente** (Maria Terezinha da Silva Viegas): — Muito obrigada.

Tuirmai, distinto Deputado Luís Roberto.

Se faz favor.

Sr. **Luís Roberto da Silva** (KHUNTO): — Obrigado, Presidente.

Boa tarde ba Ita-Boot no membro da Mesa tomak, colega Deputada no Deputado sira, ba Excelência Sr. Vice-Ministro dos Assuntos Parlamentares no boa tarde mós ba povo doben Timor-Leste.

Iha-ne'e, primeiro, ha'u hakarak secunda declaração política hotu-hotu husi bancada sira, ida-ne'e mak dehan katak pró-ativo ba povo, baseia ba *statement* iha Excelência Sr. Primeiro-Ministro nia *speech*, wainhira ita iha discussão Orçamento Geral do Estado 2025 nian.

Atu bá fali iha evicção ou atu bá fali iha lista veterano sira-nian, ita político ho Governo precisa halo consenso ida hodi hadi'a lista sira-ne'e, e depois ba ita-nia população sira-ne'ebé sai vítima ba evicção ne'e. Ida-ne'e mak ami, Bancada KHUNTO, husu.

E depois, iha-ne'e, Sr. Vice-Ministro, ha'u hakarak hato'o ba Ita-Boot katak iha companhia balu mak kaer estrada iha Díli laran ne'e, liuliu companhia Tinolina ne'ebé kaer projeto estrada ida husi *perumahan* ne'e bá to'o iha Ailoklaran ne'ebá ne'e, até à data sira abandona tiha sira-nia responsabilidade, estrada ida-ne'e aat liu fali iha foho.

E depois população sira be momento hela besik iha-ne'ebá mós hetan evicção hotu, muda tiha hotu ona, companhia sira-ne'e tama, depois abandona tiha sira-nia responsabilidade, então estrada sira-ne'e pior, aat liu, ne'ebe husu ba ministério relevante sira para controla buat sira-ne'e. Companhia sé de'it mak kaer ne'e tem que iha responsabilidade, labele halo tiha uitoan husik hela, e depois estrada ne'e aat liután mak foin book tan. Ida-ne'e mós bele prejudica ba ita-nia orçamento, tanba buat hotu-hotu ho orçamento mak bele la'o, ne'ebe companhia sira mós tem que iha responsabilidade.

Segundo maka ha'u ko'alia kona-ba EDTL, E.P. Iha município Viqueque, iha Suco Beloi, iha bairro laran ne'ebá ne'e iha uma-kain 25 ou 26 mak seidak iha acesso ba eletricidade to'o agora. Iha sorin sorin ne'e hotu-hotu iha acesso hotu ona, maibé sira de'it mak seidak, quase 400 metros husi comunidade sira-ne'ebé hetan ona eletricidade ne'e. Kona-ba equipamento eletricidade nian sira sosa, sosa husi EDTL, E.P. ne'e duni, mas agora sira husu para EDTL ne'e tun bá atu halo instalação de'it ba sira-nia uma, até a data sira seidak tun ba. Ne'ebe sira agora sunu nafatin lilin hodi estuda, hodi han hemu iha-ne'ebá, ne'ebe husu ba Sr. Ministro atu ko'alia mós ba ida-ne'e, liuliu ba EDTL, E.P.

Iha mós iha Vemasse, Suco Ossouala, iha ita-nia população uma-kain 40 mak seidak iha acesso ba eletricidade ne'e, ba ahi ne'e. Sira sente hanesan seidak hetan ukun-an ida, ne'ebe ita precisa controla tuir ida-ne'e para bele alcança tiha ahi ne'e 100% ba ita-nia comunidade iha território Timor laran tomak. Ida-ne'e mak ami hakarak ko'alia.

E ikusliu mak ne'e, ami, husi Bancada KHUNTO, nunca mais atu hasai liafuan ou hatudu liman ba ema seluk, ami hakarak maka husu ba ita-nia liderança sira para hamutuk hodi desenvolve Rai ne'e ho di'ak. Selae maka ita-nia aman sira to'o tempo keta Na'i bolu bá karik, naran ne'e bele morin nafatin, selae mak sei la bele. Atu labele acontece ida-ne'e, geração foun só husu de'it ida-ne'e.

E ba dados verificação ne'e mak ne'e, tanba naran taka-sai ona ne'e mak atu halo reclamação, maibé Sr. Vice-Ministro, balu ne'ebé regista, maibé naran seidak taka-sai, ida-ne'e mós reclama ka lae? Bá regista filafali tan ka lae? Tanba naran sira bá regista hotu, maibé la consegue taka-sai, ita-nia aman veterano balu. Ida-ne'e mak ha'u hakarak husu ba Sr. Vice-Ministro para hato'o ba Ministro Assunto veteranos nian.

Obrigado, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Ikusliu, distinto Deputado Patrocínio dos Reis.

Se faz favor.

Sr. **Patrocínio Fernandes dos Reis** (CNRT): — Obrigado.

Excelência Sr.^a Presidente Parlamento Nacional em exercício, componente da Mesa, colega Deputado sira, Sr. Vice-Ministro, público tomak, boa tarde.

Balu tun bá hamriik de'it, balu tun bá toba, ida-ne'e mak sai ita-nia problema, ne'ebe di'ak liu bá oin ita rame-rame bá toba hamutuk ho sira...

Hamnasa husi CNRT.

... Obrigado.

Fulan ida tomak, fulan ida tomak ita-nia assunto kona-ba ação preventiva ne'ebé, ha'u la dehan evicção, Governo halo iha Fomento II atu salva povo sira ne'ebé hela iha fatin risco, horsehik kala halo uitoan declaração política, tenta atu fó resposta, mas la bele! Mas, ha'u dehan katak ita labele hasoru malu duni, tanba ida-idak halo ninia serbisu. Governo ho bancada Governo halo daudauk serbisu atu assume responsabilidade kona-ba Estado no Nação ne'ebé mai husi povo, ha'u fiar katak colega sira serbisu hela daudauk ba serbisu eleitoral 2028 nian, ne'e duni, ita sei la hasoru malu.

Ha'u, loloos, atu dehan, tuir loos Ita-Boot sira tem que agradece ba Secretário de Estado SEATOU, tanba sorte halo ação preventiva ida iha Fomento II, Ita-Boot sira bele iha espaço atu halo serbisu eleitoral ba 2028 nian, bele iha, bele iha mós oportunidade atu halo declaração política iha segunda-feira no terça-feira, tanba serbisu sira kona-ba *issue* eleição antecipada nian começa mate, mate daudauk. Ne'ebe loloos tem que aproveita agradece ba iha SEATOU. Ne'e loloos! Ha'u sugere.

Ha'u hakarak mós atu aproveita hodi aprecia população sira-ne'ebé ita discute daudauk. Sira tau duni sira-nia an nu'udar cidadão ne'ebé pertence ba Estado ida-ne'e, ne'ebé precisa atu cumpre ordem, precisa moris iha ambiente democracia. Ordem mak saida? Lei!

Ohin mós colega sira barak ko'alia kona-ba lei, ko'alia kona-ba Constituição, ha'u hanoin, kona-ba propriedade, kaer ba artigo 54.º, se ida-ne'e mak la inspira lei sira-ne'e, ha'u hanoin, lei tolu no mós decreto de implementação kona-ba Terras e Propriedades nian ne'e kala inconstitucional hotu karik, tanba lei sira-ne'e produz iha legislatura sira uluk mai, tanba espírito ne'e mai husi Constituição da Republica ne'e.

Expropriação atu halo ba domínio privado ne'ebé Estado precisa foti atu halo ba iha utilidade pública, ne'e mak halo expropriação, la'ós halo fali expropriação ba domínio público Estado ne'ebé político sira mak bá encoraja, sustenta povo atu halo incumprimento da lei. E declaração sira be iha segunda-feira no terça-feira ne'e hatudu daudauk katak ita, político sira, la kaer ba espírito Estado ne'ebé hanesan ohin ha'u-nia colega Deputado «Boraluli» foti iha-ne'e, la kaer ba ida-ne'e. Tanbasá? Tanba ita mak ba fomenta povo, ba fomenta povo atu la cumpre lei, atu la cumpre Estado.

Be notificação sira Governo anterior hasai, hasai hodi haruka halo despejo administrativo sira-ne'e mai husi saida? La'ós mai husi decreto-lei ne'ebé Governo hasai maka depois halo notificação? Só que membro Governo sira la brani de'it tanba tem que sustenta, ta'uk keta eleição lakon karik. Maibé, CNRT la'ós ida-ne'e. CNRT, bainhira simu ninia responsabilidade, ukun, serbisu halo didi'ak para depois povo bele fó votos. Ita hotu-hotu mak sei julga. Ne'e segundo.

Terceiro, ha'u, tuirmai, ko'alia uitoan kona-ba veteranos. Ha'u la kaer ba técnico sira ohin, mas ha'u kaer ba declaração política katak «Primeiro-Ministro mak iha intenção atu veteranos la existe», ne'e mak sala boot! Tanba iha 2003, Primeiro-Ministro atual, nu'udar Presidente da República, mak hasai ninia decreto hodi forma comissão para regista veterano sira, combatente sira. Depois mak, iha 2005, hasai nia decreto de Presidente para forma Comissão de Homenagem hodi fó valor ba veterano no combatente sira, foin mak iha 2006 Parlamento Nacional I Legislatura hanoin atu halo Estatuto dos Combatentes da Libertação. Ne'ebe tem que hatuur sasán sira-ne'e tuir ida-idak ninia dalan, lalika politiza sasán hotu, lalika!

Obrigado barak tanba tempo.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Molok atu fó pronunciamento ikus husi bancada tolu, iha ponto de ordem lubuk ida, ha'u sei fó ba distinto sira-ne'ebé husu ponto de ordem, maibé um minuto.

Ha'u hahú ho distinta Deputada Maria Anabela Sávio.

Se faz favor.

Sr.^a **Maria Anabela Sávio** (FRETILIN): — Obrigada, Presidente.

Iha-ne'e ha'u halo ponto de ordem tanba ohin maluk Deputado sira husi parte sorin temi fali sobre Ró Haksolok. Ró Haksolok ne'e loloos Ita-Boot sira bá husu Primeiro-Ministro, e, quando la bá husu, então loke vídeo ida be momento ita debate Orçamento Geral do Estado 2025 nian ne'e.

E depois, ida seluk sobre avião ZEESM, ida-ne'e loloos Ita-Boot sira husu ba Ita-Boot sira-nia an, katak Governo atual ne'e sé mak lidera, Ita-Boot sira mak lidera. Então tanba saida mak hapara? Sé mak hapara? Lori bá Tribunal! Deputada ida be ko'alia dehan «la loos» ne'e lori bá Tribunal, tanba Governo ne'e Ita-Boot sira mak kaer...

Protesto husi CNRT.

... E depois, ida seluk sobre uma Fulolo, ida-ne'e lori bá Tribunal ona. Deputada ida be la hatene ne'e favor ida lê to'ok iha...

Sr.^a **Presidente** (Maria Terezinha da Silva Viegas): — Tempo, distinta Deputada.

Tuirmai, ponto de ordem distinta Deputada Cedelízia Faria dos Santos.

Se faz favor.

Sr.^a **Cedelízia Faria dos Santos** (CNRT): — Muito obrigada, Presidente em exercício.

Ha'u, tuir loloos, foti assunto ida, mas ha'u hakarak secunda ohin ami-nia Vice-Presidente da Bancada, Patrocínio, hatete tiha ona.

Maibé ha'u hakarak responde fali ba distinta Deputada Anabela ida foin ko'alia kona-ba avião ne'e. Foin daudauk Conta Geral de Estado ne'e Ita-Boot tuir loloos mai participa iha-ne'e, selae ha'u sugere, Ita-Boot lê lai Conta Geral de Estado, Câmara de Contas nia relatório ne'e deteta buat sala barak loos husi avião ZEESM ne'e. Dehan de'it buat ne'e sosa foun, maibé buat ne'e usado. Ita-Boot acompanha ema *coret* tiha ka apaga tiha naran avião nian ne'e?

Ró Haksolok Ita-Boot sira mak bá sarani tiha ka, primeira comunhão tiha mak ne'e ka, crisma tiha iha Portugal ne'ebá ne'e, be nu'usá mak ró ne'e la mai to'ok? Ita lalika bosok malu ida, Deputada. Ba lê lai iha relatório ne'e, favor ida. Dia 27 agora ita iha Plenária iha-ne'e...

Protesto husi Deputada Anabela.

... Ita-Boot lê tiha lai, lê tiha mak Ita-Boot bele mai ko'alia ka. Ita-Boot ko'alia sem base ne'e halo nu'usá mak ne'e?

Obrigado.

Sr.^a **Maria Anabela Sávio** (FRETILIN): — Ita-Boot mós la hatene boot ne'e.

Sr.^a **Presidente**: — Muito obrigada.

Sr.^a **Cedelízia Faria dos Santos** (CNRT): — Ita-Boot mak la hatene liu, Ita-Boot mak foti ne'e...

Sr.^a **Maria Anabela Sávio** (FRETILIN): — Ita-Boot mós la hatene, então rona, rona para ha'u husu ida-ne'e ba Ita-Boot hatán.

Sr.^a **Cedelízia Faria dos Santos** (CNRT): — Foti relatório ne'e mai ita rua debate iha-ne'e. Ó bá foti relatório ita rua debate, foti!

Sr.^a **Maria Anabela Sávio** (FRETILIN): — Se Ita-Boot hatene, então rona para ha'u husu pergunta ida ba Ita-Boot hatán.

Sr.^a **Cedelízia Faria dos Santos** (CNRT): — Foti relatório mak ita rua debate, ita rua bá *live* de'it iha GMN.

Sr.^a **Presidente** (Maria Terezinha da Silva Viegas): — Sr. Deputado Dário Madeira, ponto de ordem.

Sr. **Dário Madeira** (FRETILIN): — Di'ak, ha'u-nia ponto de ordem ne'e ha'u atu ko'alia de'it, ohin iha intervenção ha'u ko'alia kona-ba assunto educação, diretor sira-ne'ebé la ativo para bele controla escola sira-ne'e. Ha'u ko'alia ida-ne'e, maibé Deputada balu ohin hatán tiha fali dehan ha'u ko'alia ne'e hanesan ba ha'u-nia interesse fali, ne'ebé ha'u husu ba Deputada ne'e lê didi'ak tiha lai Estatuto Deputado nian ne'e, dever Deputado ne'e atu halo saida, hatene tiha lai mak ema seluk intervém ne'e nia naran saida... hanesan privatiza Comissão Educação hanesan ninia custa tiha fali.

Mak ne'e de'it.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

A seguir, distinta Deputada Maria Teresa da Silva, ponto de ordem. Já não está.

Deputada Maria Gorumali Barreto, se faz favor, um minuto!

Sr.^a **Maria Gorumali Barreto** (CNRT): — Obrigada.

Kona-ba ai-moruk *expire* ne'e, Sr.^a Deputada, Ita-Boot membro Comissão F, ai-moruk *expire* ne'e baseia ba fiscalização Comissão F nian iha terreno iha fatin hotu-hotu, ne'e ai-moruk ne'ebé compras maihusi 2021, 2022, e ninia *expire* ne'e foin acontece iha 2024 ne'e ho 2023, *expire* sira-ne'e mai husi tempo ne'ebá. Mas, ai-moruk ne'ebé mai husi Governo atual ne'e seidauk tama iha tempo ida *expire* ne'e, tanba ne'e mak, colegas Deputados, quando tun ba fiscalização ne'e *fokus* ba fiscalização, labele bá buka fali militantes.

Tuirfalimai, kona-ba posto saúde iha Lour, posto saúde iha Lour ne'e existe hela, funciona hela ho di'ak, atende hela tratamento ba paciente sira. Ne'ebe, Deputado ida dehan katak nia bá visita Lour ne'e, ema ne'ebá dehan carreta mutin ida nunca tama iha-ne'ebá to'o agora.

Obrigado barak.

Sr.^a **Presidente** (Maria Terezinha da Silva Viegas): — Muito obrigada, distinta Deputada.

A seguir, ponto de ordem, distinto Deputado Joaquim dos Santos.

Se faz favor.

Sr. **Joaquim dos Santos «Boraluli»** (FRETILIN): — Obrigado, Presidente.

Invoca Regimento artigo 54.º f), atu esclarece de'it conceito ida «Maun Boot» ho Maun Boot nia comportamento. Valor histórico ne'e ita la questiona, Maun Boot sira-nia valor histórico, mas, hanesan

titular do órgão de Estado, ninia comportamento político ne'ebé viola lei ho Constituição sira-ne'e ita labele nonook de'it, ne'e ita-nia obrigação hanesan Deputado, representante povo.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

A seguir, distinto Deputado Virgílio Pereira.

Ponto de ordem, um minuto!

Sr. **Virgílio Pereira** (CNRT): — Di'ak, obrigado.

Usa oportunidade ida-ne'e atu responde de'it ba Deputada Helena nia intervenção ida ohin, dehan katak S. Ex.^a Ministro Agricultura bosok hela de'it povo, e depois la bá irrigação ida Galata, ne'e la loos! Iha sexta-feira liubá Ministro toba iha Baucau, sábado foin daudauk ne'e mak Ministro bá irrigação Galata ne'e hodi haree situação iha-ne'ebá, atu nune'e iha mós equipamento balu ne'ebé sei precisa atu hadi'a, hodi nune'e iha fim de fulan ida-ne'e, ou selae início de fevereiro ne'e, bele loke bee ba comunidade iha área Galata para depois bele utiliza.

Obrigado, Presidente.

Sr.^a **Presidente** (Maria Terezinha da Silva Viegas): — Muito obrigada.

A seguir, distinto Deputado Anacleto Freitas. Um minuto!

Sr. **Anacleto Freitas** (CNRT): — Obrigado ba tempo.

Ha'u hanoin ha'u atu ko'alia lai, ha'u-nia colega ne'e la iha tiha, halai sai tiha. Nia ko'alia kona-ba Suco Beloi Viqueque ne'e, ha'u hanoin, Deputado Viqueque iha-ne'e ami barak loos, mas Suco Beloi ne'e la iha, la existe iha Município Viqueque. Agora nia dehan fali Suco Beloi ne'e *listrik* la iha, ha'u hanoin, suco ida-ne'ebé karik, keta suco ne'e iha Baucau mak nia temi fali Viqueque karik tanba Suco Beloi iha Viqueque ne'e la iha.

Obrigado.

Sr.^a **Presidente** (Maria Terezinha da Silva Viegas): — Muito obrigada.

A seguir, distinta Deputada Anabela Sávio.

Se faz favor, um minuto!

Sr.^a **Maria Anabela Sávio** (FRETILIN): — Deputada Cedelízia ohin ko'alia ba ida ró Haksolok ne'e, Deputada rona didi'ak lai! Ida-ne'e, se Deputada la compreende, husu filafali ba Primeiro-Ministro, e se la bele fó resposta, então loke vídeo ida uluk ita debate ne'e.

E ida seluk, pergunta mak ne'e: Deputada, estaleiro ne'e funciona iha Portugal e hadi'a ona ró tolu, agora ne'e orçamento hira mak tama ona?...

Haklalak husi CNRT.

... Ha'u husu Ita-Boot, hanesan Presidente Comissão C, explica to'ok!...

Haklalak husi CNRT.

...Be Ita-Boot hatene, então explica mai para ha'u rona...

Sr.^a **Cedelízia Faria dos Santos** (CNRT): — Ha'u explica quando Vice-Presidente fó mai ha'u explica. Ha'u dehan ita rua bá debate de'it, ita rua bá debate, debate público de'it.

Sr.^a **Maria Anabela Sávio** (FRETILIN): — ... Explica to'ok! Explica to'ok ida ha'u-nia pergunta ne'e, explica to'ok lai!...

Sr.^a **Cedelízia Faria dos Santos** (CNRT): — Ha'u sadik Ita-Boot, ita rua bá debate pública de'it. Presidente fó cinco minutos ha'u explica.

Sr.^a **Maria Anabela Sávio** (FRETILIN): — ... Fó 10 minutos para nia explica...

Sr.^a **Cedelízia Faria dos Santos** (CNRT): — Ah, fó 10 minutos ha'u explica ba Ita-Boot para bele compreende.

Sr.^a **Presidente** (Maria Terezinha da Silva Viegas): — Muito obrigada.

A seguir, ponto de ordem, distinta Deputada Helena Martins Belo.

Se faz favor.

Sr.^a **Helena Martins Belo** (FRETILIN): — Obrigada ba clarificação husi Deputado dehan katak tun ona, ha'u hein tanba la'ós ha'u foti de'it, maibé iha semana liubá, sim, ami bá duni, hetan duni informação husi terreno, tanba ne'e mak ami questiona nafatin. Tanba ne'e responsabilidade husi Governo, tem que tun duni atu oinsá responsabiliza ba sira-nia serbisu ida-ne'e, no povo agricultor sira bele kuda ai-horis.

No ida seluk, kona-ba ai-moruk, ne'ebé ohin iha-ne'e mós ha'u hatete katak ai-moruk ne'e sempre iha ninia *expire*, maibé labele duun de'it dehan Governo anterior de'it mak sala, ida-ne'e mak ha'u

questiona. No hatete fali ami «bá hasoru ami-nia militante», be sala ne'e iha-ne'ebé? Regimento ida-ne'ebé maka hatudu dehan labele bá hasoru fali ninia militante? Deputado ne'e kala lê ninia Manual Deputado nian ne'e, Regimento Interno Parlamento ne'e lê ka lae mak nia sempre mai iha-ne'e questiona? Quando bá fiscalização, nia ko'alia di'ak, ami ko'alia dehan la di'ak fali. Ida-ne'e mak realidade, ida-ne'e mak halo saúde to'o colapso, to'o be agonia nia laran ne'e ida-ne'e duni. Ida-ne'e mak halo saúde sai colapso ne'e, tanba em vez de ita hatete buat ne'ebé loos para hadi'a, mai questiona fali kona-ba ema seluk nia privacidade.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinta Deputada. Tuirmai, distinta Deputada Maria Rosa da Câmara «Bisoi».

Sr.^a **Maria Rosa da Câmara «Bisoi»** (CNRT): — Obrigada ba tempo, Presidente.

Ha'u só alerta de'it ba Deputado sira katak quando ko'alia kona-ba... ha'u aceita ho Deputado Joaquim, Ita-Boot ko'alia lei ha'u mós hakarak atu confirma kona-ba lei hanesan Ita-Boot ko'alia ne'e.

Atu ko'alia buat ruma ba ukun-na'in sira, liuliu liderança sira ne'ebé kaer ukun ka ministro, ko'alia tuir lei ne'ebé iha. Bá insulta loroloron de'it kona-ba Maun Boot Xanana Gusmão, ne'ebé hanesan Primeiro-Ministro, insulta beibeik, ha'u hatete ba Presidente katak Bancada CNRT mós buka to'ok meios, insulta to'ok ninia liderança partido sira-ne'ebé tuur iha-ne'e, sira-nia liderança ne'e ita insulta husi rohan ba rohan de'it, bele ka lae?...

Sr.^a **Bendita Moniz Magno** (CNRT): — Ita insulta malu de'it, di'ak hela.

Sr.^a **Maria Rosa da Câmara «Bisoi»** (CNRT): — ... Ha'u hakarak husu to'ok ba Presidente, liuliu kona-ba lei be Deputado Joaquim ko'alia ne'e, ha'u duni mak tuur iha-ne'e sei insulta, sei ko'alia, sei ko'alia nia aat ho nia di'ak ne'ebé iha ukun ne'ebé liu ona bá, hanesan mós atual, agora.

Obrigada.

Sr.^a **Presidente** (Maria Terezinha da Silva Viegas): — Muito obrigada, distinta Deputada. Tuirmai, ponto de ordem, distinto Deputado Antoninho Bianco. Se faz favor.

Sr. **Antoninho Bianco** (FRETILIN): — Presidente, bele karik Deputado sira-ne'e halo debate iha televisão para tempo ne'e di'ak. Agora iha-ne'e hanesan conceito la iha-ne'e, di'ak liu debate iha televisão de'it, ida por ida ka, rua hasoru malu ka, ne'e mak di'ak.

Tanba ne'e, ha'u hanoin, Presidente, ita la soluciona sasán sira-ne'ebé iha-ne'e ho Deputado. Ami hatete, imi dehan nune'e ne'e la'ós resolve problema. Ita hatete porque aspiração, imi lakohi ne'e husik bá Governo mak representa iha-ne'e para hatán. Ne'ebe, ha'u hanoin, atu debate ha'u pronto, sé mak atu debate ho ha'u qualquer assunto ida, ita agenda tanba Parlamento ne'e iha média atu halo debate, la'ós barabarak hanesan ne'e.

Rua, Governo, para bele ami debate, ha'u ne'e RTM (Rádio e Televisão Maubere) convida ona atu debate, conversa café nian, maibé ema lakohi hotu, ah ida-ne'e mak ne'e. Agora ne'e ami atu debate ida conversa café, convida membro Governo, Deputado sira bancada nian para debate iha-ne'ebá ho sociedade civil. Ha'u convida, imi hein bele hatán, bá conversa café be RTM promove.

Obrigado.

Sr.^a **Presidente** (Maria Terezinha da Silva Viegas): — Muito obrigada.

Tuirmai, ponto de ordem, distinto Deputado Patrocínio Fernandes.

Sr. **Patrocínio Fernandes dos Reis** (CNRT): — Obrigado, Sr.^a Presidente.

Ha'u halo ponto de ordem atu dehan, RTM ami la participa tanba antena institucional. Ne'e primeiro.

Segundo, atu completa de'it katak Governo hala'o nia serbisu ho nia programa ne'ebé mai halo apreciação iha-ne'e, portanto, Governo la halo serbisu baseia fali ba bancada ida ka bancada rua nia ko'alia hanesan labarik be dehan «sorte ami tun bá haree». Ne'e declaração infantil.

Obrigado.

Sr.^a **Presidente** (Maria Terezinha da Silva Viegas): — Tuirmai, ponto de ordem, distinta Deputada Maria Gorumali Barreto.

Se faz favor.

Sr.^a **Maria Gorumali Barreto** (CNRT): — Sim, Sr.^a Presidente.

Sim, claro tem que hatete factos ne'ebé loloos, katak ai-moruk ne'e *expire* mai husi sá tinan nian. Ida-ne'e mak ita tem que declara claro, labele mai bosok fali iha público be dehan katak «Governo ida-ne'e mak halo ai-moruk expire barak». Ne'e tem que ko'alia claro.

Tanbasá mak ha'u dehan katak tun bá ne'e *fokus* fiscalização? Ne'ebe Deputado ida ohin ne'e, hatudu to'ok Regimento Parlamento Nacional artigo hira mak ko'alia dehan «ó tun bá fiscalização, ó ba buka fali ó-nia militante, husu fali dados husi kotuk-kotuk»?

Obrigada barak.

Sr.^a **Presidente** (Maria Terezinha da Silva Viegas): — Ponto de ordem, distinta Deputada Cedelízia Faria dos Santos.

Sr.^a **Cedelízia Faria dos Santos** (CNRT): — Obrigada.

Ha'u hakarak ko'alia ne'e wainhira Deputada Anabela iha-ne'e, tanba nia dehan ha'u tem que fó dados ba nia, agora nia sai tiha ne'e halo nu'usá? Ne'ebe ha'u hakarak hatete lailais ba nia.

Mas Vice, ha'u minuto hira? Um minuto não chega.

Ha'u só hakarak hatete de'it ba nia, Deputada ne'e, katak Ró Haksolok Governo ida 2014, Governo Xanana nian, considera katak Timor-Leste precisa ró-ahi Haksolok hodi facilita transporte marítima entre Díli, Ataúro ho Oe-Cusse mak Governo tau osan ne'e bá. Agora, orçamento início ne'e tau ho 14 000 000 USD de'it, ita dehan euro karik 13,7 milhões de euro.

Agora, Vice, ha'u ko'alia ne'e naruk loos, ne'ebe ohin ha'u dehan, se bele karik, ha'u concorda Deputada Anabela ami rua debate de'it para informação ne'e povo mós bele acompanha. Ne'e para ita labele bosok beibeik povo. Mas Deputada sai tiha be, Presidente, um minuto ba ha'u la to'o ida, ne'e naruk loos, ha'u-nia dados barak loos, inclui dados husi Câmara de Contas foin daudaun identifica ne'e iha hotu kedas.

Muito obrigada.

Sr.^a **Presidente** (Maria Terezinha da Silva Viegas): — Muito obrigada.

Ha'u husu desculpa, ha'u sei la fó tan ona ponto de ordem tanba sei iha declarante husi bancada tolu mak atu halo última declaração.

Ho nune'e ha'u fó ba Bancada da FRETILIN.

Se faz favor.

Sr. **Aniceto Longuinhos Guterres Lopes** (FRETILIN): — Obrigado e boa tarde ba Sr.^a Presidente em exercício, Vice-Ministro dos Assuntos Parlamentares no distintos Deputados.

Ita dala ruma fihir an iha espelho, em vez de ita hetan ita-nia lalatak, hetan mak ema seluk nia lalatak. Tanba ita toman ona halo buat hotu, explora ema nia sentimento terus atu manán votos hodi manán de'it eleição, depois ita dun fali ba ema seluk mak buka votos, hanoin katak ema seluk mós hanoin hanesan ita.

Ema sira ne'ebé sai vítima ba evicção ohin loron ne'e ema kbiit-laek sira, ema sira-ne'ebé la iha condição atu moris hanesan ema baibain, ita sira-ne'e, ema sira-ne'ebé representa maioria povo Timor-Leste, ne'ebé quase 50% povo Timor-Leste ne'e moris iha miséria nia laran, enquanto grupo ki'ik ida iha cidade sira-ne'e rico matak, rico ba beibeik. Ne'e realidade.

Estado ida naran República Democrática de Timor-Leste ne'e Estado ida-ne'ebé harii husi no ba povo ida-ne'ebé ohin ita dehan cinquenta e tal por cento ne'e, sei moris iha *dibawah garis kemiskinan* ne'e. Tanba ne'e mak iha política desenvolvimento hotu-hotu ne'e combate kiak tem que sai causa principal ka sai centro ba política desenvolvimento hotu-hotu husi Governo ne'ebé de'it iha Timor-Leste, inclui política desenvolvimento cidade capital Díli ka, cidade Baucau ka cidade sira seluk.

Dala ida tan, FRETILIN mós hakarak ita hadi'a no ordena cidade Díli, atu nune'e Díli sai cidade ne'ebé saudável, cidade ne'ebé furak ba ema hotu-hotu, ema ki'ik ka boot, ema rico ka ema kiak, para hotu-hotu bele coabita iha capital Díli. Maibé, FRETILIN contra evicção sira-ne'ebé halo ba ema ki'ik, ema kiak sira sai vítima ba política Governo nian.

Parece IX Governo precisa aprende husi FRETILIN nia experiência iha RAEOA, ne'ebé halo evicção, hasai ema no sobu ema nia uma hodi halo estrada ne'ebé ohin loron furak loos iha Oe-Cusse ne'ebá ne'e, maibé autoridade RAEOA, iha momento ne'ebá, fó fali uma iha fatin seluk ho condição ne'ebé di'ak liu uma ne'ebé sobu. Bá husu testemunha ema Oe-Cusse sira iha-ne'ebá!

Tanba ne'e la iha razão ida ba IX Governo atu la fó fatin alternativa ba ema sira-ne'ebé sofre evicção. Governo tem que fó condição ne'ebé di'ak liu do que nia hela-fatin ne'ebé hetan sobu, katak ema nia hela-fatin ne'ebé di'ak liu, acesso ba serviço público, educação no saúde ne'ebé di'ak liu, iha acesso mós ba campo de trabalho ne'ebé digno no condições necessárias seluseluk tan hodi moris di'ak liu antes. Labele ita lulun ema sira, tula iha carreta, lori bá quarentena, depois lori bá soe hela de'it iha município sira ho promessa dehan atu fahe osan, mas ne'e ita la bele resolve problema ida.

Ne'e duni, evicção ka sobu ema nia uma, hasai ema husi nia fatin ho objetivo saída de'it, tanto atu hadi'a cidade, satán atu hasees ema husi risco inundaçāo, mak la fó alternativa ka la fó condição ne'ebé di'ak liu, ne'e mak IX Governo comete violação direitos humanos. Pior liután, ida-ne'e la'ós ona política desenvolvimento atu combate kiak, maibé política empobrecimento ka *politik pemiskinan*, política hamoos ema kbiit-laek sira husi cidade Díli. Dala ida tan, ne'e la'ós ona política combate kiak, maibé política contra ka combate ema kiak. Governo ida hanesan ne'e la merece atu ukun povo, parece merece de'it atu ukun ninia partido de'it.

Obrigado.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

A seguir, Bancada do KHUNTO.

Se faz favor.

Sr. **António Verdial de Sousa** (KHUNTO): — Muito obrigado, Sr.^a Presidente.

Obrigado ba biban daruak hodi halo fundamentaçāo ba ami-nia declaraçāo política.

Ami-nia declaração política ohin loron sai referência ba Governo, no, iha biban ida-ne'e Bancada KHUNTO hakarak informa ba S. Ex.^a Vice-Ministro nakait ba situação real ne'ebé iha, mai husi ita oan sira ne'ebé ita garante hela katak atu sai nu'udar geração continuadora ne'ebé mai ho qualidade educativa ne'ebé existe.

Nakait ba Lei-Inan, iha princípios fundamentais husi artigo 13.º, ne'ebé ko'alia kona-ba línguas oficiais iha Timor-Leste, definição husi línguas oficiais mak língua ida-ne'ebé necessariamente instituições no repartições governamentais, inclui ensino aprendizagem ne'ebé hahú husi base to'o universidade pública sira, obrigatoriamente atu aprende no ko'alia, hakerek, língua portuguesa.

Ho nune'e, felizmente ita hotu hatene katak escola referência portuguesa, CAFE (Centros de Aprendizagem e Formação Escolar) nu'udar escolas públicas ne'ebé integra iha sistema ensino timorense, mai ho nia estatuto de ensino ho língua portuguesa ne'ebé haktuir ba currículo nacional Timor-Leste no desenvolve atividade sira hotu ho acordo calendário escolar iha Timor-Leste, no escola refere gratuita no nakloke ba timoroan hotu, ho propriedade liu ba família mukit sira-ne'ebé mai husi áreas rurais. Maibé, realisticamente, ita observa direta ba escola CAFE Díli, ne'ebé situada iha Taibesi, situação real ne'ebé tinan-tinan escola refere sempre hasoru mak problemas sala de aula ne'ebé limitado tebetebes. Tanba escola refere ki'ik no la iha espaço atu acumula estudante hotu ne'ebé regista iha período ida-ne'e, situação real ida-ne'e ita considera bele prejudica estudante sira-nia processo ensino-aprendizagem, ao mesmo tempo situação ida-ne'e bele prejudica mós professor sira-nia sentimento entre escola ho escola no preparação ba matérias por razões salas de aula la fixo.

Husi dados ne'ebé iha, número total estudante iha escola CAFE Díli ba período ida-ne'e hamutuk 1600 estudantes, ne'ebé composto husi pré-escolar to'o ensino secundário. Número estudante boot iha escola CAFE refere hatudu katak inan-aman no oan sira iha interesse atu aproveita qualidade educação ne'ebé iha.

Situação ida-ne'e ita considera problema público, precisa ita hotu nia atenção tanba escola CAFE Díli nia problema mak la iha fatin hodi bele haluan tan edifício escola, nune'e bele acumula estudante sira iha edifício CAFE refere. Ba situação ida-ne'e professor sira tem que hola medida halo tuir orientação Ministério nian liuhusi destaca estudante sira bá iha escola pública sira, hanesan balu tem que destaca ba escola Sérgio Vieira de Melo iha Becora, balu tem que destaca ba Escola Hospitalidade Timor-Leste no balu tem que destaca ba salão edifício do Ensino Recorrente.

Informação hirak ne'ebé ha'u informa banati ba situação real ne'ebé tuir ami-nia observação direta ba escola CAFE. Precisa ita hotu hatene katak problema educação la'ós responsabilidade Ministra Educação nian de'it, maibé ida-ne'e assunto público, no ita hotu nia responsabilidade hodi tau matan séria, atenção ba ita oan sira-nia estudo, tanba setor educação mak chave ba desenvolvimento.

S. Ex.^a Vice-Ministro ne'ebé trata assunto parlamentar, informação ida-ne'e importante tebes. Dala ida tan, favor canaliza hela informação ida-ne'e ba Ministério da Educação, no husu Governo resolve sasán hirak-ne'e ho saudável.

Ikusliu, informa ba Governo, liuhusi Vice-Ministro ne'ebé trata assunto parlamentar, oan sira-ne'ebé destaca iha escola pública sira seluk iha Becora, liuliu aluno sira husi 7.º to'o 9.º Ano, nune'e mós husi 1.º ano to'o 6.º ano, ladauk confortável hodi participa processo ensino aprendizagem tanba razão condições.

Favor tatoli hela mensagem tanba ne'e situação real ne'ebé escola CAFE refere hasoru hela.

Muito obrigado, Sr.^a Presidente.

Sr.^a **Presidente** (Maria Terezinha da Silva Viegas): — Muito obrigada, distinto Deputado.

Ikusliu, Bancada PLP.

Se faz favor.

Sr. **Helder Freitas «Kamarudin»** (PLP): — Obrigado, Presidente.

Fundamentação declaração política Bancada PLP.

IX Governo la iha política di'ak ida ba veterano sira. PLP solidariza nafatin combatente no família mártir sira-ne'ebé naran excluído iha lista edital ida-ne'e no encoraja sira atu hato'o reclamação hodi nune'e sira-nia dedicação hetan reconhecimento husi Estado.

Loos duni, Sr. Vice-Ministro, iha tinan 2003 ho 2005 Maun Xanana rasik maka autoriza, fó recomendação ba antigo combatente, veterano ne'ebé halo registo iha 2003 no 2005. Iha momento ne'ebá autoriza mak, primeiro, ema ne'ebé estafeta ka iha caixa ou uluk iha ai-laran ne'ebá, la'ós estafeta iha vila laran, la'ós iha Díli laran, la'ós iha município fali, maibé caixa ne'e iha ai-laran, fó uluk recomendação ba ida-ne'e, precisamente sira mós hetan reconhecimento ho di'ak; segundo, ba responsável, reconhecimento ba ida-ne'e; terceiro, ema ne'ebé motorista, uluk ami utiliza tula hahán ba FALINTIL sira. Ida-ne'e mak fó recomendação, la'ós ohin lora sai barak hanesan ne'e, ida-ne'e mak Maun Xanana autoriza duni. Maibé, iha 2009 ne'e discriminação duni. Tanba saida? 2003 ho 2005 Maun Xanana rasik mak autoriza ba recomendação, ba 2003 no 2005 fó hotu recomendação, mas tanba saida mak ohin lora 2009 la fó recomendação filafali? Ida-ne'e mak problema.

Ida seluk, kona-ba lei, altera tiha artigo 27.º ne'e, ne'e loos, e ha'u rasik mak iha Liquiçá ne'ebá lori mai halo recurso iha Plenária. Ha'u hatete, hanesan ohin Deputado balu husi bancada Governo, Deputado Anacleto ohin ko'alia ne'e loos, e ha'u rasik exige, artigo 27.º labele altera, tanba ita iha 2003 no 2005 ne'e ita recomenda ona, família rasik-rasik simu tiha, liuliu jovem mate iha ai-laran, kaer kilat mak mate iha ai-laran, e vila laran ne'ebé sira halo clandestina, liuliu ba estafeta sira ou responsabilidade lori lakon ona, merece nia família rasik-rasik ne'e simu nafatin, tanba ita implementa

iha 2003 ho 2005, tanba ne'e mak ha'u lori mai to'o iha-ne'e. Mas, Bancada Governo mak lakohi, tem que altera. Altera tiha to'o ohin loron nia família exige ne'e la di'ak fali. Ida-ne'e mak acontece.

Ha'u-nia pergunta mak ne'e: tanba saida mak 2009 nian la fó recomendação fali? Problema. Ne'e IX Governo mak ukun. Tuir loloos Maun Xanana sei bolu ema ne'ebé antigo combatente, veterano ne'e, pelo menos fó-hanoin bá. Sai tiha problema hanesan ne'e, depois ita duun ba malu filafali ba verificação.

Ami bá verificação, envolve ha'u, iha Baucau hanesan colega Deputado balu ko'alia ona, momento verificação, ha'u rasik, Sr. Comandante Berdu ho Alin Laek rasik mak bolu ha'u, ha'u lakohi, mas sira bolu ha'u: «Ita-Boot tem que iha ha'u-nia sorin». Maibé ami bá verifica mak ida-ne'e: ema ne'ebé hetan 8 a 14 ne'e ema ne'ebé iha ai-laran liuliu tinan tolu ka tinan haat iha ai-laran, mai, kaer, castigo, desterra iha Ataúro ou ba Cailaco, ida-ne'e mak merece sei hetan dedicação exclusiva 8 a 14, de resto ne'e ou participação ne'e tinan atu 12 ka ou 15 ne'e normal, só hetan certificado ou medalha de'it. Mas, agora problema, labarik ki'ikoan ida sai fali ba 8 a 14. Ne'e husi ida-ne'ebé? Hanesan ohin ha'u-nia colega Deputado Adolfo ohin ko'alia ona, be buat hotu-hotu iha-ne'ebá ami resolve hotu ona, chave hotu ona, mas nu'usá mak iha comissão ne'e sai mosu filafali hanesan ne'e, labele fó sala ba comissão. Iha-ne'ebá ami hatete: «Aban bainrua taka-sai naran imi labele requiere filafali!». Iha-ne'ebá ne'e, classificação, liuliu ba documentos, ami resolve ho di'ak, investigação, buat hotu-hotu ami entrega ona ba técnico mak lori mai nacional. Mas, ohin loron, quando taka-sai, ami hotu admira. Dala ruma ami husi comissão verificação telefone ba malu, «Eipah, problema sai boot fali ne'e?» «Tanba saida mak ema nia duração tinan 10 ka tinan 12, mas de repente taka-sai, duração ne'e sai fali zero a três? Be resto ne'e sira han tiha ka?» Ida-ne'e mak agora acontece.

Ida seluk, bancada do Governo ohin dehan «labele critica», maibé ida-ne'e la loos mai ha'u, favor ida! Ha'u la'ós foin mai Deputado mak critica, ha'u, masque Maun Boot sira, iha ai-laran Maun Xanana mós ha'u critica, Maun Taur mós ha'u critica, David Alex mós ha'u critica, Konis mós ha'u critica, buat ida-ne'ebé la loos ha'u sempre critica, atu hamutuk para resolve problema ida para sai di'ak, la'ós mai Deputado mak sai mai garganta.

Ha'u hatete ba Ita-Boot sira, ida be CNRM muda ba CNRT ne'e ha'u rasik mak critica, ataca Maun Xanana ho Maun Taur. Ha'u dehan: «Ita-Boot sira tau ona ida-ne'e, aban bainrua imi na'in-rua tem que iha responsabilidade». Tanba saida mak Maun Conis Santana lakohi assina CNRT to'o mate, tanba saida mak David Alex lakohi assina CNRT to'o mate, maibé sira hatán estratégia ida, ita manán tiha funu mak ita resolve. Ida-ne'e ba oin ha'u critica nafatin, la'ós hapara filafali, lae! Ó sala tem que critica, para atu hamutuk hodi hadi'a, la'ós ...

Presidente desliga tiha microfone Deputado nian tanba tempo liu tiha ona.

Sr.^a **Presidente** (Maria Terezinha da Silva Viegas): — Ikusmai ha'u fó tempo ba Sr. Vice-Ministro.

Karik 10 minutos atu responde, sumariza de'it resposta ba questão hirak ne'ebé ohin Distinto Deputado sira foti. Se permite, Sr. Vice-Ministro, ami fó de'it 10 minutos porque ohin questão sira-ne'ebé foti la halai sees husi assunto sira hanesan veteranos, escola no mós iha ida rua mak kona-ba evicção, ne'ebe ha'u fó tempo 10 minutos ba Sr. Ministro.

Karik ba oin ita bele promove ona debate ho Governo, liuliu debate entre Deputados.

Muito obrigado.

Se faz favor, Sr. Vice-Ministro.

Sr. **Vice-Ministro dos Assuntos Parlamentares** (Adérito Hugo da Costa): — Obrigado, Sr.^a Presidente do Parlamento em exercício, membro da Mesa, distinto e distinta Deputado sira hotu.

Koko atu fó resposta geral de'it.

Primeiro, ba declaração política bancada sira-nian, hahú husi Bancada FRETILIN, hakarak hatete katak regime legal sira-ne'ebé aplicável durante 22 anos ne'e mak ita kaer hela, Governo sira anterior to'o Governo atual. Ba evicção ka repropriação acontece to'o último, Sr. Deputado sira hotu, iha família ida afetado ba iha reapropriação, halo processo identificação, tau número, notificação, nia processo ba iha tribunal e Sr. Secretário de Estado SEATOU bá tribunal e tribunal decide katak Governo nia posição legal, para tem que sobu, e agora hein de'it atu executa decisão tribunal nian. Ne'ebe, se iha entidade ruma iha intenção atu halo participação ba Ministério Público, odamatan ne'e aberta, la iha ida impede. Espera que Sua Excelência Sr. Presidente da República nia declaração ida última ne'e bele continua, tanba temi dala hira ona ba caso sira balu anterior mas depois la halo participação. Iha esperança boot katak gabinete Sua Excelência Presidente da República halo duni participação, para fica ho clareza ba público, labele ko'alia de'it iha discurso sira, para ita bele realístico mós.

Governo sei continua nafatin evicção ho reapropriação baseia ba lei sira aplicável, considera ba ne'e.

Sr. Deputado sira, iha Sr. Deputado sira-nia mesa iha Parlamento Nacional ami mós submete ona Proposta de Lei medidas de tutela da legalidade urbanística atu completa regime legal sira ne'ebé em vigor hela. Ha'u husu, ho haraik an, katak comissão sira bele continua ba preocupação Sr. Deputado sira-nian ba reapropriação, indemnização sira mais digno ne'e ami apresenta tan ida-ne'e, para ita labele ko'alia de'it, labele ita husik *status quo* ne'e para ita halo politização ba moris povo nian. Agora ne'e ita halo politização tanba ita la iha vontade atu halo lei. Lei sira-ne'e la bele, la to'o atu halo implementação ida, só precisa brani de'it, satán kaer ba convenção internacional sira-ne'e, ne'e lae liu! Ita ko'alia mas ita la prática iha ita-nia oportunidade de governação. Agora ami apresenta lei ida-ne'e, favor ida, se hotu-hotu haree katak assunto ne'e sério ba povo, ba Nação duni, fó atenção ba lei ne'e,

aprova lalais ami hodi bele la'o. Ha'u fiar katak referencia ne'ebé mai husi intervenções Deputado sira-nian, inclui Bancada FRETILIN nia declaração ho bancada sira seluk ninian durante ne'e, ajuda atu halo andamento ba lei ne'e. E, hakarak hatete, indemnização sei continua ba propriedade Estado nian, ba uso bem Estado nian, público nian, iha Díli e sei to'o ba município sira hotu, sei to'o hotu ba município, inclui iha Baucau ona.

Ami regista hela acontecimento ida iha dia 13, ohin Sr.^a Deputada ida foti, dehan katak iha violência ba senhora ida e depois parte polícia apresenta ona informação husi parte segurança nian. Se participação ba Ministério Público, di'ak liután para ita hatene claro sé mak autor iha-ne'e, sé mak inventa situação sira-ne'e. Tama ona iha Ministério Público, espera que Ministério Público fó clareza kona-ba decisão sira-ne'e, sé mak comete ato ida-ne'e para depois bele buka especulação husi mídia social.

Ba edital 2009 nian, Srs. Deputados, desde dia 15 publica edital ne'e, edital ne'e tuir regra, sequência normal, iha verificação anteriores mós hanesan, 2003 no 2005 nian, dala ida-ne'e documento ida atu sai iha edital ne'e atu fó ba público duni para halo reclamação, 60 dias.

Sr. Deputado sira hotu, Lei n.º 3/2006 ne'e halo iha I Legislatura, Sr. Deputado Bianco ohin temi, la consegue implementa. Na implementação, iniciativa atu halo implementação hetan resistência maka'as husi veterano sira, tanba ne'e mak IV Governo, iha 2007, iha II Legislatura, halo alteração iha-ne'e, e Plenária ne'e halo iha tempo sábado ho domingo, envolve veterano sira hotu, lori loke dalan ba implementação Lei n.º 3/2006. Tanba ne'e mak processo ne'e la'o mai to'o ohin loron, tanba ne'e mak verificação sira iha 2003 no 2005 nian começa halo implementação iha 2009. Baseia ba implementação lei ida-ne'e duni mak la'o mai iha implementação primeira fase nian iha 2003 no 2005 deteta katak iha oportunidade ba falsificação demasiada, ou até iha partidarização ou politização ba processo de verificação ba 2003 no 2005 nian. Tanba ne'e mak, veterano sira-nia aspiração exige para halo tan lei ida hodi estabelece Conselho dos Combatentes da Libertação Nacional. Lei ne'e aprova iha 2022 ho esperança ida katak ho envolvimento Conselho Veteranos nian credibiliza processo ne'e. Se ohin ita hatudu liman dehan katak iha politização no partidarização, então Na'i Veterano sira ne'ebé iha Conselho Veterano nian mak comete karik, seidak bele corrige an ba processo sira primeira fase ne'ebé deteta katak iha falsificação. Dados hatete katak quinhentos e tal beneficiário ilegal, falsifica, e agora balu processo ona iha tribunal, balu mós tribunal decide ona atu devolve osan. Facto sira-ne'e mak ita halo correção, facto sira ne'e mak Na'i Veterano sira, feto-mane, katuas-ferik, balu sei efetivo iha forca, balu reforma ona, envolve para atu cuidado sasán ne'e, cuidado. La iha dalan para partidarização ou politização. Se iha dalan ba ida-ne'e, ha'u sente, ne'e Na'i Veterano sira ne'ebé envolve iha conselho ne'e mak comete, tanba primeira fase ne'e público hatene ona, iha falsificação. Maibé hakarak hatete, decreto Presidente da República primeiro nian ba harii Comissão de Homenagem hodi ba hahú regista ne'e mós la foti husi ema seluk, envolvimento quadro da resistência

sira iha suco, aldeia, posto, município to'o nacional. Mas, depois resultado sei nafatin iha problema, falsificação iha nafatin. Se segunda fase ida-ne'e mós nafatin iha falsificação, então iha problema ruma la loos iha-ne'e. Tanba ne'e mak ohin opinião balu dehan katak «taka tiha processo ne'e hodi loke fali foun», sim, fila ba Na'i Veterano sira, Conselho dos Combatentes da Libertação Nacional bele haree ida-ne'e, se Edital ida sai ne'e to'o 60 dias nafatin la resolve problema. Maibé, agenda ba política ida-ne'e la pára, tanba depois de segunda fase ne'e sei loke mós terceira fase, tanba sira seluk barak seidauk regista, nem iha primeira fase, nem iha segunda fase. E, ne'e agenda nacional ona, Ministério para os Assuntos dos Combatentes da Libertação Nacional declara filafali, la'ós ministro atual de'it, ministro sira anterior mós comprometido ba público, katak sira-ne'ebé seidauk regista atu hein oportunidade ba regista ba terceira fase. Ne'e mak agenda, respeita ba veterano sira, respeita ba princípio fundamental desde início ita-nia restauração independência, husi gabinete Sua Excelência Presidente da República primeiro nian, Sua Excelência Kay Rala Xanana Gusmão, nia gabinete, harii kedas oin política ida-ne'e. Tanba ne'e mak iha dalan klaran balu dehan katak Sua Excelência Sr. Primeiro-Ministro atu la tau atenção ba ida-ne'e, ne'e sala boot! Tanba ema ida hamriik kedas iha primeiro para organiza vontade política Estado nian ida-ne'e mak Sua Excelência Kay Rala Xanana Gusmão. Sira seluk sei iha hela discurso balu contrário, dala ida tan ha'u repete, quando Sua Excelência Kay Rala Xanana Gusmão, hanesan Presidente da República, hamriik iha primeiro kedas hamutuk ho veterano sira, ko'alia kona-ba assunto ida-ne'e, balu sei halo discurso oin seluk, contrário. Dados ne'e iha, ita bele regista perante público hatene, tanba ne'e mak ohin temi dehan katak Sua Excelência Primeiro-Ministro la tau atenção ba assunto veterano, ne'e sala boot!

Obrigado barak.

Sr.^a **Presidente** (Maria Terezinha da Silva Viegas): — Muito obrigada, Sr. Vice-Ministro.

Ho nune'e ita tama ba Período da Ordem do Dia, «Anúncio da admissão e baixa à Comissão de Assuntos Constitucionais e Justiça da Proposta de Lei n.º 15/IV(2.ª) e Primeira alteração à Lei n.º 1/2017, de 18 de janeiro, Regime Transitório de Recrutamento de Magistrados e Defensores Públicos não Timorenses, e Segunda alteração à Lei n.º 9/2011, de 17 de agosto, que aprova a Orgânica da Câmara de Contas do Tribunal Superior Administrativo, Fiscal e de Contas.

Ho nune'e ha'u husu, lei husi DIPLIN haruka ona ba Comissão A, maibé Primeira alteração ba lei n.º 15/VI/ 2.ª, Governo husu ho pedido de urgência, tanba ne'e mak ha'u husu ba Comissão A bele reúne em 24 horas hodi emite atu aprova parecer kona-ba ba pedido de urgência ne'e, e ita aban sei iha Plenária extraordinária atu aprova pedido de urgência ne'e. Ne'ebe, ba Presidente da Comissão A ha'u husu atubele reúne iha lokraik ida-ne'e atu nune'e aban ita bele iha Plenária extraordinária ho conhecimento Sr. Vice-Ministro nian ba aprovação pedido de urgência ne'ebé mai husi Governo. Só para Proposta de Lei n.º 15/V(2.ª).

Ho nune'e, la iha objeção, ha'u husu...

Se faz favor, Sr. Presidente da Comissão A.

Sr. **Presidente da Comissão A** (Patrocínio dos Reis Fernandes): — Obrigado, Sr.^a Presidente.

Nune'e aproveita tempo ha'u convoca kedas membro da comissão A para 3h00 lokraik.

Obrigado.

Sr.^a **Presidente** (Maria Terezinha da Silva Viegas): — Ha'u atu fó-hanoin filafali mós ba Presidentes das comissões katak à mesma hora sei iha reunião ida ho Presidente do Parlamento, conforme horissehik anuncia tiha ona.

Sr. **Presidente da Comissão A** (Patrocínio dos Reis Fernandes): — Sim, convocatório ba reunião Presidente das comissões ne'e sai antes, mas depois Presidente mós baixa fali ida 24 horas ne'e, ha'u la hatene oinsá atu halo. Tanba ida-ne'e Regimento haruka 24 horas, tanba ne'e mak ha'u convoca kedas atu ba ida-ne'ebá, depois, seluk ita bele ko'alia.

Obrigado.

Sr.^a **Presidente** (Maria Terezinha da Silva Viegas): — Bele ajusta, orsida ami informa ba Presidente. Talvez logo à tarde, com a exceção da ausência da comissão A, Presidente bele admite ida-ne'e.

Ho nune'e ha'u husu desculpa – e agradece tebes ba distinto Deputado sira hotu – ha'u viola tiha ona Ita-Boot sira nia direito ba almoço, maibé ho consentimento Ita-Boot sira-nian.

Ho nune'e, dala ida tan muito obrigada ba hotu e bom almoço, embora tarde.

Horas hatudu tuku 1 liu minuto 39 lokraik.